


Jilid II
Bil. 1



MALAYSIA

Hari Isnin
28hb Mac, 1980

PENYATA RASMI PARLIMEN

PARLIAMENTARY DEBATES

DEWAN NEGARA
Senate

PARLIMEN KETUJUH
Seventh Parliament

PENGGAL KEDUA
Second Session

KANDUNGANNYA

MENGANGKAT SUMPAH:

Y.B. Tuan Hassan bin Harun	}	[Ruangan 13]
Y.B. Tuan Haji Mohd. Noor bin Haji Abdullah		

PEMASYHURAN TUAN YANG DI-PERTUA:

Titah Ucapan D.Y.M.M. Seri Paduka Baginda Yang di-Pertuan Agong
[Ruangan 13]

Mengangkat Sumpah (di luar Dewan)—

Y.B. Pandikar Amin bin Haji Mulia	}	[Ruangan 30]
Y.B. Dr Chong Eng Leong		

Mengalu-alukan Ahli-ahli Baru [Ruangan 30]

Memperkenalkan Akta-akta [Ruangan 31]

Perutusan daripada Dewan Rakyat [Ruangan 32]

URUSAN MESYUARAT [Ruangan 33]

JAWAPAN-JAWAPAN MULUT BAGI PERTANYAAN-PERTANYAAN
[Ruangan 34]

KANDUNGANNYA—(samb.)

USUL-USUL:

Jalan-jalan Masuk ke Parlimen [Ruangan 110]

Jawatankuasa Pemilih—Lantikan Ahli-ahli [Ruangan 111]

**Ucapan Terima Kasih kepada D.Y.M.M. Seri Paduka Baginda Yang di-Pertuan
Agong—Y.B. Tuan Haji Abu Bakar bin Lajim [Ruangan 113]**

MALAYSIA

PARLIMEN KETUJUH—DEWAN NEGARA

Penyata Rasmi Parlimen

PENGGAL YANG KEDUA

AHLI-AHLI DEWAN NEGARA

Yang Berhormat Tuan Yang di-Pertua, TAN SRI DATUK BENEDICT STEPHENS,
P.S.M., S.P.D.K., B.E.M. (Dilantik).

„ Timbalan Yang di-Pertua, DATUK ABANG HAJI AHMAD URAI BIN
DATUK HAKIM ABANG HAJI MOHIDDEEN, P.N.B.S., J.B.S., A.M.N.,
A.B.S. (Sarawak).

„ Timbalan Menteri Perumahan dan Kerajaan Tempatan, TUAN
HAJI HUSSEIN BIN AHMAD (Dilantik).

„ Timbalan Menteri Kewangan, TUAN MOHAMED FARID BIN
ARIFFIN (Dilantik).

„ LT. KOL. (B) ABDUL HAMID BIN IBRAHIM, S.M.S., K.M.N., P.I.S.
(Dilantik).

„ TUAN HAJI ABDUL HAMID BIN HAJI LATIF (Dilantik).

„ TUAN HAJI ABDUL MAJID BIN HAJI ABDULLAH (Johor).

„ TUAN HAJI ABDUL MANAP BIN HASHIM (Kedah).

„ TUAN HAJI ABU BAKAR BIN LAJIM, K.M.N. (Dilantik).

„ PUAN AINON BINTI ARIFFIN (Dilantik—Wilayah Persekutuan).

„ PUAN HAJJAH AZIZAH BINTI HAJI MOHD. SAID, P.J.K. (Dilantik).

„ TUAN AZMAN ATAR BIN OTHMAN (Dilantik).

„ TUAN AZUMU BIN TAK (Perak).

„ TUAN BEE YANG SEK (Kedah).

„ TUAN CHAN CHOONG TAK (Dilantik).

„ DR CHONG ENG LEONG (Sabah).

„ TUAN DAHALAN BIN HAJI EMBUN (Perlis).

„ TUAN DOUGLAS SULLANG ANAK GANDAR (Sarawak).

„ TUAN FOO BOON LIANG (Pahang Darulmakmur).

„ PUAN HABIDAH BINTI JUSOH *alias* YUSOF (Terengganu).

„ TUAN HAJI HAMID ARABY BIN HAJI MD. SALIH (Pulau Pinang).

„ TUAN HASSAN BIN HARUN (Kelantan).

„ TUAN HASSAN BIN NAM, P.P.N., P.J.K. (Dilantik).

Yang Berhormat TUAN HAJI IBRAHIM BIN HAJI UJANG, P.P.N., P.J.K. (Negeri Sembilan).

- „ TUAN HAJI JAAFAR BIN HARON (Dilantik).
- „ TUAN R. M. JASNI, B.K., (Dilantik).
- „ TUAN KOH IM PIN (Negeri Sembilan).
- „ TUAN G. KRISHNAN (Dilantik).
- „ TUAN LAU KENG SIONG *alias* JOSEPH LAU KENG SEONG, K.M.N., A.M.N., P.I.S. (Johor).
- „ PUAN LAW JACK YOON (Dilantik).
- „ TUAN LIM HENG TEE (Pulau Pinang).
- „ DATO MAK HON KAM, D.P.M.P., J.M.N. (Dilantik).
- „ PUAN MAZIDAH HAJI ZAKARIA (Dilantik).
- „ TUAN HAJI MOHD. NOOR BIN HAJI ABDULLAH (Kelantan).
- „ TUAN MOHD. NOOR BIN BEDAH, P.J.K., P.J.B. (Perlis).
- „ TUAN MOHD. WAJDI BIN DATO' HAJI ISHAK (Dilantik).
- „ TUAN MUSTAFA BIN AWANG (Terengganu).
- „ DATUK HAJI NASIR BIN HAJI MANAP, D.M.S.M., D.S.M., A.M.N., P.J.K. (Melaka).
- „ DR NG KHEK KIUNG (Selangor Darul Ehsan).
- „ TUAN NG PENG HAY (Melaka).
- „ DATO DR K. S. NUHAR, S.P.M.J., J.M.N. (Dilantik).
- „ CIK NORANI BINTI HAJI BELUAH *alias* HAJI HITAM (Pahang Darulmakmur).
- „ DR NORDIN SELAT (Dilantik).
- „ TUAN PANDIKAR AMIN BIN HAJI MULIA (Sabah).
- „ TUAN PARAMJIT SINGH (Dilantik).
- „ TUAN G. RAJOO (Dilantik).
- „ PUAN HAJJAH ROGAYAH BINTI CHE MAT (Dilantik).
- „ PUAN ROKIAH *alias* MAIMUN BINTI ZAINUDDIN, A.M.N., P.J.K. (Dilantik).
- „ PUAN HAJJAH ROSNAH BINTI HAJI MOHD. SALLEH (Dilantik).
- „ PUAN HAJJAH SALBIAH BINTI MOHD. AKIM (Dilantik).
- „ Tuan M. Sangaralingam (Dilantik).
- „ TUAN HAJI SHAHAROM BIN HAJI MAASOM, A.M.N., P.J.K. (Dilantik).
- „ TUAN STEPHEN TIMOTHY WAN ULLOK (Dilantik).

Yang Berhormat **TUAN HAJI SYED ABDUL HAMID BIN SAGAFF** (Dilantik).

- „ **TUAN TAN CHAI HO, A.M.N.** (Dilantik—Wilayah Persekutuan).
- „ **DR TAN CHONG KENG** (Dilantik).
- „ **DATO TAN PENG KHOON, S.P.M.J., S.S.I.J., J.M.N.** (Dilantik).
- „ **TUAN TIONG HIEW KING, P.B.S.** (Dilantik).
- „ **PUAN VALLI MUTHUSAMY** (Dilantik).
- „ **TUAN WONG KIE YIK** (Dilantik).
- „ **DATO' HAJI ZAKARIA BIN HAJI YAHAYA, D.P.M.S., K.M.N., S.M.S., P.J.K., P.P.N.** (Selangor Darul Ehsan).

DEWAN NEGARA

PEGAWAI-PEGAWAI KANAN

Setiausaha Dewan Negara: Haji Abdul Rahim bin Haji Abu Bakar, J.S.D., S.A.P.,
K.M.N., P.B.S., P.J.K.

Ketua Penolong Setiausaha: Haji Mohd. Salleh bin Abu Bakar.

Penolong Setiausaha: Ghazali bin Haji Abdul Hamid, A.M.N.

Penolong Setiausaha: Abdullah bin Abdul Wahab.

BAHAGIAN PENYATA RASMI PARLIMEN

Ketua Penyunting: Haji Yahya Manap.

Penyunting Kanan: P. B. Menon.

Penyunting Kanan: Haji Osman bin Sidik.

Penolong Penyunting: N. Ramaswamy.

Penolong Penyunting: Amran bin Ahmad.

Pelapor Perbahasan Parlimen:

Suher bin Husin.

Mohd. Saleh bin Mohd. Yusof.

Hajjah Juliah binti Awam.

Supiah binti Dewak.

Ismail bin Hassan.

Shamsiah binti Mohd. Yusof.

Hajjah Kalsom binti Ghazali.

Mohamed bin Osman.

Norishah binti Mohd. Thani.

Zaharah binti Naim.

BENTARA MESYUARAT

Mejar (B) Haji Ahmad bin Buntu, A.M.N., B.S.D., P.J.K.

MALAYSIA

DEWAN NEGARA

 Isnin, 28hb Mac, 1988

Mesyuarat dimulakan pada pukul 2.30 petang

DOA

(Tuan Yang di-Pertua *mempengerusikan Mesyuarat*)

MENGANGKAT SUMPAH

Ahli-ahli Yang Berhormat yang tersebut di bawah ini telah mengangkat Sumpah seperti yang disebutkan dalam Perlembagaan:

Tuan Hassan bin Harun. (*Tepuk*)

Tuan Haji Mohd. Noor bin Haji Abdulah. (*Tepuk*)

PEMASYHURAN TUAN YANG DI-PERTUA

Titah Ucapan D.Y.M.M. Seri Paduka Baginda
Yang di-Pertuan Agong

Tuan Yang di-Pertua: Ahli-ahli Yang Berhormat, dengan sukacitanya saya memaklumkan kepada Majlis ini iaitu pada pagi 7hb Mac, 1988 Duli Yang Maha Mulia Seri Paduka Baginda Yang di-Pertuan Agong dengan limpah kurnia Baginda telah berkenan menyampaikan Titah Ucapan Diraja dalam Parlimen.

Saya telah menerima salinan Titah Ucapan Duli Yang Maha Mulia itu dan sekarang saya mengarahkan supaya salinan Titah Ucapan itu dibentangkan di atas Meja Mesyuarat dan seterusnya dicetak dalam Penyata Rasmi Parlimen.

**TITAH DULI YANG MAHA MULIA SERI PADUKA
BAGINDA YANG DI-PERTUAN AGONG**

Assalaamu Alaikum Warahmatullaahi Wabarakaatuh.

Bismillaahir Rahmaanir Rahlilim,

**Alhamdulillaahi Rabbil Alamiin, Wassolaamu Alaa Salyidinaa
Muhammadin Asyrafil Ambiyaa i Walmursalin Wa Ala Aalihi Wasohbihi
Ajmaiin.**

**Yang di-Pertua Dewan Negara, Yang di-Pertua Dewan Rakyat, Ahli-ahli Dewan
Negara dan Ahli-ahli Dewan Rakyat sekalian.**

Alhamdulillah, syukur Kita kehadiran Allah Subhanahu Wata Aala, kerana dengan limpah kurnia dan izinNya dapat Kita bersama-sama di Majlis Perasmian Penggal Kedua, Parlimen Ketujuh pada hari ini.

Dengan izin Allah, sejak merdeka negara kita terus aman dan berjaya mengekalkan sistem demokrasi berparlimen, sekalipun menghadapi berbagai-bagai cabaran. Ini semua adalah berkat bakti dan pengorbanan para pemimpin dan pejuang kemerdekaan yang mempunyai semangat kesetiaan dan cintakan negara mengatasi kepentingan peribadi, ianya telah berjaya membina asas-asas perpaduan rakyat berdasarkan sikap toleransi dan saling hormat menghormati sehingga kedaulatan negara dapat dipertahankan dan kemajuan dapat dicapai. Semangat inilah yang perlu kita kekalkan supaya kemajuan negara dapat dipertingkatkan lagi.

Ahli-ahli Yang Berhormat,

Perpaduan merupakan asas bagi kekuatan negara yang mempunyai penduduk berbilang kaum dan agama. Sekiranya perpaduan tidak wujud, keamanan, kestabilan dan kemakmuran yang telah kita bina selama ini akan musnah. Dalam hubungan ini, peristiwa tahun lepas patut dijadikan pengajaran kepada kita semua. Oleh itu suka Kita mengingatkan semua pihak, terutama parti-parti politik, pertubuhan-pertubuhan dan akhbar-akhbar, supaya bersikap bertanggungjawab dan sederhana dalam semua tindakan dan kenyataan mereka semoga tidak menjejaskan perpaduan negara.

Sekalipun keselamatan negara pada keseluruhannya adalah baik, tetapi kita semua mestilah terus berwaspada terhadap saki-baki anasir-anasir komunis dan golongan anti nasional yang sentiasa mempergunakan sebarang isu bagi mencari pengaruh dan menjejaskan keselamatan negara.

Untuk mencapai perpaduan negara, Kerajaan hendaklah terus melaksanakan program-program mempertingkatkan perpaduan antara kaum supaya matlamat perpaduan nasional tercapai, khususnya memperhebat usaha menanamkan semangat cintakan Bahasa Malaysia di kalangan rakyat.

Ahli-ahli Yang Berhormat,

Pembangunan ekonomi adalah sangat penting dalam sesebuah negara, ianya tidak akan wujud jika sekiranya kestabilan politik tergugat dan mengancam kegiatan-kegiatan hidup kita. Sebagai rakyat yang cintakan keamanan, kita bertanggungjawab memastikan supaya tidak ada dilakukan sebarang tindakan, sama ada secara berkumpulan atau individu, yang boleh mengancam kestabilan politik yang berterusan dalam negara.

Alhamdulillah, kedudukan ekonomi negara dalam tahun 1987 telah berunsur pulih. Keluaran kasar dalam negara telah meningkat dengan kadar 4.7% dan besar kemungkinan tahap pertumbuhan ekonomi negara melebihi 4% pada tahun 1988 ini. Kedudukan ekonomi yang lebih mantap ini adalah didorong oleh harga komoditi yang kukuh dan prestasi eksport yang menggalakkan. Perkembangan ini secara langsung telah memperbaiki pendapatan negara dan buat pertama kalinya dalam tempoh tujuh tahun, negara telah berjaya mencatatkan lebihan dalam imbalan pembayaran.

Kita hendaklah sentiasa berwaspada tentang perkembangan di persekitaran kita dan mengambil langkah penyesuaian yang sesuai untuk mengukuhkan kedudukan ekonomi negara, kerana pertumbuhan ekonomi yang menggalakkan ini berpunca dari faktor-faktor di luar kawalan kita. Eksport umpamanya, bergantung kepada prestasi ekonomi negara-negara perindustrian yang kini masih belum meyakinkan, dan aliran harga komoditi terutamanya harga petroleum adalah masih tidak menentu.

Sekalipun ekonomi negara telah beransur baik, Kerajaan masih lagi menghadapi defisit akaun semasa yang perlu diatasi dengan segera. Oleh itu, usaha-usaha untuk mempertingkatkan hasil Kerajaan dan penjimatan perbelanjaan hendaklah diteruskan.

Ahli-ahli Yang Berhormat,

Usaha-usaha dan program-program penyelidikan dan pembangunan bagi mempertingkatkan lagi produktiviti, mutu dan kos pengeluaran barangan negara terutama barangan eksport hendaklah sentiasa ditingkatkan dari semasa ke semasa.

Untuk memulihkan pertumbuhan ekonomi negara, suka Kita mengingatkan pihak swasta supaya sama-sama memainkan peranan utama. Kerana Kerajaan telah pun mengambil berbagai langkah untuk memperbaiki iklim pelaburan negara, seperti memudahkan perkembangan pelaburan, menyediakan berbagai insentif dan mengadakan perkhidmatan setempat untuk membantu pelabur-pelabur mendapat kelulusan dengan cepat. Di bidang industri kecil pula, Kerajaan hendaklah berusaha menyediakan persekitaran dan suasana yang lebih baik bagi mewujudkan pertalian dengan industri-industri besar.

Industri pelancongan yang berkembang semenjak beberapa tahun ini telah menjadi sumber pendapatan tukaran wang asing yang penting dan punca pertumbuhan ekonomi, juga mewujudkan peluang-peluang pekerjaan bagi rakyat. Industri pelancongan telah diberi penekanan oleh Kerajaan sebagai salah satu industri utama. Oleh itu, kerjasama semua pihak adalah sangat penting bagi memajukan industri ini.

Usaha-usaha untuk mempergiatkan lagi penyertaan rakyat dalam aktiviti ekonomi sesuai dengan matlamat Dasar Ekonomi Baru hendaklah diteruskan. Di bidang pertanian, tumpuan hendaklah terus diberi kepada pengeluaran bahan-bahan makanan tempatan khususnya buah-buahan, sayur-sayuran, ternakan dan perikanan bagi meningkatkan penggunaannya oleh rakyat dan mengurangkan import. Di samping itu penekanan hendaklah dilakukan kepada perubahan sikap untuk melahirkan masyarakat yang jujur, berbudaya niaga, bersemangat usahawan dan cintakan negara.

Ahli-ahli Yang Berhormat,

Ke arah mempertingkatkan taraf hidup rakyat, Kerajaan mestilah terus memberi tumpuan kepada usaha-usaha menambah kemudahan-kemudahan asas seperti bekalan air paip, elektrik, jalan raya serta telefon. Keperluan sukan juga hendaklah diberi perhatian selaras dengan Dasar Sukan Negara yang telah digubal untuk memajukan prestasi dan penyertaan sukan di peringkat kebangsaan dan antarabangsa.

Di bidang kesihatan, Kerajaan hendaklah terus melaksanakan program-program untuk meningkatkan lagi taraf kesihatan rakyat melalui aktiviti-aktiviti pencegahan dan pengawalan yang lebih berkesan.

Di bidang pendidikan, penekanan mestilah diberi kepada konsep pendidikan bersepadu untuk memenuhi keperluan negara sekarang dan masa akan datang. Usaha-usaha hendaklah diteruskan untuk mempertingkatkan mutu dan memperluaskan peluang pendidikan, dengan pelaksanaan Kurikulum Bersepadu Sekolah Menengah (KBSM) mulai tahun ini. Tumpuan hendaklah diberi kepada usaha-usaha meningkatkan penguasaan Bahasa Malaysia sebagai bahasa ilmu dan bahasa perhubungan melalui kaedah penggunaan bahasa baku. Selaras dengan itu juga tahun ini diisytiharkan sebagai Tahun Pembaca di kalangan masyarakat.

Ahli-ahli Yang Berhormat,

Kerajaan dan rakyat sekalian adalah bertanggungjawab memupuk unsur-unsur akhlak yang tinggi di kalangan masyarakat. Penyelewengan, pecah amanah dan rasuah semasa menjalankan tugas, sama ada di kalangan Koperasi, Syarikat-syarikat dan kakitangan Kerajaan hendaklah dihapuskan sama sekali.

Media massa mestilah memainkan peranan memberikan kefahaman dan pengajaran kepada masyarakat mengenai nilai-nilai moral yang sihat, kerana usaha-usaha Kerajaan untuk menerapkan nilai-nilai Islam dalam perkhidmatan awam adalah merupakan satu pendekatan berkesan ke arah mencapai perkhidmatan yang bersih, cekap dan amanah.

Ahli-ahli Yang Berhormat,

Ancaman dadah dari segi penagihan masih merupakan satu masalah yang besar kepada negara. Oleh itu Kerajaan mestilah sentiasa mengambil langkah-langkah mencegah penyeludupan, pengedaran dan penagihan dadah. Dalam usaha ini Kerajaan hendaklah memperketatkan undang-undang supaya harta yang didapati oleh pengedar dadah boleh dirampas oleh Kerajaan.

Malaysia telah dilantik menjadi Pengerusi Persidangan Antarabangsa Mengenai Penagihan dan Pengedaran Dadah. Perlantikan tersebut merupakan pengiktirafan masyarakat antarabangsa terhadap usaha bersungguh-sungguh Kerajaan untuk memerangi penagihan dan pengedaran dadah. Oleh itu, pengiktirafan tersebut mestilah terus dijaga dan usaha pencegahan terus ditingkatkan lagi.

Ahli-ahli Yang Berhormat,

Di dalam pelaksanaan dasar luar, penekanan hendaklah terus diberi kepada aktiviti-aktiviti perdagangan, pelancongan dan pelaburan di perwakilan-perwakilan Malaysia di luar negeri.

Kerajaan hendaklah meneruskan dasar luarnya yang mengutamakan perhubungan dengan negara-negara ASEAN dalam hubungan kerjasama serantau. Sidang Kemuncak Ketua-ketua Negara ASEAN yang Ketiga di Manila melambangkan kejayaan pertubuhan itu selama 20 tahun dalam berbagai bidang kerjasama. Usaha-usaha untuk meningkatkan lagi kerjasama ekonomi hendaklah diberi perhatian pada masa hadapan.

Demi menjamin kepentingan negara, Kerajaan hendaklah menumpukan perhatian kepada penyertaan negara di dalam berbagai pertubuhan antarabangsa termasuk Pertubuhan Bangsa-bangsa Bersatu, Pertubuhan Persidangan Islam, Pergerakan Negara-negara Berkecuali dan Pertubuhan Komanwel. Mengenai masalah Kampuchea, Kerajaan hendaklah terus bekerjasama dengan negara-negara anggota ASEAN yang lain untuk mencari penyelesaian politik terhadap masalah itu.

Mengenai isu Palestin, Malaysia hendaklah menyokong penuh supaya rakyat Palestin diberi kebebasan untuk menentukan masa depan mereka. Ini adalah sesuai dengan peruntukan piagam Bangsa-bangsa Bersatu. Kita juga hendaklah menyokong penuh perjuangan rakyat Palestin untuk mengembalikan hak mutlak mereka di bumi Palestin, antaranya dengan menubuhkan Tabung Rakyat Palestin.

Ahli-ahli Yang Berhormat,

Dalam negara kita sedang menempuh berbagai cabaran, Kita berkeyakinan penuh di atas kepimpinan Dato' Seri Dr Mahathir bin Mohamad, Perdana Menteri Malaysia. Oleh itu suka Kita menyeru kepada seluruh rakyat sekalian supaya memberi sokongan yang tidak berbelah bahagi kepada kepimpinan beliau.

Suka kita mengingatkan rakyat sekalian supaya terus mempertingkatkan prestasi dan produktiviti dalam menjalankan tugas masing-masing semoga negara bertambah maju dan makmur. Seterusnya kita mestilah sentiasa bersyukur kepada Allah di atas segala rahmat dan nikmatNya yang telah kita capai dan nikmati selama ini.

Bersempena majlis ini suka Kita mengucapkan setinggi-tinggi penghargaan kepada pasukan keselamatan yang telah berkorban mempertahankan dan memelihara keamanan negara dan kepada semua kakitangan awam dan rakyat sekalian yang telah memberikan perkhidmatan dan sumbangan ke arah kemajuan negara.

Akhirnya, suka Kita mengingatkan Ahli-ahli Dewan Negara dan Ahli-ahli Dewan Rakyat supaya dapat menjalankan tugas dengan penuh disiplin dan tanggungjawab demi kepentingan agama, bangsa dan negara. Kita berdoa semoga Allah memberi taufiq dan hidayah kepada semua Ahli-ahli Yang Berhormat dalam menjalankan tugas yang diamanahkan oleh rakyat.

**Wabillaahi Taufik Walhidayah,
Wassalaamu Alaikum Warahmatullaahi Wabarakaatuh.**

The translation is as follows:

Assalaamu Alaikum Warahmatullaahi Wabarakaatuh.

In the name of Allah, the Most Beneficent, the Most Merciful.

Praise be to Allah, Lord of the Universe and may His Blessings and Peace be upon our Prophet Muhammad, his family and his companions.

Mr President, Mr Speaker, Honourable Members of Dewan Negara and Honourable Members of Dewan Rakyat.

I thank Allah, The Almighty, for His blessings in enabling me to address this House in conjunction with the Official Opening of the Second Session of the Seventh Parliament today.

With the grace of Allah, since independence our nation has continued to be peaceful and has managed to uphold our parliamentary democratic system although we have to face various challenges. This has been realised as a result of the deeds and sacrifices of our independence fighters and leaders whose spirit of loyalty and love for the country was above personal interest. It has succeeded in building the foundation for unity based on tolerance and mutual respect to the extent that the sovereignty of our nation has been maintained and progress achieved. It is this spirit that we should preserve and inculcate so that national development could be further enhanced.

Honourable Members,

Unity is the basis for creating a strong nation that is multi-racial and multi-religious. If unity does not exist then peace, stability and prosperity which we have achieved so far will be destroyed. In this respect, the 1987 experience should be a lesson for all of us. Therefore, I would like to remind all concerned especially political parties, societies and the media to be responsible and moderate in their actions and statements so as not to jeopardise our national unity.

Even if our national security on the whole is good, all of us must continue to be vigilant towards the remnants of communist and anti-national elements who will always exploit any issue to obtain support and jeopardise our national security.

To achieve national unity, the government should continue implementing programmes directed at improving unity among the peoples and in particular, the enhancement of efforts to inculcate love for Bahasa Malaysia.

Honourable Members,

Economic development is imperative to a nation. It will not exist if our political situation is unstable and threatens our livelihood. As a peace loving people it is our responsibility to ensure that nothing is done by groups or individuals to threaten the political stability of the nation.

Praise be to Allah, the economy of our country recovered well in 1987. The Gross Domestic Product (GDP) has increased by 4.7% and it is highly possible that the economic growth will exceed 4% this year. This improved performance is due to higher commodity prices and better exports. This development has directly improved the nation's income and for the first time in 7 years we managed to have excess in the balance of payments.

However, we should always be sensitive to developments around us and make appropriate adjustments to strengthen the nation's economy as this encouraging performance of the economy is due to external factors. For instance, our exports are dependent on the economic performance of the industrial countries which is uncertain and the trend of commodity prices especially that of petroleum is still unstable.

Although the economy has improved, the government still faces deficits in the Budget's current account which needs to be addressed immediately. Therefore, efforts to increase revenue and control expenditure should be continued.

Honourable Members,

Efforts and programmes on research and development must be further emphasised to increase productivity, quality and to reduce production costs of our products especially those for export.

In our efforts to improve economic growth, I would like to remind the private sector to play their role. The government has taken various steps to improve the investment climate for instance by facilitating investment and by providing various incentives and in-situ services to assist investors in obtaining immediate approval. For the small scale industries, the government should endeavour to create a better condition and environment which could provide linkages with major industries.

The tourism industry which has developed of late has been an important source of foreign exchange and economic growth. It also provides employment opportunities for the people. The tourism industry has been given emphasis by the Government as one of the main industries. Therefore, cooperation from all quarters is important in developing this industry.

Efforts to increase participation by the people in economic activities in line with the objectives of the New Economic Policy should be continued. In the agriculture sector, focus should be on the production of food products locally in particular, fruits, vegetables, livestock and fisheries. In addition, emphasis should be placed on change of attitude to create a society of people who are sincere, entrepreneurial and loyal to the nation.

Honourable Members,

To elevate the quality of life of the people, the Government should continue to provide basic amenities such as piped water, electricity, roads and telephone. Attention should also be given to the promotion of sports in line with the National Sports Policy that has been formulated to improve performance and participation in sports at both the national and international levels.

In the health sector, the Government should continue to implement programmes to further enhance the level of health of the people through preventive activities more effectively.

In the education sector, emphasis should be given to the concept of integrated education to fulfill the present and future needs of the country. Efforts should be continued to improve the quality and to widen educational opportunities with the implementations of the Secondary School Integrated Curriculum beginning this year. Focus should be placed on improving the proficiency of Bahasa Malaysia as a language for knowledge and as a medium of communication through the use of standard Bahasa Malaysia. In addition, this year has been declared the Readers' Year.

Honourable Members,

The Government and the people are responsible to cultivate high moral values. Misappropriation, breach of trust and corruption in discharging duties among co-operatives, companies and government employees must be eliminated.

The mass media must continue to play a role in educating the society on moral values as the effort of the government to inculcate Islamic values in the public service is an effective approach to bring about a clean, efficient and trustworthy service.

Honourable Members,

The threat of "dadah" in the form of "dadah" abuse is still one of the major problems faced by the country. The Government must always take steps to combat "dadah" smuggling, trafficking and abuse. In this effort the Government must tighten the law so that properties acquired by "dadah" traffickers can be confiscated by the Government.

Malaysia has been appointed as the Chairman of the International Conference on Drug Abuse and Trafficking. This appointment is a recognition by the international society for our dedicated efforts in combating this "dadah" abuse and trafficking. This recognition therefore must be preserved and preventive measures must be continuously stepped-up.

Honourable Members,

In the implementation of the nation's foreign policy, emphasis should continue to be given to commercial, tourist and investment activities by Malaysian missions overseas.

The Government should continue with its policy of placing priority on its relations with the other Asean member states in the context of regional cooperation. The Third Asean Summit of Heads of Government held in Manila reflects the success of twenty years of cooperation in various fields. Efforts to further increase economic cooperation must be given emphasis in future.

In protecting the interests of the nation, the Government will intensify Malaysia's involvement in the work and activities of international organisations including the

United Nations, the Organisation of Islamic Conference, the Non-Aligned Movement and the Commonwealth. On the problem of Kampuchea, the Government must continue its cooperation with other Asean member states to seek a political solution to the problem.

On the Palestinian issue, Malaysia fully supports the rights of the Palestinians to determine their own future. This is in accordance with the provisions of the UN Charter. We should also fully support the Palestinian struggle to restore their inalienable rights in Palestine and among others through the establishment of the Palestine Fund.

Honourable Members,

Although at present we are facing several challenges, I am confident of the leadership of Dato' Seri Dr Mahathir bin Mohamad, the Prime Minister. I therefore would like to call upon all the people to give undivided support to his leadership.

I would like to remind all Malaysians to continuously increase performance and productivity in discharging their respective duties so that the nation will continue to progress and prosper. We must also be thankful to Allah for His blessings.

On this occasion, I would like to express my highest appreciation to the security forces for their sacrifices in defending and safeguarding the security of the nation and the members of the Civil Service and all Malaysians for the services and contributions to the progress of the nation.

Finally, I would like to remind the members of the Dewan Negara and the Dewan Rakyat to carry out their duties with discipline and responsibility in the interest of religion, nation and country. I pray that Allah bestows upon all Honourable Members, taufiq and hidayah, in the performance of your duties entrusted by the people.

*Wabillaahi Taufiq Walhidaayah,
Wassalaamu Alaikum Warahmatullaahi Wabarakaatuh.*

MENGANGKAT SUMPAH (DI LUAR DEWAN)

Tuan Yang di-Pertua: Ahli-ahli Yang Berhormat, mengikut peruntukan Peraturan Majlis Mesyuarat 4 (3), saya dengan ini memberitahu Dewan iaitu Ahli-ahli Yang Berhormat yang berikut telah mengangkat Sumpah di hadapan saya pada tarikh yang dinyatakan mengikut

kehendak Jadual Keenam dalam Perlembagaan:

7hb Mac, 1988

Pandikar Amin bin Haji Mulia
Dr Chong Eng Leong

MENGALU-ALUKAN AHLI-AHLI BARU

Tuan Yang di-Pertua: Ahli-ahli Yang Berhormat, saya mengucapkan

selamat datang dan tahniah kepada Ahli-ahli Yang Berhormat yang baru mengangkat Sumpah sebentar tadi dan Ahli-ahli Yang Berhormat yang telah mengangkat Sumpah di hadapan saya pada tarikh yang dinyatakan tadi. Saya berharap semoga Ahli-ahli yang baru dipilih itu dapat memberikan sumbangan yang berguna dan berfaedah kepada Dewan ini dan kepada negara seterusnya dan semoga mereka dapat berkhidmat dengan cemerlangnya.

MEMPERKENANKAN AKTA-AKTA

Tuan Yang di-Pertua: Ahli-ahli Yang Berhormat, saya suka hendak memberitahu iaitu Duli Yang Maha Mulia Seri Paduka Baginda Yang di-Pertuan Agong dengan limpah kurnia Baginda telah berkenan mempersetujukan Akta-akta yang telah diluluskan dalam Parlimen yang lalu seperti berikut:

1. Akta Perbekalan 1988;
2. Akta Kewangan 1987;
3. Akta Bank Negara Malaysia (Pindaan) 1987;
4. Akta Mesin Cetak dan Penerbitan (Pindaan) 1987;
5. Akta Polis (Pindaan) 1987;
6. Akta Penyiaran 1988;
7. Akta Kumpulan Wang Amanah Negara 1988;
8. Akta Arkitek (Pindaan) 1988;
9. Akta Tribunal Perkhidmatan Awam (Pindaan);
10. Akta Pemberipinjam Wang (Pindaan) 1988;
11. Akta Pemberipinjam Wang (Sabah) (Pindaan) 1988;
12. Akta Pemberipinjam Wang (Sarawak) (Pindaan) 1988;
13. Akta Peguambela (Sabah) (Pindaan) 1988;

14. Akta Peguambela (Sarawak) (Pindaan) 1988;
15. Akta Perindustrian Nanas (Pindaan) 1988;
16. Akta Persatuan Nelayan (Pindaan) 1988;
17. Akta Racun (Pindaan) 1988;
18. Akta Perbendaharaan (Tempatan) (Pindaan) 1988; dan
19. Akta Perlindungan Hidupan Liar (Pindaan) 1988.

PERUTUSAN DARIPADA DEWAN RAKYAT

Tuan Yang di-Pertua: Ahli-ahli Yang Berhormat, saya telah menerima satu Perutusan daripada Dewan Rakyat yang meminta Dewan Negara mempersetujukan Rang Undang-undang yang telah diluluskan oleh Dewan tersebut.

Saya jemput Setiausaha membacakan Perutusan itu sekarang.

(Setiausaha membacakan Perutusan)
"25hb Mac, 1988

Tuan Yang di-Pertua Dewan Negara,

Dewan Rakyat telah meluluskan Rang Undang-undang yang berikut dan meminta Dewan Negara mempersetujukannya:

1. Rang Undang-undang Perbekalan Tambahan (1987);
2. Rang Undang-undang (Pembagian) Pusaka Kecil (Pindaan);
3. Rang Undang-undang Lembaga Tembakau Negara (Perbadanan) (Pindaan);
4. Rang Undang-undang Perlembagaan (Pindaan);
5. Rang Undang-undang Pertubuhan (Pindaan);
6. Rang Undang-undang Dadah Berbahaya (Perlucutan Harta);

7. Rang Undang-undang Perkhidmatan Bomba;
8. Rang Undang-undang Bank Negara Malaysia; Insurans dan Takaful (Pindaan); dan
9. Rang Undang-undang Pemaju Perumahan (Kawalan dan Pelesenan) (Pindaan).

Yang ikhlas,
t.t.

YANG DI-PERTUA DEWAN
RAKYAT."

URUSAN MESYUARAT

Menteri di Jabatan Perdana Menteri (Dato' Dr Mohamad Yusof bin Haji Mohamed Nor): Tuan Yang di-Pertua, saya akan mencadangkan supaya Rang Undang-undang yang tersebut di dalam Perutusan itu dibacakan kali yang kedua dan ketiganya di mesyuarat ini:

1. Rang Undang-undang Perbe-
kalan Tambahan (1987);
2. Rang Undang-undang (Pembahagian) Pusaka Kecil (Pindaan);
3. Rang Undang-undang Lembaga
Tembakau Negara (Perbadanan)
(Pindaan);
4. Rang Undang-undang Perlem-
bagaan (Pindaan);
5. Rang Undang-undang Pertu-
buan (Pindaan);
6. Rang Undang-undang Berba-
haya (Perlucuthakan Harta);
7. Rang Undang-undang Per-
khidmatan Bomba;
8. Rang Undang-undang Bank
Negara Malaysia; Insurans dan
Takaful (Pindaan); dan
9. Rang Undang-undang Pemaju
Perumahan (Kawalan dan
Pelesenan) (Pindaan).

Tuan Yang di-Pertua: Baiklah.

JAWAPAN-JAWAPAN MULUT BAGI PERTANYAAN- PERTANYAAN

AHLI-AHLI PERPUSTAKAAN NEGARA

1. Tuan Azumu bin Haji Tak minta Menteri Kebudayaan dan Pelancongan menyatakan:

- (i) jumlah ahli-ahli Perpustakaan Negara mengikut kategori:
 - (a) Ahli-ahli Dewasa;
 - (b) Penuntut-penuntut;
- (ii) mengikut hitung panjang, berapakah jumlah buku dipinjam pada tiap-tiap bulan; dan
- (iii) adakah ahli-ahli yang merosakkan buku-buku tersebut.

Setiausaha Parlimen Kementerian Kebudayaan dan Pelancongan (Tuan Abdul Raman bin Suliman): Tuan Yang di-Pertua, jumlah ahli-ahli berdaftar mengikut kategori adalah seperti berikut:

(i) (a) Ahli-ahli dewasa	1,108 orang
(b) Ahli kanak-kanak	46,938 orang
Jumlah ..	148,046 orang

Daripada jumlah ini, lebih kurang 60% adalah penuntut-penuntut.

- (ii) jumlah buku-buku yang dipinjam tiap-tiap bulan secara purata adalah 39,500 naskah buku.
- (iii) memang terdapat segelintir ahli-ahli Perpustakaan yang merosakkan buku-buku yang dipinjam. Mereka yang dikenalpasti, dikenakan denda mengikut harga buku yang dipinjam.

Puan Law Jack Yoon: Tuan Yang di-Pertua, soalan tambahan. Selain

daripada meminjamkan buku-buku, adakah program-program lain untuk menggalakkan lebih ramai orang, terutama pelajar-pelajar menggunakan kemudahan-kemudahan Perpustakaan Negara dan membaca, sempena Tahun Membaca?

Tuan Abdul Raman bin Suliman: Tuan Yang di-Pertua, memang benar terdapat langkah-langkah lain yang diambil oleh Perpustakaan Negara bagi menggalakkan peminat-peminat serta orang ramai untuk membaca buku. Umpamanya, pihak Perpustakaan Negara juga telah mengadakan cawangan-cawangan seperti di Gombak, Sentul, Bandar Tun Razak dan Labuan. Selain daripada itu, Perpustakaan Negara mengadakan pusat-pusat kelompok dan melalui bas bergerak di sekeliling Wilayah Persekutuan dan juga menggalakkan ahli-ahli sekiranya mereka mahu meminjam melalui pos.

LAWATAN PERDANA MENTERI KE THAILAND DAN BURMA

2. Tuan Haji Jaafar bin Haron minta Menteri Luar Negeri menjelaskan apakah prestasi yang dicapai tentang hubungan dua hala dalam lawatan Perdana Menteri ke Thailand dan Burma baru-baru ini, dalam lapangan politik, perdagangan, ekonomi dan sosial.

Timbalan Menteri Luar Negeri (Toh Muda Dr Abdullah bin Che' Wan): Tuan Yang di-Pertua, lawatan Yang Amat Berhormat Perdana Menteri ke Thailand dan Burma baru-baru ini adalah berjaya dalam konteks meningkatkan hubungan kerjasama dua hala dan hubungan peribadi di antara Yang Amat Berhormat Perdana Menteri dengan pemimpin-pemimpin di kedua-dua buah negara. Lawatan tersebut juga telah memberi peluang kepada Yang Amat Berhormat Perdana Menteri

mengadakan perbincangan dengan Perdana Menteri Thailand dan di Burma pula merupakan lawatan Yang Amat Berhormat yang pertama dalam usaha untuk memperbaharui persahabatan lama.

Dalam konteks kerjasama politik kedua-dua negara bersetuju bahawa tidak terdapat perbezaan pendapat dengan Malaysia dalam isu-isu serantau dan antarabangsa. Lawatan tersebut telah dapat mempereratkan lagi persefahaman dan hubungan dua hala di antara Malaysia dengan Thailand dan Burma.

Di samping itu, lawatan tersebut telah dapat mencapai persefahaman di dalam bidang perdagangan dan ekonomi. Kedua negara Thailand dan Burma telah bersetuju pada dasarnya untuk mempertingkatkan lagi kegiatan-kegiatan kerjasama yang berorientasikan perdagangan dan ekonomi. Di antara kegiatan perdagangan dan ekonomi yang dipersetujui dengan Thailand adalah kerjasama pelancongan, kerjasama dalam perusahaan automotif, import minyak kelapa sawit Malaysia dan kerjasama kawasan Pembangunan Bersama Malaysia-Thailand (JDA).

Di Burma, lawatan Yang Amat Berhormat Perdana Menteri telah merangsangkan lagi aktiviti perdagangan dan ekonomi dan telah dapat mengenal pasti bidang-bidang kerjasama khusus yang boleh dipertingkatkan lagi seperti cadangan mengadakan penerbangan terus di antara Malaysia dan Burma dan mengadakan pembelian beras dari Burma.

Yang Amat Berhormat Perdana Menteri juga telah berkesempatan membincangkan kerjasama sosial seperti masalah-masalah dan langkah-langkah yang diambil untuk membanteras penyalahgunaan dadah di kedua-dua negara.

TABUNG HAJI—PERKHIDMATAN DARI PINTU KE PINTU

3. Puan Hajjah Azizah binti Haji Mohd. Said minta Perdana Menteri menyatakan adakah Lembaga Urusan dan Tabung Haji akan memperkenalkan "Perkhidmatan Dari Pintu ke Pintu" kepada bakal-bakal haji pada masa akan datang. Dalam perkhidmatan ini, Lembaga Urusan dan Tabung Haji akan mengambil bakal-bakal haji daripada rumah mereka untuk dibawa ke kompleks Kelana Jaya. Bakal-bakal Haji tersebut akan dihantar pulang ke rumah mereka apabila selamat kembali ke tanahair daripada Tanah Suci Makkah dan dikenakan bayaran yang berpatutan.

Setiausaha Parlimen di Jabatan Perdana Menteri (Tuan Othman bin Abdul): Tuan Yang di-Pertua, cadangan untuk memperkenalkan perkhidmatan dari pintu ke pintu adalah merupakan satu cadangan yang baru bahkan Tabung Haji perlu membuat kajian-kajian yang lebih mendalam berkenaan dengan saranan itu sebelum apa-apa keputusan dapat dibuat berkaitan dengannya.

Kajian yang akan dilakukan adalah mengambil berat tentang perkara-perkara berikut:

- (1) Setakat mana perkhidmatan dari pintu ke pintu dapat dilakukan kerana lazimnya jemaah haji pergi ke lapanganterbang dan balik akan ditemani oleh kaum keluarga dan jiran tetangga;
- (2) Kemudahan lojistik pengangkutan yang ada dan diperlukan bagi mengenalikan perkhidmatan ini serta kosnya; dan
- (3) Kakitangan yang diperlukan untuk mengendalikan perkhidmatan ini kerana pada

waktu berkenaan ramai kakitangan Tabung Haji akan berada di Tanah Suci Makkah.

PASAR TANI—KEJAYAAN DICAPAI

4. Tuan Haji Shaharom bin Haji Maasom minta Menteri Pertanian menyatakan sehingga 31hb Disember, 1987 berapa jumlah pasar tani di seluruh negara, dan kejayaan yang dicapai oleh para petani dari jumlah kos jual beli. Berapa jumlah pasar tani yang akan dibuka dan di mana di tahun ini.

Timbalan Menteri Pertanian (Tuan Mohd. Kassim bin Ahmed): Tuan Yang di-Pertua, sehingga 31hb Disember, 1987 sebanyak 54 buah pasar tani telah berjaya diwujudkan di seluruh negara.

Nilai jualan terkumpul sepanjang tahun 1987 adalah sebanyak \$21.7 juta. Berdasarkan kepada anggaran 30% keuntungan dari nilai jualan tersebut, purata 2,049 orang petani yang menyertai pasar tani dianggarkan telah berjaya memperolehi keuntungan sebanyak \$6.5 juta.

Pada tahun ini Lembaga bercadang akan membuka 20 buah lagi pasar tani seperti berikut:

<i>Negeri</i>	<i>Kawasan yang dicadangkan</i>
1. Kedah	Tunjang Langkawi
2. Pulau Pinang	Bayan Baru
3. Perak	Parit Buntar Medan Gopeng
4. Wilayah Persekutuan	Bandar Tun Abd. Razak
5. Selangor	Ampang Serdang Damansara
6. Melaka	Alor Gajah
7. Johor	Batu Pahat Pontian Kota Tinggi

8. Pahang	Raub Bentong
9. Terengganu	Gong Badak Marang
10. Kelantan	Kota Bharu Tanah Merah
11. Sarawak	Kuching

Tuan Haji Shaharom bin Haji Maasom: Tuan Yang di-Pertua, soalan tambahan. Saya ingin mendapat penjelasan daripada Yang Berhormat Timbalan Menteri. Adakah pasar tani ini merupakan pasar tertutup kerana sekarang ini mereka yang mengambil bahagian dalam pasar tani seolah-olah telah diberi tiket untuk selamalamanya hanya "A" sahaja yang boleh berjual di situ sedangkan petani-petani yang lain menengok sudah ada kemajuan di pasar tani cuba hendak mengambil bahagian di situ tidak dapat peluang terutama sekali di kawasan-kawasan yang telah ada pasar tani sekarang ini sambutan daripada petani-petani hendak turut serta cukup menggalakkan tetapi tiket untuk menentukan lot tempat berniaga itu sudah terhad. Adakah ini merupakan pasar tani tertutup?

Tuan Mohd. Kassim bin Ahmed: Tuan Yang di-Pertua, kita tidak mempunyai dasar untuk melaksanakan pasar tani secara tertutup. Kita memberi peluang seluas-luasnya kepada petani-petani kita untuk mengambil bahagian atau menyertai pasar tani ini. Pendek kata, pada masa ini pasar tani akan dapat diperluaskan lagi dari segi kekerapannya dan lokasinya di setiap daerah untuk memberi peluang yang seluas-luasnya kepada petani-petani kita.

Puan Hajjah Rogayah binti Che Mat: Tuan Yang di-Pertua, soalan tambahan. Tidakkah Kementerian bercadang untuk meluaskan kegiatan pasar tani dengan menolong

memasarkan hasil tani keluar negeri atau membeli untuk diproses terus bagi tujuan yang sama?

Tuan Mohd. Kassim bin Ahmed: Tuan Yang di-Pertua, pasar tani merupakan pasar jualan barang-barang pertanian. Pihak FAMA cuba juga sedaya upaya untuk memasarkan bahan-bahan seumpama belimbing besi, pisang emas, betik exotika dan lain-lain ke negara-negara Eropah dan lain-lain lagi. Pada hari ini Alhamdulillah, MAS sanggup menambah ruang kargonya ke Eropah dan kita berharap dengan usaha yang semacam ini maka peluang petani kita akan lebih luas.

Puan Habidah binti Jusoh: Tuan Yang di-Pertua, soalan tambahan. Saya ingin mendapat penjelasan dari Yang Berhormat Timbalan Menteri Pertanian daripada pasar tani yang telah dibuka dan yang akan dibuka di seluruh negara kenapakah pasar tani ini tidak diadakan pada hari cuti minggu seperti Hari Ahad di sebelah pantai barat dan Jumaat di sebelah pantai timur kerana jika diadakan pada hari tersebut boleh memudahkan kepada orang ramai keluar ke pasar untuk membeli barang-barang keperluan mereka?

Tuan Mohd. Kassim bin Ahmed: Tuan Yang di-Pertua, saya rasa pasar tani ini dibuka pun pada hari Ahad dan jikalau perkara ini tidak selaras dengan jawapan saya, saya akan pertimbangkan pengesyoran Yang Berhormat itu.

Tuan Mustafa bin Awang: Saya minta Timbalan Menteri yang berkenaan memberi jawapan apakah jualan-jualan kaset terutama sekali dari parti lawan di pasar tani ini termasuk dalam bahagian pertanian? *(Ketawa)*

Tuan Mohd. Kassim bin Ahmed: Tuan Yang di-Pertua, saya tidak sedar

bahawa jualan kaset yang merupakan salah satu daripada barang jualan. Apa yang dijual pada hari ini Yang Berhormat sendiri tahulah, sayur-sayuran, buah-buahan, daging dan lain-lain lagi, tetapi tidak termasuk kaset. Jadi, saya berharap Yang Berhormat melaporkan kepada pihak yang berkenaan berhubung dengan jualan kaset di pasar tani.

Tuan Mustafa bin Awang: Tuan Yang di-Pertua, saya laporkan segera, ia berlaku di pasar tani Kuala Terengganu.

Tuan Mohd. Kassim bin Ahmed: Terima kasih.

PERSIDANGAN KETUA-KETUA NEGARA ASEAN DI MANILA

5. Puan Ainon binti Ariffin minta Menteri Luar Negeri menyatakan mengenai perkembangan dan keputusan Persidangan Ketua-ketua Negara ASEAN yang berlangsung dalam bulan Disember 1987 bertempat di Manila, Filipina.

Toh Muda Dr Abdullah Fadzil bin Che' Wan: Tuan Yang di-Pertua, terlebih dahulu saya ingin mengucapkan banyak-banyak terima kasih kepada Ahli Yang Berhormat yang telah membangkitkan soalan ini di mana jelas menunjukkan minat Ahli Yang Berhormat dan juga Dewan yang mulia ini mengenai perkembangan-perkembangan serantau ASEAN yang sememangnya menjadi salah satu teras dasar luar negara kita.

Tuan Yang di-Pertua, Persidangan Ketua-Ketua Negara ASEAN yang berlangsung di Manila pada 14-15hb Disember, 1987 yang lalu merupakan persidangan ketiga seumpamanya dan telah memberi erti yang besar di dalam konteks kerjasama ASEAN di dalam berbagai-bagai bidang.

Pencapaian yang ketara sekali ialah kesungguhan serta keyakinan ketua-ketua negara ASEAN tentang pentingnya ASEAN memperkukuhkan azam untuk meningkatkan tahap kerjasama yang telah dijalin sejak 20 tahun tertubuhnya ASEAN.

Dalam usaha untuk mencapai tujuan ini ketua-ketua negara ASEAN telah bersepakat untuk menggubal satu strategi masa depan di mana semua tindakan-tindakan yang akan diambil oleh ASEAN hendaklah berlandaskan kepada satu Program Bertindak ataupun "Programme of Action", yang merangkumi semua bidang kerjasama ASEAN.

Malaysia dan rakan-rakan di dalam ASEAN berasa penuh yakin dengan kesungguhan yang padu serta kerjasama yang menggunakan sepenuhnya sumber-sumber tenaga yang ada supaya ASEAN akan dapat melipatgandakan pencapaiannya di masa-masa akan datang.

Tuan Yang di-Pertua, Persidangan Ketua-ketua Negara ASEAN yang ketiga tersebut juga telah mengambil beberapa langkah tertentu untuk mempertingkatkan kerjasama di bidang ekonomi ASEAN. Sehubungan dengan ini beberapa perjanjian dan juga pindaan kepada beberapa Perjanjian Ekonomi ASEAN telah ditandatangani seperti berikut:

- (1) Perjanjian Asas yang dipinda berkenaan projek perindustrian usahasama ASEAN.
- (2) Protokol untuk memperbaiki, dengan izin, extension of tariff preferences under the ASEAN trading arrangements.
- (3) Memoranda persefahaman ke atas, dengan izin, standstill and rollback of non-tariff barriers;
- (4) Perjanjian untuk promosi dan perlindungan pelaburan.

Dengan adanya perjanjian-perjanjian ini, Malaysia yakin bahawa ruang untuk kerjasama yang lebih berkesan dan menguntungkan kepada semua negara-negara ASEAN akan dapat diwujudkan di masa-masa yang akan datang.

KELAS TADIKA KEMAS DI BALAI RAYA

6. Cik Norani binti Haji Beluah minta Menteri Pembangunan Negara dan Luar Bandar menyatakan buat masa ini pihak KEMAS kebanyakannya mengadakan Kelas-kelas TADIKA di Balai-balai Raya. Ianya tidak begitu sesuai kerana Balai Raya seringkali digunakan oleh orang ramai dan lain-lain pertubuhan dan persatuan; adakah pihak Kementerian akan mendirikan bangunan sendiri bagi kemudahan pihak KEMAS mengadakan Kelas Tadika dalam usaha untuk memberi bimbingan dan pelajaran kepada semua kaum di negara ini.

Tuan Abdul Raman bin Suliman: Tuan Yang di-Pertua, izinkan saya menjawab bagi pihak Menteri Pembangunan Negara dan Luar Bandar.

Adalah tidak begitu tepat jika dikatakan penggunaan Balai Raya menimbulkan kesukaran kepada orang ramai dan lain-lain pertubuhan memandangkan penggunaan Balai Raya di satu-satu kawasan itu telah dipersetujui oleh pemimpin-pemimpin di satu kawasan berkenaan bagi tujuan penggunaan untuk TADIKA KEMAS.

Oleh yang demikian, pihak KEMAS tidak bercadang membina bangunan kelas-kelas TBK disebabkan tiada peruntukan untuk membuat bangunan TBK dan menghadapi masalah untuk mendapatkan tapak TBK. Mengikut konsep pembangunan masyarakat

yang diikuti sekarang, masyarakat terpaksa melibatkan diri dengan menyediakan tempat untuk dijadikan Kelas TBK. Pihak Kemas akan mengadakan guru dan kelengkapan TBK.

Tuan Azman Atar bin Othman: Tuan Yang di-Pertua, saya ingin mendapat penjelasan daripada Yang Berhormat, kenapakah beliau menjawab bagi pihak Kementerian Pembangunan Negara dan Luar Bandar sedangkan Kementerian berkenaan ada mempunyai Timbalan Menteri dan Setiausaha Parlimen?

Tuan Abdul Raman bin Suliman: Tuan Yang di-Pertua, itu soalan lain

KADAR TOL—MENURUNKAN

7. Puan Hajjah Salbiah binti Mohd. Akim minta Menteri Kerjaraya menyatakan adakah Kementerian Kerjaraya akan menurunkan bayaran Tol Lebuhraya yang mana lebih kurang 1 kilometer 5 sen ini adalah satu kadar yang tinggi untuk dibayar terutamanya kepada teksi, memandangkan lebuhraya ini adalah satu jalan yang kekal dan Kerajaan boleh mengutip dengan masa yang lama, kemungkinan jua dengan harga yang rendah akan banyak lagi kenderaan yang melalui lebuhraya di seluruh negara.

Menteri Kerjaraya (Dato' S. Samy Vellu): Tuan Yang di-Pertua, untuk makluman Ahli Yang Berhormat, Kerajaan tidak bercadang untuk menurunkan kadar bayaran tol yang dikenakan ke atas lebuhraya tol yang ada sekarang. Kadar bayaran tol 5 sen sekilometer yang dikenakan ke atas kenderaan yang mempunyai dua ganda dengan tiga atau empat roda iaitu motokar saloon biasa di bawah sistem tol tertutup adalah tidak begitu tinggi dan didapati berpatutan.

Bagi kenderaan yang diiktirafkan sebagai teksi adalah dikenakan kadar bayaran tol yang lebih rendah iaitu sebanyak 2.5 sen sekilometer sahaja dan bukannya 5 sen sekilometer sebagaimana yang dinyatakan oleh Ahli Yang Berhormat itu. Untuk maklumat Ahli Yang Berhormat, kadar tol 5 sen sekilometer yang dikenakan ke atas kereta adalah rendah jika dibandingkan dengan beban kos pembinaan yang sangat besar yang perlu ditanggung. Dengan kadar tol tersebut Lembaga Lebuhraya Malaysia masih tidak dapat menampung kos penyelenggaraan dan juga pengurusan lebuhraya.

Di samping itu Lembaga Lebuhraya Malaysia juga perlu menjelaskan kadar faedah dan pokok ke atas pinjaman-pinjaman yang telah dibuat bagi membina lebuhraya-lebuhraya tersebut.

Oleh itu saya berpendapat bahawa kadar tol tersebut tidak membebankan pengguna-pengguna kerana faedah yang diterima oleh pengguna-pengguna melebihi dari apa yang dibayar seperti penjaminan masa perjalanan, keselesaan dan juga keselamatan yang mana perkara-perkara itu merupakan ciri-ciri utama bagi lebuhraya tol. Mengikut perangkaan yang telah dibuat, pengguna-pengguna lebuhraya sentiasa bertambah setiap bulan.

Tuan Mustafa bin Awang: Tuan Yang di-Pertua, soalan tambahan. Adakah Kementerian Kerjaraya dan Lembaga Lebuhraya Malaysia bercadang menentukan satu jangka waktu yang mana tol-tol itu akan diberhentikan atau setelah mendapat pulangan modal daripada pungutan tol ini?

Dato' S. Samy Vellu: Tuan Yang di-Pertua, saya tidak ada apa-apa cadangan untuk memberhentikan kutipan tol tetapi ada juga cadangan

untuk mengutip kadar tol yang lebih tinggi pada masa yang akan datang. (Ketawa)

Tuan Yang di-Pertua: Oleh itu jangan tambah pertanyaan, nanti tambah tol.

SISWAZAH MENGANGGUR— LANGKAH MENGATASI

8. **Tuan Mohd. Noor bin Bedah** minta Perdana Menteri menyatakan sama ada kadar pengangguran di kalangan siswazah akan terus meningkat dalam masa 4 atau 5 tahun yang akan datang dan apakah usaha-usaha yang telah dibuat bagi menghadapi masalah ini.

Tuan Othman bin Abdul: Tuan Yang di-Pertua, pada masa ini keadaan ekonomi negara telah pun beransur pulih. Keluaran Dalam Negara Kasar (KDNK) telah meningkat dari 1.2% dalam tahun 1986 kepada 4.7% dalam tahun 1987 dan adalah dijangkakan pada tahun ini ianya dijangkakan terus meningkat. Jika sekiranya pemulihan ini berterusan dan berkekalan dalam 4 atau 5 tahun yang akan datang adalah dijangkakan prospek gunatenaga termasuk gunatenaga di kalangan siswazah adalah lebih cerah memandangkan bahawa keupayaan negara mewujudkan peluang-peluang pekerjaan sangat bergantung kepada pertumbuhan ekonomi yang kukuh.

Walau bagaimanapun, keadaan ini banyak bergantung kepada inisiatif dan kesanggupan para siswazah untuk menceburkan diri dalam sektor-sektor perniagaan dan perkhidmatan yang dijangkakan mempunyai potensi untuk berkembang.

Menyedari keadaan ini Kerajaan telah pun mengambil beberapa langkah yang positif untuk membantu dan menyediakan siswazah-siswazah menceburkan diri dalam sektor-sektor

berkenaan. Langkah-langkah yang diambil oleh Kerajaan untuk mengurangkan masalah pengangguran di kalangan siswazah adalah seperti berikut:

- (i) menubuhkan satu Jawatan-kuasa Khas Kabinet mengenai masalah siswazah menganggur;
- (ii) melaksanakan program skim latihan khas;
- (iii) skim penempatan di syarikat-syarikat swasta;
- (iv) skim siswazah tani;
- (v) skim penyaluran ke syarikat-syarikat swasta; dan
- (vi) skim khidmat sambilan siswazah.

Perkara-perkara ini telah pun banyak kali dibentangkan di dalam Dewan yang mulia ini.

Tuan C. Krishnan: Tuan Yang di-Pertua, beberapa kali pemimpin-pemimpin negara telah pun mencadangkan bahawa untuk mengurangkan pengangguran siswazah, Kerajaan telah merancangkan satu skim siswazah tani. Apakah kemajuannya, dan adakah siswazah-siswazah yang menganggur dapat menerima rancangan ini?

Tuan Othman bin Abdul: Tuan Yang di-Pertua, dalam program ini telah didapati seramai 380 orang telah pun mendaftarkan diri untuk menjadi atau menceburkan diri dalam bidang siswazah tani ini dan 118 daripada mereka telah pun berjaya di dalam bidang pertanian ini. Adalah dijangkakan bahawa lebih ramai para siswazah akan dapat menceburkan diri dalam bidang ini untuk menimbulkan siswazah yang boleh memodenkan sektor pertanian dan untuk memperbaiki kedudukan diri mereka sendiri.

DAUN QAT YAMAN—KAWALAN

9. Tuan Haji Abdul Majid bin Haji Abdullah minta Menteri Dalam Negeri menyatakan:

- (a) sama ada daun qat yang dimakan oleh orang Yaman Selatan ditakrif sebagai najis dadah;
- (b) adakah terdapat kes rakyat negara ini menggunakan daun qat sebagai cara untuk berkhayal dan menyelesaikan masalah mereka; dan
- (c) adakah penerangan-penerangan diberikan oleh Kerajaan kita kepada negara-negara asing berhubung dengan undang-undang najis dadah Malaysia.

Timbalan Menteri Dalam Negeri (Dato' Megat Junid bin Megat Ayob): Tuan Yang di-Pertua, penggunaan daun qat boleh mendatangkan pengkhayalan secara psikologikal kerana ia memerangsangkan, menghilangkan rasa penat dan lapar. Dua jenis bahan kimia yang diperolehi dari daun qat iaitu cathinone dan cathine adalah ditakrif sebagai dadah kerana kedua-duanya telah disenaraikan sebagai bahan psikotropik dan dikenakan kawalan di bawah Konvensyen Mengenai Bahan-bahan Psikotropik, 1971.

Cathinone, komponen yang lebih banyak mengakibatkan masalah kesihatan dan tidak mempunyai sebarang nilai perubatan disenaraikan di bawah Jadual I Konvensyen yang mengenakan kawalan lebih ketat. Cathine yang mempunyai kegunaan dalam bidang perubatan disenaraikan di bawah Jadual III Konvensyen tersebut. Malaysia adalah "accede" kepada Konvensyen Mengenai Bahan-bahan Psikotropik 1971 pada 1986. Berikutan dari itu beberapa pindaan telah dibuat untuk menyenaraikan cathine dan cathinone di bawah

kawalan Akta Dadah Berbahaya 1952 dan Ordinan Racun 1952. Cathinone kini tersenarai di bawah Jadual 1, Bahagian III Akta Dadah Berbahaya 1952 mulai 21hb Mei, 1986 dan juga di bawah Jadual 1 Kumpulan B, Ordinan Racun 1952. Cathine pula tersenarai di bawah Jadual 1 Kumpulan B dan Jadual IV, Seksyen 25A (1) Bahan Psikotropik Ordinan Racun 1952;

(b) setakat ini belum ada kes yang dilaporkan mengenai rakyat Malaysia yang menggunakan daun qat;

(c) Penerangan-penerangan mengenai undang-undang najis dadah di negara kita diberikan kepada para peserta atau perwakilan negara-negara asing di dalam persidangan-persidangan, seminar-seminar, bengkel-bengkel dan mesyuarat-mesyuarat di peringkat antarabangsa, serantau dan dalam perhubungan dua hala. Penerangan-penerangan undang-undang dadah juga diberikan kepada pelawat-pelawat asing termasuk orang-orang kenamaan, pegawai-pegawai dari agensi-agensi tindakan anti dadah negara-negara berkenaan serta wartawan-wartawan dari luar negeri.

Sistem Penerbangan Malaysia (MAS) dan syarikat-syarikat penerbangan antarabangsa juga dikehendaki membuat pengumuman sebelum kapal terbang mendarat di lapangan terbang negara ini untuk memberitahu bahawa pengedaran dadah adalah satu kesalahan di bawah Akta Dadah Berbahaya 1952 dan boleh membawa hukuman mati.

Setiap warganegara asing yang memasuki negara kita juga mendapat penerangan tentang hukuman mati ke atas pengedar-pengedar dadah dengan amaran yang tercatat dengan warna merah dalam kad "disembarkation/embarkation".

PENANGKAPAN IKAN LAUT DALAM

10. Tuan Mohd. Wajdi bin Dato' Haji Ishak minta Menteri Pertanian menyatakan mengenai Kerjasama Penangkapan Ikan Laut Dalam yang dilancarkan oleh Yang Amat Berhormat Perdana Menteri Malaysia:

- (i) jumlah tangkapan ikan yang dibuat semenjak kerjasama itu dilancarkan dan berapa nilai pasarannya;
- (ii) apakah wujudnya kerjasama itu telah mendatangkan sedikit sebanyak faedah-faedah ekonomi kepada:
 - (a) Persatuan Nelayan Kebangsaan (NEKMAT) selaku wakil kaum nelayan dari seluruh Malaysia;
 - (b) kepada Kerajaan dari segi penambahan sumber-sumber pendapatan negara dan sebagai salah satu cara penyelesaian kepada masalah pengangguran; dan
 - (c) kepada pihak swasta dari segi galakan dan minat untuk turut melabur di bidang industri ini serta kemudahan-kemudahan yang disediakan.

Tuan Mohd. Kassim bin Ahmed:
Tuan Yang di-Pertua, bagi menjawab soalan (i), jumlah tangkapan ikan yang telah dibuat semenjak kerjasama itu dilancarkan ialah 1,360 metrik ton bernilai \$2.4 juta.

Bagi menjawab soalan (ii):

- (a) faedah-faedah ekonomi kepada NEKMAT ialah dengan wujudan peluang membekal minyak disel dan makanan kepada bot-bot kerjasama tersebut;

- (b) faedah ekonomi kepada Kerajaan ialah meningkatkan Keluaran Dalam Negara Kasar, mendapat cukai Kastam dan Eksais dan memberi peluang pekerjaan kepada anak muda yang menganggur;
- (c) faedah kepada pihak swasta pula, ialah sebagai satu cabaran untuk turut menceburi dalam perusahaan perikanan laut dalam.

BOT ASING DI PROJEK LAUT DALAM

11. Tuan Mustafa bin Awang minta Menteri Pertanian menyatakan adakah terdapat bot-bot asing telah mengusahakan projek laut dalam seperti yang dijalankan oleh Syarikat K & I di perairan negara ini. Dan kalau ada apakah tindakan yang telah diambil ke atas mereka ini oleh pihak yang berkenaan supaya kejadian seperti ini tidak akan berlaku lagi.

Tuan Mohd. Kassim bin Ahmed: Tuan Yang di-Pertua, tidak ada terdapat bot asing yang telah mengusahakan projek laut dalam seperti Syarikat K & I di perairan Malaysia.

TAYANGAN FILEM DI RTM

12. Tuan Haji Hamid Araby bin Haji Mohd. Salleh minta Menteri Penerangan menyatakan iaitu, mahupun Kementerian Penerangan berjanji akan menyusun semula rancangan RTM, penonton-penonton RTM atau rakyat masih tidak puashati kerana penayangan filem-filem sama ada yang bersiri ataupun dalam bentuk drama khususnya dari negara-negara Barat dan iklan-iklan televisyen tempatan banyak memperlihatkan unsur-unsur negatif dari segi budaya dan nilai-nilai moral dan penerapan

nilai-nilai Islam. Apakah tindakan-tindakan yang benar, yang akan diambil untuk mengatasi masalah-masalah tersebut.

Setiausaha Parlimen Kementerian Penerangan (Dato' Haji Dusuki bin Haji Ahmad): Tuan Yang di-Pertua, Kementerian Penerangan senantiasa mengambil berat tentang nilai-nilai budaya dan moral, nilai-nilai agama dan nilai-nilai masyarakat, bangsa dan negara dalam semua rancangan yang disiarkan melalui televisyen. Semua filem, drama dan rancangan-rancangan lain yang diimport dari luar negeri adalah senantiasa ditapis oleh Pegawai-pegawai RTM sebelum ditayangkan mengikut garispuandu-garispuandu Kementerian ini supaya tidak menonjol sebarang nilai-nilai yang negatif serta boleh merosakkan masyarakat.

Ingin juga saya menegaskan bahawa pada masa ini usaha sedang dijalankan untuk menambah lagi bilangan rancangan tempatan supaya bilangan filem, drama dan rancangan-rancangan yang diimport itu dapat dikurangkan secara beransur-ansur sehingga RTM dapat menyiarkan lebih banyak rancangan tempatan daripada rancangan-rancangan yang diimport.

Berhubung dengan keperluan menyusun semula rancangan-rancangan RTM, hal itu dijalankan secara terus menerus untuk mencari keseimbangan yang wajar di antara rancangan-rancangan yang bercorak hiburan semata-mata dengan rancangan-rancangan yang memberi pengetahuan, pendidikan dan panduan-panduan hidup yang berguna. Ini adalah untuk memastikan supaya susunan dan kandungan rancangan-rancangan RTM itu lebih sesuai dengan keperluan masyarakat dan negara. Untuk ini Kerajaan telah pun menubuhkan suatu Jawatankuasa Penyelaras rancangan-rancangan

televisyen yang dipengerusikan oleh Menteri Penerangan sendiri dan dianggotai oleh Menteri Pendidikan, Menteri Kebudayaan dan Pelancongan, Menteri Belia dan Sukan dan juga Menteri di Jabatan Perdana Menteri. Semua garis panduan yang digunakan oleh RTM adalah diawasi oleh jawatankuasa tersebut untuk memastikan supaya rancangan-rancangan televisyen Malaysia akan betul-betul dapat memenuhi kepentingan rakyat, bangsa dan negara.

PELANCONG KE MALAYSIA— KEDATANGAN

13. Puan Law Jack Yoon minta Menteri Kebudayaan dan Pelancongan menyatakan dalam usaha-usaha menarik pelancong-pelancong asing setakat ini:

- (a) apakah program-program/rancangan-rancangan yang telah atau akan dijalankan;
- (b) berapakah jumlah perbelanjaan yang telah digunakan; dan
- (c) bagaimana hasil-hasil pulangan-nya dan berapa banyakkah pekerjaan baru telah dibentuk dalam sektor ini bagi mengatasi masalah pengangguran.

Tuan Abdul Raman bin Suliman: Tuan Yang di-Pertua, (a) untuk makluman Ahli Yang Berhormat, Kementerian Kebudayaan dan Pelancongan menerusi Perbadanan Kemajuan Pelancongan Malaysia telah dan akan berterusan menjalankan berbagai-bagai usaha meningkatkan lagi bilangan kedatangan pelancong-pelancong ke Malaysia. Usaha ini adalah dibuat menerusi perlaksanaan empat aktiviti pemasaran yang penting iaitu pengiklanan, penggalakan, perhubungan awam dan penyebaran

maklumat pelancongan. Langkah-langkah sedemikian adalah meliputi semua pasaran-pasaran pelancongan yang utama dan dilaksanakan sama ada secara terus atau dengan kerjasama sektor swasta seperti Sistem Penerbangan Malaysia (MAS), agensi-agensi pelancongan dan hotel-hotel tempatan.

Di antara program-program yang telah dan akan dijalankan adalah seperti berikut:

- (i) penghantaran misi-misi jualan dan penggalakan ke seberang laut;
- (ii) penyertaan di pameran-pameran dan pusat-pusat pelancongan antarabangsa dan serantau;
- (iii) penganjuran seminar-seminar dan bengkel mengenai pelancongan Malaysia;
- (iv) bantuan insentif kepada pengusaha-pengusaha pelancongan luar negeri bagi memperbanyakkan program-program lawatan ke Malaysia;
- (v) penajaan program-program televisyen ke arah meningkatkan publisiti mengenai Malaysia;
- (vi) penganjuran lawatan-lawatan suai kenal bagi penulis-penulis perjalanan, pemberita dan agensi-agensi pelancongan ke Malaysia;
- (vii) penggalakkan rombongan-rombongan perfileman bagi menambah minat untuk menjadikan Malaysia sebagai lokasi perfileman.

(b) Jumlah perbelanjaan yang telah digunakan dalam usaha untuk menarik pelancong bagi tahun 1987 ialah \$24,271,840; bagi tahun 1988 pula Kementerian telah diperuntukkan sejumlah \$100 juta bagi tujuan tersebut. Pendapatan keseluruhan dari pelancongan bagi tempoh 1980-1985

adalah sebanyak \$6,437 juta. Dalam tempoh 1986, seramai 3,027,781 pelancong dianggarkan mengunjungi Malaysia dan hasil yang diperolehi berjumlah \$1,529 juta. Pendapatan ini tidak termasuk tambang para pelancong yang mana sebahagian besar daripadanya dinikmati oleh Syarikat Penerbangan Malaysia.

(c) Pelancongan merangkumi pelbagai sektor industri seperti pengangkutan, kemudahan penginapan, makan minum, kraftangan, cendaramata, pengusaha pengembaraan dan pelancongan dan lain-lain. Dengan itu adalah sukar untuk memberi maklumat lengkap mengenai berapa banyak pekerjaan baru diwujudkan.

Dari segi industri perhotelan sahaja sebanyak 47,346 peluang pekerjaan telah diadakan setakat ini. Oleh yang demikian sudah tentulah jumlah pekerjaan baru yang diwujudkan oleh kesan industri pelancongan adalah jauh lebih besar lagi.

PEKERJA DI KAPAL MALAYSIA (MISC)

14. Puan Hajjah Rosnah binti Haji Mohd. Salleh minta Perdana Menteri menyatakan:

- (a) kenapa kapal-kapal yang didaftarkan di Malaysia (MISC) masih mengambil pekerja-pekerja dari luar negeri seperti Filipina, India, Burma dan Indonesia sedangkan jawatan-jawatan tersebut boleh diisi oleh pelatih-pelatih yang keluar dari Akademi Laut Malaysia;
- (b) mengapakah jawatan-jawatan seperti Captain, Chief Officer dan Second Officer masih dipenuhi oleh pegawai-pegawai luar negeri sedangkan anak-anak Bumiputera yang

berkelulusan setaraf masih tidak diutamakan; dan

- (c) apakah pencapaian Akademi Laut Malaysia sejak ditubuhkan.

Tuan Othman bin Abdul: Tuan Yang di-Pertua, untuk makluman Ahli Yang Berhormat itu bahawa tidak ada pekerja-pekerja luar negeri di kapal-kapal yang didaftarkan di Malaysia (MISC) dalam kategori Kelasi kerana kategori tersebut dapat dipenuhi oleh pelatih-pelatih yang keluar dari Akademi Laut Malaysia (ALAM). MISC hanya mengambil pegawai-pegawai asing dalam kategori yang tidak cukup bekalan dari Akademi Laut Malaysia.

Pada masa ini 12.5% dari 560 jawatan pegawai di kapal-kapal bukan LNG dan 41.4% daripada 99 jawatan pegawai di kapal-kapal LNG adalah dipegang oleh pegawai-pegawai luar negeri. Pegawai-pegawai ini akan diganti oleh pegawai-pegawai Malaysia sebaik sahaja terdapat pegawai-pegawai Malaysia yang terlatih. Bagi tujuan ini MISC ada menghantar beberapa orang pelatih untuk menjalani kursus-kursus yang sesuai.

Sejak ditubuhkan, Akademi Laut Malaysia telah dapat mengeluarkan sejumlah 7,161 orang pelatih dalam berbagai-bagai jurusan.

SISA RADIOAKTIF— PELUPUSAN

15. Dr Tan Chong Keng minta Perdana Menteri menjelaskan:

- (a) langkah-langkah yang diambil oleh Kerajaan untuk mengatasi masalah pencemaran alam sekitar oleh bahan-bahan sisa kimia yang berbahaya yang dikeluarkan oleh kilang-kilang perindustrian; dan

- (b) peranan PUSPATI dalam usaha Kerajaan menyelesaikan masalah penyimpanan bahan sisa radioaktif yang dikeluarkan oleh Syarikat Asian Rare Earths.

Tuan Othman bin Abdul: Tuan Yang di-Pertua, ingin dimaklumkan bahawa pada tahun 1987 satu kajian kemungkinan kemudahan pengolahan dan pelupusan buangan-buangan toxic dan merbahaya di Malaysia telah selesai dijalankan oleh Jabatan Alam Sekitar, Kementerian Sains, Teknologi dan Alam Sekitar. Kajian ini telah mengenalpasti:

- (1) Sistem kemudahan pengolahan dan pelupusan yang sesuai bagi sisa-sisa kimia merbahaya yang dikeluarkan oleh kilang-kilang perindustrian dan juga oleh punca-punca lain di negara ini.
- (2) Pengolahan dan pelupusan yang dilaksanakan adalah pembakaran, pengolahan physical and chemical treatment.
- (3) Unit Loji Penstabilan.
- (4) Penyediaan tapak pelupusan terakhir.

Pada masa ini usaha-usaha sedang diteruskan bersama-sama beberapa Kerajaan Negeri bagi menentukan tapak-tapak pelupusan bagi melupuskan sisa-sisa kimia. Di samping itu satu peraturan baru di bawah Akta Kualiti Alam Sekeliling 1974 bagi mengawal pengeluaran, penyimpanan, pengangkutan, pengolahan dan pelupusan buangan-buangan toxic dan merbahaya sedang digubal oleh Jabatan Alam Sekitar.

Yang keduanya, sumbangan Unit Tenaga Nuklear (UTN) yang dulunya dikenali sebagai PUSPATI dalam usaha Kerajaan menyelesaikan masalah penyimpanan sisa-sisa radioactive yang dikeluarkan oleh

Syarikat Asian Rare Earth (ARE) ialah berupa perkhidmatan nasihat dari segi keselamatan radiological secara amnya dan dari segi kaedah menyimpan radioaktif secara khususnya.

UTN juga membantu Lembaga Pelesenan Tenaga Atom dalam membuat penilaian keselamatan dan pengawasan alam sekitar yang berkaitan dengan penyimpanan sisa radioaktif tersebut.

Dr Tan Chong Keng: Tuan Yang di-Pertua, soalan tambahan. Di UTN ada berapa orang pakar-pakar sains radioactivity yang bertugas di sana dengan kepakaran yang diiktiraf oleh badan IAEC atau Suruhanjaya Tenaga Atom Antarabangsa?

Tuan Othman bin Abdul: Tuan Yang di-Pertua, saya mohon notis sebab Ahli Yang Berhormat berkehendakkan jumlah bilangan pegawai.

CUKAI PENDAPATAN ATAS SYARIKAT TELEKOM MALAYSIA/MAS

16. Tuan Dahlan bin Haji Embun minta Menteri Kewangan menyatakan adakah Syarikat Telekom Malaysia Bhd dan MAS tertakluk kepada corporate tax. Sekiranya ada berapa banyak cukai yang dibayar oleh syarikat-syarikat tersebut.

Timbalan Menteri Kewangan (Tuan Loke Yuen Yow): Tuan Yang di-Pertua, ingin saya menyatakan di sini bahawa Syarikat Telekom Malaysia Berhad (STM) dikecualikan dari cukai pendapatan untuk tempoh 3 tahun iaitu mulai tahun taksiran 1988 hingga tahun taksiran 1990. Mengenai Syarikat Penerbangan Malaysia (MAS) pula, adalah didapati bahawa ianya tertakluk kepada cukai pendapatan.

Maklumat mengenai jumlah cukai pendapatan yang dibayar oleh MAS tidak boleh diumumkan tanpa persetujuan daripada pihak yang membayar cukai itu. Walaupun begitu memandangkan bahawa MAS adalah sebuah "public listed company" maklumat-maklumat mengenai anggaran cukai pendapatan ini ada dinyatakan di dalam laporan tahunan MAS yang dikeluarkan kepada pemilik-pemilik saham.

ISTERI ASING WARGANEGARA MALAYSIA—TARAF PENDUDUK TETAP

17. Tuan M. Sangaralingam minta Menteri Dalam Negeri menyatakan apakah perkembangan yang dicapai dalam mengeluarkan taraf penduduk tetapi bagi isteri-isteri asing yang telah masuk ke dalam negeri ini pada atau sebelum 30hb November, 1981 dan layak pada 30hb November, 1986 mengikut pengumuman Kerajaan dahulu.

Dato' Megat Junid bin Megat Ayob: Tuan Yang di-Pertua, setakat ini Jabatan Imigresen Malaysia telahpun mengenalpasti sejumlah 1,631 orang isteri-isteri asing warganegara yang layak diberikan taraf penduduk tetap. Dari jumlah tersebut 290 orang telahpun diberikan status Penduduk Tetap dan selebihnya masih dalam tindakan Jabatan Imigresen Malaysia.

Tuan Yang di-Pertua: Yang Berhormat Dato' Haji Zakaria bin Haji Yahaya.

Dato' Haji Zakaria bin Haji Yahaya: Tuan Yang di-Pertua, soalan saya No. 18. Tetapi saya hendak betulkan sedikit ayat di bawah itu "penyeludupan dadah dari negara-negara tersebut" bukan "ke negara-negara tersebut".

HASIL LAWATAN PERDANA MENTERI KE THAILAND DAN BURMA

18. Dato' Haji Zakaria bin Haji Yahaya minta Menteri Luar Negeri menyatakan apakah hasil lawatan yang telah beliau buat baru-baru ini ke negara Thailand dan Burma terutama sekali yang berkaitan dengan usaha dan kerjasama bagi menyekat penyeludupan dadah dari negara-negara tersebut.

21. Tuan G. Rajoo minta Menteri Luar Negeri menyatakan hasil lawatan Perdana Menteri ke negara Burma dan Thailand baru-baru ini dan persetujuan yang dicapai dalam bidang kebudayaan, sosial dan ekonomi bagi meningkatkan serta mengeratkan lagi hubungan persahabatan di antara kedua-dua negara ini.

30-3-88

39. Tuan Hassan bin Nam minta Menteri Luar Negeri menyatakan apakah hasil lawatan Y.A.B. Perdana Menteri dan rombongannya ke negara Thailand dan Burma baru-baru ini.

44. Tuan Bee Yak Sek minta Menteri Luar Negeri menyatakan:

- (a) isu-isu penting yang telah dibincangkan antara Malaysia dengan Negeri Thailand dan Burma tatkala beliau melawat kedua-dua negara baru-baru ini; dan
- (b) hasil yang telah diperolehi oleh Malaysia dari segi memperhebatkan perdagangan dua hala (bilateral trade).

4-4-88

19. Tuan Haji Abdul Hamid bin Haji Latiff minta Menteri Luar Negeri menyatakan apakah hasil yang telah

dicapai oleh Malaysia dalam siri lawatan Y.A.B. Perdana Menteri ke Negara Thai dan Burma baru-baru ini. Apakah hubungan dua hala yang boleh menguntungkan Malaysia dari segi ekonomi.

Toh Muda Dr Abdullah Fadil bin Che Wan: Tuan Yang di-Pertua, saya mohon izin untuk menjawab soalan ini serentak dengan soalan-soalan oleh Yang Berhormat Tuan G. Rajoo pada hari ini, Yang Berhormat Tuan Hassan bin Nam dan Yang Berhormat Tuan Bee Yang Sek pada 30-3-88 dan Yang Berhormat Tuan Haji Abdul Hamid bin Haji Latiff pada 4-4-88 sebab kelima-lima soalan tersebut ada kaitan.

Lawatan yang dilakukan oleh Yang Amat Berhormat Perdana Menteri ke Thailand dan Burma adalah bertujuan untuk mempereratkan lagi hubungan baik dan kerjasama dua hala di antara Malaysia dengan Thailand dan Burma. Di samping itu, lawatan tersebut juga memberi kesempatan kepada Perdana Menteri untuk berbincang dengan pemimpin-pemimpin negara tersebut mengenai isu-isu dua hala untuk kepentingan bersama.

Di antara hasil lawatan Perdana Menteri ke Thailand pada baru-baru ini adalah:

- (i) Kedua-dua Perdana Menteri bersetuju supaya kerjasama dalam konteks ekonomi perlulah dipertingkatkan lagi untuk meninggikan transaksi komersial dan perjalanan. Kedua-dua negara juga bersetuju untuk memperkemas lagi peraturan-peraturan yang sedia ada untuk menggalakkan pelancongan serta kemudahan kerjasama ekonomi dan perdagangan di antara kedua-dua buah negara.
- (ii) Dalam usaha untuk meningkatkan kerjasama pelancongan, Malaysia dan Thailand

pada dasarnya telah bersetuju untuk mengkaji cadangan mengadakan "package tours" umpamanya, Eropah-Thailand-Malaysia atau Eropah-Malaysia-Thailand dan mewujudkan penerbangan di antara Langkawi dan Pulau Phuket.

- (iii) Thailand juga telah bersetuju untuk mengimport 5,000 tan metrik minyak kelapa sawit dari Malaysia.
- (iv) Kedua-dua Kerajaan juga telah melahirkan rasa puas hati terhadap kerjasama yang sedia wujud dalam bidang industri automotif, iaitu usaha pertukaran penghasilan barang-barang komponen kereta di antara pihak-pihak swasta dari negara masing-masing.
- (v) Yang Amat Berhormat Perdana Menteri berpeluang berbincang dan melawat projek "crop substitution" yang dilaksanakan oleh pihak Thai untuk membasmi kegiatan penyalahgunaan dadah.

Di antara hasil lawatan ke Burma pula, kedua-dua buah negara telah bersetuju pada dasarnya untuk memulakan perkhidmatan penerbangan terus daripada Malaysia ke Burma. Perkhidmatan ini ternyata akan merapatkan lagi perhubungan di antara rakyat kedua buah negara dan membuka peluang yang lebih luas untuk meningkat perdagangan dua hala.

Lawatan Yang Amat Berhormat Perdana Menteri telah membawa suatu perkembangan kepada perhubungan dua hala dan insentif yang lebih gigih untuk perhubungan perdagangan.

Semasa lawatan tersebut, Perdana Menteri Burma telah bersependapat dengan pendirian Malaysia tentang masalah penagihan dadah. Perdana

Menteri Burma juga telah memberi jaminan akan terus menumpukan perhatian yang lebih serius terhadap masalah tersebut.

BEKERJA 5 HARI SEMINGGU

19. Tuan Syed Abdul Hamid bin Sagaff minta Perdana Menteri menyatakan sejauh manakah usaha Kerajaan untuk melaksanakan 5 hari bekerja dalam seminggu bagi menggalakkan rakyat Malaysia melancong dalam negeri.

Tuan Othman bin Abdul: Tuan Yang di-Pertua, pada masa ini Kerajaan tidak bercadang untuk melaksanakan saranan untuk bekerja 5 hari seminggu semata-mata bagi menggalakkan pelancongan dalam negeri. Kerajaan berpendapat ada pendekatan lain yang lebih baik untuk mencapai tujuan itu. Pelaksanaan 5 hari bekerja seminggu ini sudah tentu akan mengurangkan produktiviti dan sebaliknya akan meningkatkan kos pengeluaran yang boleh menyebabkan barangan keluaran negara menjadi lebih mahal dan hilang persaingannya di pasaran antarabangsa. Jika ini berlaku maka segala pendapatan yang diperolehi daripada peningkatan pelancongan dalam negeri tidaklah seimbang dengan kerugian yang akan dialami disebabkan kejatuhan produktiviti di kalangan para pekerja.

PENCEN PESARA TENTERA BRITISH

20. Tuan Abdul Hamid bin Ibrahim minta Perdana Menteri menyatakan sama ada Kerajaan Malaysia bercadang untuk berunding dengan Kerajaan British mengenai kenaikan pencen pesara-pesara Tentera British yang terdiri daripada rakyat Malaysia (Local Enlisted Personnel) yang menerima pencen yang lebih rendah daripada pencen yang diterima oleh

pesara-pesara Angkatan Tentera Malaysia. Jika tidak, nyatakan sebab-sebabnya.

Tuan Othman bin Abdul: Tuan Yang di-Pertua, Kerajaan Malaysia tidak bercadang untuk berunding dengan Kerajaan British mengenai kenaikan pencen bagi pesara-pesara Tentera British yang terdiri daripada rakyat Malaysia kerana sebab-sebab berikut:

- (i) pesara-pesara tersebut dilindungi oleh undang-undang dan peraturan-peraturan pencen Kerajaan British dan oleh yang demikian tidaklah wajar untuk Kerajaan Malaysia campurtangan dalam hal ini; dan
- (ii) dari masa ke semasa Kerajaan British akan membuat kajian dan memberi kenaikan pencen jika berlaku perubahan besar terhadap sara hidup dan bayaran pencen di Malaysia.

LAWATAN PERDANA MENTERI KE BURMA/THAILAND

21. Tuan G. Rajoo minta Menteri Luar Negeri menyatakan hasil lawatan Perdana Menteri ke negara Burma dan Thailand baru-baru ini dan persetujuan yang dicapai dalam bidang kebudayaan, sosial dan ekonomi bagi meningkatkan serta mengeratkan lagi hubungan persahabatan di antara kedua-dua negara ini.

Toh Muda Dr Abdullah Fadil bin Che Wan: Tuan Yang di-Pertua, saya telah jawab soalan itu sebentar tadi dan saya tidak ada apa-apa jawapan tambahan.

Tuan Yang di-Pertua: Thank you.

HUBUNGAN ANTARA KAUM

22. Tuan Paramjit Singh minta Perdana Menteri menyatakan:

- (a) apakah langkah-langkah yang sedang diambil oleh Kerajaan untuk memupuk dan memperbaiki hubungan antara kaum di Malaysia dan apakah kejayaan yang dicapai oleh Kerajaan di dalam usaha-usahanya untuk memperbaiki keharmonian kaum dalam negara; dan
- (b) adakah Kerajaan bersetuju bahawa disebabkan pelbagai polisi Kerajaan, ianya telah membantutkan penyebaran keharmonian kaum dalam negara.

Tuan Othman bin Abdul: Tuan Yang di-Pertua,

- (a) banyak langkah-langkah yang telah dan sedang diambil oleh Kerajaan untuk memupuk dan memperbaiki hubungan antara kaum di Malaysia sama ada melalui agensi Jabatan Perpaduan Negara mahupun melalui agensi-agensi Kerajaan yang lain yang ada kaitan dengan perpaduan.

Melalui Jabatan Perpaduan Negara langkah yang telah dan sedang diambil ialah melalui dua strategi iaitu strategi penggalakan dan strategi pencegahan. Di bawah strategi penggalakan Kerajaan menggalakan rakyat dari berbagai keturunan bergaul dan berinteraksi di dalam kegiatan-kegiatan kemasyarakatan melalui konsep kejiranan di kawasan sejiran yang dahulunya dipanggil skim Rukun Tetangga.

Strategi penggalakan bertujuan menjalin dan memupuk

semangat kejiranan yang kukuh, menanam sikap tolong-menolong dan berbaik-baik sangka ke arah keharmonian masyarakat.

Aktiviti-aktiviti penggalakan meliputi bidang-bidang sukan, sosial, pendidikan, kebudayaan, kebajikan, kesihatan, keselamatan, rekreasi, keagamaan dan sebagainya.

Melalui strategi yang kedua, iaitu strategi pencegahan, Jabatan Perpaduan Negara telah memperbunkan Sistem Pengesanan Perhubungan Sosial (SPPS). Sistem ini adalah satu sistem pengumpulan dan pengurusan maklumat untuk mendapat gambaran jelas dan kemaskini tentang suasana dan pola perhubungan sosial di sesuatu kawasan dan di seluruh negara serta mengenalpasti faktor-faktor yang mempengaruhi suasana itu. Sistem ini melibatkan pengumpulan maklumat, penganalisaan dan tindakan-tindakan susulan yang sesuai berdasarkan maklumat yang diperolehi dengan tujuan mereda atau mencegah kejadian perbalahan yang boleh membawa kepada situasi konflik.

Tujuan SPPS ialah untuk mengesan sebenar suasana, iklim dan pola perhubungan di antara kaum supaya usaha-usaha membaikpulihkan suasana perhubungan yang negatif dapat dijalankan.

Kerajaan melalui Jabatan Perpaduan Negara menilai keberkesanan program-program yang dilakukannya, khususnya yang melibatkan perhubungan kaum. Aktiviti-aktiviti perpaduan yang dijalankan oleh Kerajaan melalui Jabatan Perpaduan

Negara adalah amat berjaya dalam usaha memperbaiki keharmonian kaum di dalam negara ini.

- (b) Saya tidak bersetuju sama sekali bahawa disebabkan pelbagai polisi Kerajaan, ianya telah membantutkan penggalakan keharmonian kaum dalam negara ini; sebaiknya dasar-dasar Kerajaan yang digubal adalah bertujuan untuk melahirkan masyarakat Malaysia yang bersatu-padu.

Tuan Yang di-Pertua: Sila Yang Berhormat.

Tuan Mustaffa bin Awang: Tuan Yang di-Pertua, soalan tambahan. Saya minta Setiausaha Parlimen di Jabatan Perdana Menteri memberi satu penjelasan, tidak adakah suatu perancangan ataupun strategi dari Kerajaan dan Jabatan Perpaduan Negara bagi mewujudkan keharmonian ini yang sebaik-baiknya yang pertama sekali menggalakkan kahwin campur antara bangsa-bangsa yang terdapat dalam negara ini.

Tuan Othman bin Abdul: Tuan Yang di-Pertua, Kerajaan tidaklah mempunyai program tentang soalan ini tetapi adalah bergantung kepada individu masing-masing sama ada hendak berkahwin di antara orang Melayu dengan orang Tionghua atau

orang Tionghua dengan India. Ini adalah terletak kepada individu masing-masing, termasuk Ahli Yang Berhormat pun kalau mungkin hendak kahwin (*Ketawa*) dengan orang bangsa lain maka bolehlah. (*Ketawa*)

Tuan Yang di-Pertua: Masa untuk soal Jawab Mulut pun telah cukup.

(Masa untuk Pertanyaan bagi Jawab Mulut telah cukup dan Jawapan bagi Pertanyaan No. 23 hingga 60 adalah diberi di bawah ini).

HARGA KOMODITI

23. Puan Rokiah binti Zainuddin minta Menteri Perusahaan Utama menyatakan harga-harga komoditi kita pada masa sekarang, adakah mereka berada pada paras yang tinggi berbanding dengan harga pada tahun 1986 dan 1987.

Timbalan Menteri Perusahaan Utama (Tuan Alias bin Md. Ali): Bagi barangan utama getah, minyak kelapa sawit, timah, kayu balak, kayu gergaji dan kayu lapis, harga pada masa sekarang adalah lebih tinggi daripada paras harga purata bagi 1986 dan 1987. Tetapi bagi barangan utama seperti lada hitam, koko dan nenas harga pasaran pada masa sekarang adalah rendah sedikit daripada harga purata tahun 1986 dan 1987. Kedudukan harga bagi bahan-bahan tersebut adalah seperti berikut:

Barangan Utama	Harga sekarang pada 25 Mac, 1988	Harga purata bagi tahun	
		1987	1986
	\$	\$	\$
Getah asli (sen/kg) (RSS 1)	288	241	209
Minyak Kelapasawit Mentah (\$/tonne—hantaran tempatan)	909.50	734.00	551.00
Biji Koko Kering (\$/kg) (Bagan Datoh)	3.20	3.49	4.70
Timah (\$/kg)	17.35	16.90	16.08

Barangan Utama	Harga sekarang pada 25 Mac, 1988	Harga purata bagi tahun	
		1987	1986
	\$	\$	\$
Lada Hitam Sarawak (\$/tonne) ..	8,000.00	9,043.90	8,640.70
Nanas Kalengan (\$/tonne)	1,137.00	1,173.00	1,227.10
Kayu balak (\$/meter padu f.o.b.) ..	246.98	185.50	150.20
Kayu gergaji (\$/meter padu f.o.b.)	783.00	440.80	412.90
Kayu lapis (\$/meter padu f.o.b.) ..	762.00	641.00	624.00

AKTA MAKANAN 1985— PENGUATKUASAAN

24. Tuan Haji Ibrahim bin Haji Ujang minta Menteri Kesihatan menyatakan semenjak Akta Makanan 85 dikuatkuasakan apakah kejayaannya yang telah dicapai.

Timbalan Menteri Kesihatan (Dato' K. Pathmanaban): Penguatkuasaan sepenuhnya Akta Makanan 1983 dan Peraturan-peraturan Makanan 1985 baru sahaja dimulakan semenjak 1-10-1986. Oleh itu adalah terlalu awal untuk menilai dari segi pencapaian kejayaan-kejayaan yang besar. Walau bagaimanapun beberapa kejayaan telah dapat dicapai dalam masa yang singkat itu. Misalnya, dengan penguatkuasaan Akta Makanan oleh Pegawai-pegawai Berkuasa di bawah Kementerian Kesihatan dan Kerajaan-kerajaan Tempatan, para pengusaha makanan mula menyedari tanggungjawab mereka kepada pengguna. Para penjual juga mulai berwaspada supaya apa jua makanan yang dijual kepada orang ramai adalah makanan yang mematuhi kehendak-kehendak di bawah Peraturan-peraturan Makanan 1985.

Para pengguna juga telah menyedari lebih menyedari untuk menilai dan

membeli makanan-makanan yang bermutu dan bersih serta lebih mengetahui dan menuntut hak-hak mereka sebagai pengguna.

Kementerian juga mendapati bahawa semenjak pelaksanaan Peraturan-peraturan Makanan 1985, banyak makanan-makanan yang perlu dilabel mengikut undang-undang telah pun mula mematuhi peruntukan-peruntukan yang telah ditetapkan Makanan-makanan yang memerlukan penandaan tarikh juga telah didapati pada keseluruhannya mematuhi kehendak perundangan ini.

IMPORT BARANGAN MAKANAN UTAMA

25. Tuan Haji Abdul Hamid bin Haji Latif minta Menteri Pertanian menyatakan berapa banyakkah bahan-bahan seperti daging, beras, ikan dan jagung diimport dari luar negeri pada tiap-tiap tahun semenjak tahun 1982 hingga 1987 dan nyatakan harganya pada tiap-tiap bahan makanan pada tiap-tiap tahun. Adakah Kerajaan bercadang mengeluarkan bahan-bahan makanan tersebut secukup-cukup bagi keperluan negara. Jika ia, apakah rancangan Kerajaan dan jika tidak berikan sebab-sebabnya.

Tuan Mohd. Kassim bin Ahmed: Jumlah dan nilai import barangan makanan utama iaitu daging, beras, ikan dan jagung dari tahun 1982 hingga 1987 adalah seperti berikut:

IMPORT BARANGAN TERPILIH 1982-1987 MALAYSIA

Nilai: \$'000/-

Barangan	1982		1983		1984		1985		1986		1987	
	Kuantiti (T.M.)	Nilai (\$)	Kuantiti (T.M.)	Nilai (\$)	Kuantiti (T.M.)	Nilai (\$)	Kuantiti (T.M.)	Nilai (\$)	Kuantiti (T.M.)	Nilai (\$)	Kuantiti (T.M.)	Nilai (\$)
1. Daging & Persediaan	39,746	150,939.2	41,416	151,751.7	45,105	169,053.0	50,851	181,564.8	37,902	170,593.3	n.a.	180,889.0
2. Beras	403,038	330,206.3	358,256	236,012.0	436,520	275,640.0	428,417	257,059.6	191,180	118,058.8	198,030	104,703.0
3. Ikan, Krustasia & Moluska & Persediaan *	—	218,789.7	—	208,987.7	—	228,199.9	—	241,872.2	—	268,535.2	—	298,100.0
4. Jagung	683,297	230,277.0	777,533	268,394.6	863,874	304,364.5	959,157	286,633.1	981,854	255,026.8	—	286,770.0

Nota: * Kuantiti tidak dapat diperolehi disebabkan unit yang berlainan digunakan.

Kerajaan tidak bercadang untuk mengeluarkan barangan tersebut bagi memenuhi keperluan negara secukupnya memandangkan kos pengeluaran yang tinggi berbanding dengan harga import. Walau bagaimanapun, usaha sedang dipergiatkan untuk menambah pengeluaran dalam negeri barangan import yang dapat dihasilkan secara kompetitif.

Pada masa ini negara terpaksa mengimport bahan-bahan makanan ini kerana pengeluaran tempatan tidak mempunyai faedah berbanding mempunyai faedah berbanding disebabkan oleh kos pengeluaran yang lebih tinggi. Oleh itu, Kerajaan tidak bercadang mengeluarkan bahan-bahan tersebut untuk mencapai secukupnya bagi keperluan negara kecuali ke tahap yang sesuai selaras dengan keupayaan sumber seperti alternatif penggunaan tanah, peruntukan kewangan dan dayamaju. Walau bagaimanapun, usaha untuk meningkatkan peratus saradiri yang lebih tinggi akan dipergiat melalui kecekapan pengurusan dan peningkatan produktiviti.

Untuk makluman Yang Berhormat, dasar saradiri yang ada hanyalah beras iaitu 55-60%. Untuk ikan, Kerajaan ada matlamat untuk mengeluarkannya sehingga 100%. Berkaitan dengan jagung bijirin, Kerajaan pada masa ini melaksanakan penanaman secara percubaan bagi menentukan sistem penanaman yang berkesan dan berdaya maju sebelum menggalakkan penanamannya secara besar-besaran oleh pekebun-pekebun kecil serta pihak swasta. Bagi daging, Kerajaan akan mengekalkan tahap saradiri semasa iaitu kira-kira 50%.

Bagi meningkatkan pengeluaran daging lembu, selain daripada pemeliharaan secara tradisi, sistem penternakan secara berkurung berasaskan isirong kelapa sawit sebagai makanan utama sedang dipergiatkan. Sistem pengeluaran cara ini ialah secara intensif, jangkamasa pemeliharaan yang cepat di samping menghasilkan pengeluaran daging yang lebih bermutu.

Bagi meningkatkan paras pengeluaran ikan, Kerajaan telah mengambil langkah-langkah untuk menggalakkan perikanan laut dalam serta ternakair.

Pada keseluruhannya bagi menggalakkan komoditi-komoditi ini, Kementerian telah juga memperkenalkan beberapa insentif fiskal kepada pihak swasta untuk menceburi bidang ini secara besar-besaran.

PEPERIKSAAN SRP—PRESTASI PELAJAR

26. Dr Eng Khok Kiung minta Menteri Pendidikan menyatakan merujuk kepada peratus kelulusan bagi penuntut-penuntut SRP yang tercapai dalam tahun 1987 iaitu 66%.

- (i) apakah langkah-langkah yang telah diambil oleh pihak Kementerian Pendidikan untuk memperbaiki peratus kelulusan peperiksaan SRP yang akan datang ke sekurang-kurangnya 80% memandangkan taraf pendidikan yang telah tercapai di negara kita sejak merdeka; dan
- (ii) berapa lamakah yang diperlukan oleh pihak Kementerian untuk mencapai tahap peratus kelulusan tersebut.

Menteri Pendidikan (Tuan Anwar bin Ibrahim): Untuk makluman Ahli Yang Berhormat,

- (i) Usaha-usaha untuk mempertingkatkan prestasi pelajar-pelajar dalam peperiksaan SRP sebenarnya tergulung dalam langkah-langkah yang lebih menyeluruh untuk mempertingkatkan mutu pendidikan di negara ini. Untuk mempertingkatkan mutu pendidikan, Kementerian Pendidikan melaksanakan berbagai langkah seperti menyemak semula kurikulum dan kaedah

mengajar 'dari semasa ke semasa, membuat penyesuaian dalam latihan perguruan, mempertingkatkan kelayakan dan kemahiran guru membekalkan sumber-sumber pendidikan kepada tiap-tiap sekolah, meneruskan skim pinjaman buku teks, menambatkan kemudahan-kemudahan asrama untuk pelajar-pelajar dan perumahan untuk guru-guru dan memperbaiki iklim sekolah untuk melahirkan suasana pengajaran dan pembelajaran yang lebih menggalakkan;

- (ii) peratus yang disarankan oleh Ahli Yang Berhormat itu memakan masa untuk dicapai.

ORANG ASLI—TARAF HIDUP

27. Dato' Dr K. S. Nijhar minta Menteri Dalam Negeri menyatakan apakah langkah-langkah yang telah diambil beberapa tahun lepas untuk meningkatkan lagi taraf hidup Orang Asli.

Dato' Megat Junid bin Megat Ayob: Kerajaan telah merancang dan melaksanakan beberapa program dalam usahanya untuk memajukan lagi kehidupan masyarakat Orang Asli di negara ini. Program-program ini dapat dibahagikan kepada empat (4) bidang yang utama seperti berikut:

1. Pelajaran

Kerajaan telah mendirikan sebanyak 60 buah sekolah di 19 buah Daerah di seluruh Semenanjung yang diselenggarakan oleh 190 orang guru. Sekolah-sekolah ini dapat menampung seramai 11,593 orang murid. Bilangan murid Orang Asli

yang sedang belajar di berbagai peringkat persekolahan seperti berikut:

(a) Tabika	427 orang
(b) Sekolah Rendah	9,363 orang
(c) Sekolah Menengah Kerajaan	1,803 orang
(d) Sekolah Menengah Swasta	29 orang
(e) Pusat Pengajian Tinggi	49 orang
Jumlah	11,671 orang

Untuk ini Kerajaan telah membelanjakan sebanyak \$10,586,400.00 bagi tahun 1986. Peruntukan bagi tahun 1987 ialah sebanyak \$6.7 juta. Program ini dikendalikan bersama oleh Jabatan Hal Ehwal Orang Asli dan Kementerian Pelajaran.

2. *Perubatan dan Kesihatan*

Program ini dikendalikan bersama oleh Jabatan Hal Ehwal Orang Asli dan Kementerian Kesihatan. Ianya meliputi aktiviti-aktiviti berikut:

- (a) Perkhidmatan Doktor Terbang;
- (b) Perkhidmatan Kesihatan Keluaraga;
- (c) Perkhidmatan mengawal penyakit berjangkit dan bawaan vektor;
- (d) Perkhidmatan Kesihatan Alam Sekitar.

Selain daripada mengadakan perkhidmatan di Pos-pos Pendalaman, Kerajaan juga telah mendirikan hospital pusat di Gombak yang mempunyai 13 buah wad dan 450 buah katil. Bilangan masyarakat Orang Asli yang mendapat faedah daripada program Perubatan dan Kesihatan ini ialah seramai 19,309 orang dalam tahun 1985 dan 25,816 orang dalam tahun 1986.

3. *Pembangunan Sosio-Ekonomi*

Selain daripada program pelajaran dan Kesihatan, rancangan-rancangan pembangunan sosio-ekonomi adalah juga penting di dalam meningkatkan taraf hidup

masyarakat Orang Asli. Program ini dibahagikan kepada tiga (3) bahagian seperti berikut:

- (a) Aktiviti Ekonomi
- (b) Aktiviti Sosial
- (c) Rancangan Pengumpulan Semula

Ketiga-tiga aktiviti ini telah membolehkan masyarakat Orang Asli melibatkan diri di dalam projek-projek industri kecil, pertanian, perikanan dan lain secara lebih teratur dan produktif. Ianya dilaksanakan secara integrasi oleh Jabatan Hal Ehwal Orang Asli dan lain-lain agensi pelaksanaan di bidang-bidang berkenaan seperti FELDA, FELCRA, Jabatan-jabatan Pertanian dan Perikanan, serta "Regional Development Authorities" yang lain.

4. *Keselamatan*

Program-program pelajaran, kesihatan dan pembangunan dijalankan di bawah konsep "Keselamatan Melalui Pembangunan", yang memberi erti segala aktiviti untuk memajukan Orang Asli adalah bertujuan untuk membawa kesejahteraan kepada mereka agar pengaruh berbagai anasir bawah tanah, komunis dan antinasional dapat disekat daripada meresapi masyarakat Orang Asli. Berbagai kursus penerangan mengenai ancaman ini sering diadakan untuk menyedarkan masyarakat Orang Asli mengenai ancaman-ancaman keselamatan yang sentiasa terdedah kepada mereka.

TUNTUTAN FILIPINA ATAS SABAH

28. Tuan C. Krishnan minta Menteri Luar Negeri menyatakan setakat manakah kedudukan penyelesaian di antara Filipina dengan Malaysia ke atas tuntutan Negeri Sabah.

Toh Muda Dr Abdullah Fadzil bin Che Wan: Walaupun terdapat usaha-usaha oleh Pentadbiran Aquino untuk menggugurkan tuntutan kedaulatan ke atas Sabah dan berazam untuk menyelesaikannya sebelum Sidang Kemuncak ASEAN ke 3 di Manila, namun azamnya telah menemui jalan buntu, dan sehingga kini usaha-usaha ke arah menggugurkan tuntutan kedaulatan ke atas Sabah masih menghadapi beberapa masalah dan kerumitan, terutamanya yang berpunca dari Bill Senate yang telah mengenakan beberapa syarat sebelum tuntutan kedaulatan ke atas Sabah digugurkan.

Malaysia berpendirian bahawa terserahlah kepada Filipina untuk menggugurkan tuntutan ke atas Sabah secara "definitive" dan tanpa syarat, apabila ia telah bersedia untuk berbuat demikian.

LEBUHRAYA UTARA-SELATAN—PEMBINAAN

29. Tuan Haji Abu Bakar bin Lajim minta Menteri Kerja Raya menyatakan bilakah projek Lebuhraya Utara-Selatan akan dimulakan. Apakah langkah-langkah yang telah diambil bagi memastikan penyertaan maksima kontraktor-kontraktor bumiputera apabila projek ini dimulakan kelak.

Dato' S. Samy Vellu: Sebagaimana Ahli Yang Berhormat sedia maklum, perjanjian Pembinaan Lebuhraya Utara-Selatan telah pun ditandatangani pada 18 Mac 1988. Mengikut perjanjian itu pembinaannya akan bermula lebihkurang 8 bulan daripada tarikh tersebut.

Mengenai penyertaan bumiputera di dalam projek ini, sukaiah saya nyatakan bahawa telah disyaratkan sekurang-kurangnya 30% kerja-kerja kontrak diberi kepada bumiputera.

KRITIK ATAS PENTADBIRAN KERAJAAN

30. Tuan Chan Choong Tak minta Menteri Dalam Negeri memberikan satu garis panduan yang jelas ternyata yang apakah kritikan-kritikan atas pentadbiran Kerajaan yang dianggap sebagai:

- (i) kritikan membina; dan
- (ii) kritikan yang dianggap sebagai antinasional atau subversif

Dato' Megat Junid bin Megat Ayob: Kritikan yang dianggap sebagai membina adalah yang bermaksud untuk memelihara keselamatan negara, perkhidmatan-perkhidmatan perlu dan kehidupan ekonomi negara dan kritikan yang dianggap sebagai anti-nasional atau subversif adalah yang bermaksud sebaliknya.

RANCANGAN IMUNISASI BAGI KANAK-KANAK/BAYI

31. Puan Mazidah Haji Zakaria minta Menteri Kesihatan menyatakan tentang program atau rancangan imunisasi bagi kanak-kanak dan bayi di seluruh negara mengikut negeri-negeri. Berapa ramai yang kematian bayi yang dapat dikesan yang berkemungkinan akibat dari bayi-bayi ini tidak menerima kemudahan imunisasi ini dan apakah langkah-langkah yang diambil oleh Kementerian Kesihatan bagi memastikan dan mempertingkatkan kesedaran ibubapa tentang pentingnya program imunisasi ini bagi bayi-bayi mereka.

Dato' K. Pathmanaban: Program atau rancangan imunisasi bagi kanak-kanak dan bayi di seluruh negara mengikut negeri-negeri telah diadakan secara berperingkat-peringkat sejak tahun 1970an lagi. Pada masa ini, imunisasi diberi bagi melindungi bayi

dan kanak-kanak dari penyakit Tibi, Batuk Kokol, Sakit Kerongkong (Diphtheria), Sakit Poliomyelitis, Tetanus Neonatorum, Kancing Gigi dan Demam Campak.

Imunisasi bagi kanak-kanak dan bayi ini boleh didapati semasa sesi klinik kesihatan kanak-kanak di Pusat Kesihatan, Klinik Kesihatan Ibu dan Kanak-kanak, Klinik Desa, Klinik Tambahan, Pasukan Kesihatan Bergerak dan juga Klinik Kuasa Tempatan.

Imunisasi bagi kanak-kanak sekolah diberi semasa sesi perkhidmatan kesihatan sekolah oleh Pasukan Kesihatan Sekolah. Semua imunisasi ini diberi dengan percuma. Bagi mendapatkan perlindungan sepenuhnya adalah penting jadual imunisasi diikuti dengan tepat.

Sejak Program Imunisasi diadakan, bilangan kes-kes dan kematian disebabkan penyakit-penyakit yang boleh dicegah dengan imunisasi telah berkurangan. Misalnya, pada tahun 1986, kematian disebabkan penyakit diphtheria adalah 9, tetanus 6 dan demam campak 18. Tiada kematian dilaporkan disebabkan oleh penyakit batuk kokol dan poliomyelitis. Walau bagaimanapun, kejadian kes (outbreak) masih terjadi dari masa ke semasa disebabkan bayi dan kanak-kanak tidak diberi imunisasi atau tidak menerima imunisasi dengan sepenuhnya.

Kementerian Kesihatan telah mengenalpasti daerah-daerah yang mempunyai liputan imunisasi yang rendah serta menyediakan pelan tindakan bagi memperbaiki keadaan tersebut. Semua aktiviti imunisasi termasuk pendidikan kesihatan bagi meningkatkan kesedaran ibubapa tentang pentingnya program imunisasi bagi bayi mereka, telah dipertingkatkan. Di samping itu, kempen imunisasi juga diadakan.

Lawatan ke rumah untuk mengesan kes-kes keciciran telah diperbanyakkan. Kementerian Kesihatan juga mengadakan latihan mengenai imunisasi kepada kakitangan kesihatan untuk meningkatkan pengetahuan dan prestasi mereka.

INTEGRASI NASIONAL

32. Tuan Azman Atar bin Othman minta Perdana Menteri menyatakan iaitu berkaitan dengan integrasi nasional perhubungan Sabah dan Sarawak apakah perkembangan dan kemajuan yang telah dicapai.

Tuan Othman bin Abdul: Banyak perkembangan dan kemajuan telah dicapai di dalam aspek integrasi di antara negeri-negeri Sabah dan Sarawak dengan Semenanjung. Kerajaan mengambil langkah-langkah melalui strategi penggalakan seperti menggalakkan lawatan pemimpin-pemimpin masyarakat dari Wilayah Sabah, Sarawak ke Semenanjung dan sebaliknya.

Pada hari-hari perayaan yang tertentu Kerajaan Persekutuan juga menganjurkan lawatan-lawatan khas untuk pemimpin-pemimpin masyarakat dari Sabah dan Sarawak ke Semenanjung. Pemimpin-pemimpin masyarakat yang bergiat cergas di dalam aktiviti sosial di dalam sektor Rukun Tetangga juga dihantar ke Sabah dan Sarawak untuk lawatan sambil belajar di samping mengeratkan perhubungan muhibah.

Selain daripada itu Kerajaan menggalakkan program pertukaran anak angkat melalui kelab-kelab kebajikan, agensi-agensi Kerajaan serta program lawatan belia-belia dengan kemudahan pengangkutan Feri Malaysia atau Sistem Penerbangan Malaysia (MAS) melalui tambang istimewa.

Di dalam perkhidmatan awam pula langkah-langkah telah juga diambil untuk meningkatkan integrasi di kalangan pegawai-pegawai yang berkhidmat di negeri-negeri Sabah, dan Sarawak dan Semenanjung.

Langkah-langkah itu meliputi orientasi kepada pegawai-pegawai awam dari Semenanjung yang berkhidmat di Sabah dan Sarawak. Program penempatan pegawai-pegawai dari Semenanjung ke Sabah dan Sarawak serta sebaliknya telah dipesatkan lagi.

Di samping itu juga Minggu Integrasi juga dilaksanakan di negeri Sarawak, manakala program lawatan untuk kakitangan rendah melalui kelab-kelab kebajikan yang dibantu oleh Jabatan masing-masing juga diberi penekanan.

Untuk mempertingkatkan tahap integrasi ini penyelarasan bayaran elaun perkhidmatan awam telah juga diluluskan oleh Kerajaan. Di dalam usaha-usaha ke arah penyebaran maklumat yang lebih luas mengenai negeri-negeri di Sabah dan Sarawak, pihak RTM juga telah memperbanyakkan program-program yang ada kaitan dengan negeri-negeri tersebut.

Satu lagi kejayaan dari segi sebaran am ialah dengan menurunkan harga akhbar-akhbar kebangsaan yang diterbitkan di Semenanjung untuk dijual di Sabah dan Sarawak. Penyelarasan harga akhbar juga telah dapat dibuat apabila pencetak mencatatkan harga tiap-tiap naskah akhbar-akhbar kebangsaan yang dijual di Sabah dan Sarawak.

Kebanyakan daripada langkah-langkah yang telah dilaksanakan itu memperolehi kejayaan yang sangat berkesan.

RUKUNEGARA

33. Tuan Tan Chai Ho minta Perdana Menteri menyatakan sama ada Kerajaan masih mengutamakan prinsip-prinsip Rukunegara secara serius demi memupuk perpaduan di kalangan rakyat. Jika ya, apakah strategi yang telah dirumuskan untuk mengamalkannya di kalangan rakyat yang berbilang kaum.

Tuan Othman bin Abdul: Memang benar Kerajaan masih mengutamakan prinsip-prinsip Rukunegara secara serius demi memupuk perpaduan di kalangan rakyat.

Strategi yang utama ialah melalui pelaksanaan semua dasar-dasar Kerajaan dengan cermat supaya selaras dengan usaha untuk mencapai matlamat perpaduan di kalangan rakyat.

Semua prinsip-prinsip yang utama dalam Rukunegara seperti keadilan, kemakmuran, liberal terhadap tradisi budaya masing-masing dan progresif dalam menggunakan sains dan teknologi terserap dalam proses dan matlamat pelaksanaan dasar-dasar tersebut.

Dengan secara sedar atau tidak sedar prinsip-prinsip ini sentiasa diterapkan dalam pelaksanaan beberapa kegiatan-kegiatan anjuran agensi-agensi kerajaan khususnya yang ada kaitan secara langsung dengan orang ramai.

Strategi yang kedua ialah melalui majlis penerangan dan taklimat berkaitan dengan peri mustahaknya masyarakat menghayati nilai-nilai kewarganegaraan dan perpaduan, khususnya yang berkaitan dengan Kepercayaan kepada Tuhan, Kesetiaan kepada Raja dan Negara serta Perlembagaan dan Undang-undang untuk dimasyarakatkan dalam kehidupan harian mereka.

Strategi yang ketiga ialah dengan menggalakkan semua lapisan masyarakat sama ada dari agensi Kerajaan atau bukan Kerajaan untuk menghormati lambang-lambang atau simbol-simbol negara seperti bendera-bendera kebangsaan atau negeri-negeri dan sentiasa bersedia menyanyikan lagu-lagu kebangsaan, patriotisme dan sosial seperti lagu Negaraku, lagu Setia, lagu Kejiranan, lagu Cintailah Bahasa Malaysia sebagainya di majlis dan upacara-upacara tersebut yang mereka adakan.

PERKHIDMATAN PENGANGKUTAN KONTENA

34. Tuan Ng Peng Hay minta Menteri Perusahaan Awam menyatakan:

- (a) berapa buah syarikat yang telah diberi lesen untuk kontena bagi import dan eksport;
- (b) adakah Kementerian sedar bahawa perkhidmatan kontena telah dimonopoli oleh syarikat-syarikat yang tertentu sehingga kos pengangkutan yang dikenakan tidak munasabah. sebagai contoh satu kontena yang berukuran 40 kaki, bayaran yang dikenakan dari kawasan perindustrian Air Keroh Melaka Port Klang tiap-tiap satu perjalanan \$1,470/- dan punggah memunggah hanya diberi 4 jam sahaja; dan
- (c) adakah Kementerian bercadang untuk membukakan lesen kontena kepada beberapa syarikat lain dengan tujuan ada persaingan dalam harga dan prestasi perkhidmatan.

Menteri Perusahaan Awam (Dato Napsiah binti Omar):

- (a) Tiga (3) buah syarikat iaitu Kontena Nasional Sdn. Bhd.

Shapadu Holdings Sdn. Bhd. dan Konsortium Perkapalan Bhd. telah diluluskan lesen untuk menjalankan perkhidmatan pengangkutan kontena di Semenanjung Malaysia.

- (b) Kementerian Perusahaan Awam sememangnya sedar akan adanya sungutan-sungutan daripada pengguna-pengguna perkhidmatan pengangkutan kontena yang menyatakan kadar tambang pengangkutan yang dikenakan oleh pengusaha-pengusaha yang ada tidak begitu munasabah.

Untuk memastikan sama ada dakwaan sedemikian benar atau tidak Kementerian Perusahaan Awam telah meminta ketiga-tiga pengusaha yang ada memberikan maklumat-maklumat mengenai asas-asas kadar tambang yang mereka gunakan di masa ini. Ini bertujuan untuk menentukan supaya pulangan atas kos operasi mereka adalah munasabah dan kadar tambang yang digunakan mencerminkan hakikat ini dengan mengambil kira aspek khusus dari segi pengangkutan kontena. Kementerian Perusahaan Awam juga bercadang mengadakan kadar tambang khas bagi pengangkutan kontena.

- (c) Buat masa ini Kementerian belum bercadang untuk mengeluarkan lesen kontena kepada pengusaha-pengusaha baru kerana Kementerian berpendapat permintaan bagi pengangkutan kontena masih boleh dibekalkan oleh pengusaha-pengusaha yang ada. Walau bagaimanapun kedudukan industri pengangkutan kontena di Semenanjung Malaysia sentiasa dikaji dari

masa ke semasa untuk memastikan supaya keperluan pengangkutan kontena dapat dipenuhi dan sekiranya didapati ada keperluan tambahan Kementerian akan bersedia menimbangkan permohonan-permohonan dari pemohon-pemohon yang berminat.

TABUNG HAJI—SKIM GALAKAN ORANG ISLAM

35. Puan Hajjah Azizah binti Haji Mohd. Said minta Perdana Menteri menyatakan adakah Kerajaan akan memperkenalkan Skim Galakan kepada orang-orang Islam menyimpan wang mereka dengan Lembaga Urusan dan Tabung Haji dan diberi pengecualian daripada Cukai Pendapatan sama seperti pengecualian cukai yang diberi kepada bayaran insuran nyawa yang tidak lebih dari \$50,000.00 setahun.

Tuan Othman bin Abdul: Kerajaan bercadang untuk mengadakan Skim Galakan kepada orang-orang Islam yang menyimpan wang di Tabung Haji dan diberi pengecualian dari Cukai Pendapatan oleh kerana implikasinya adalah sangat besar dan perlu dikaji secara mendalam.

Adalah dimaklumkan bahawa pada masa ini bonus yang dibayar oleh Tabung Haji kepada pendeposit-pendeposit adalah dikecualikan sepenuhnya dari Cukai Pendapatan. Pengecualian ini berkuatkuasa mulai tahun taksiran 1987. Dengan itu pendeposit tidak perlu mengisytiharkan dalam penyata Cukai Pendapatannya jumlah bonus yang diperolehi atas simpanannya di Tabung Haji. Sebelum ini jumlah bonus atas deposit \$10,000.00 ke bawah sahaja yang dikecualikan dari Cukai Pendapatan.

PELAJAR TAJAAN KERAJAAN DI LUAR NEGERI

36. Tuan Haji Shaharom bin Haji Maasom minta Menteri Pendidikan menyatakan sehingga 31hb Disember, 1987, berapa ramaikah jumlah pelajar kita menuntut di luar negeri:

- (a) tajaan Kerajaan Malaysia dan tajaan badan-badan berkanun Kerajaan dan separuh Kerajaan;
- (b) jumlah mereka yang belajar dengan belanja sendiri;
- (c) negeri-negeri mana penuntut kita belajar; dan
- (d) adakah Kerajaan bercadang mengurangkan jumlah pelajar ke luar negeri.

Tuan Anwar bin Ibrahim: Untuk makluman Ahli Yang Berhormat:

- (a) Jumlah pelajar Tajaan Kerajaan, badan-badan berkanun dan separuh Kerajaan yang berada di luar negeri hingga akhir tahun 1987 ialah seramai 18,280 orang.
- (b) Jumlah mereka yang melanjutkan pelajaran di luar negeri dengan perbelanjaan sendiri dianggarkan seramai 40,203 orang.
- (c) Negara-negara di mana pelajar-pelajar Malaysia berada ialah di Australia, Bangladesh, Belgium, Perancis, Kanada, India, Indonesia, Jerman Barat, New Zealand, Pakistan, Iraq, United Kingdom, Turkey, U.S.A., Jepun, Morocco, Arab Saudi, Mesir dan Korea Selatan; dan
- (d) Kerajaan telah memutuskan untuk mengurangkan penghantaran pelajar tajaan ke luar negeri dan pelajar-pelajar hanya dihantar ke luar negeri bagi mengikuti kursus-kursus yang

tidak terdapat di universiti-universiti tempatan atau bagi kursus-kursus yang tempatnya terhad di universiti-universiti tempatan.

BAHASA BAKU—PELAKSANAAN

37. Puan Ainon binti Ariffin minta Menteri Pendidikan menyatakan mengenai langkah-langkah yang telah diusahakan bagi pelaksanaan "Bahasa Baku" supaya segera berkesan dan diamalkan di seluruh negara.

Tuan Anwar bin Ibrahim: Untuk makluman Ahli Yang Berhormat, di antara langkah-langkah yang telah diusahakan bagi pelaksanaan bahasa baku, adalah seperti berikut:

- (i) Mengadakan kursus tentang pedoman dan cara sebutan baku kepada pelbagai peringkat tenaga pengajar, khususnya melalui maktab pendidikan guru, melalui kursus dalam perkhidmatan dan kursus intensif khas. Program untuk melatih guru-guru bagi Kelas Peralihan dan Tingkatan 1 telah dirancang dan akan disempurnakan pada tahun ini.
- (ii) Mengedarkan risalah-risalah atau buku panduan tentang pedoman dan cara sebutan baku yang betul kepada semua pegawai, pensyarah dan guru.
- (iii) Mengadakan siri penerangan tentang pedoman dan cara sebutan baku yang betul melalui perkhidmatan sebaran pendidikan, khususnya melalui radio dan televisyen pendidikan.
- (iv) Untuk mengadakan proses pelaksanaan sebutan baku ini, Kementerian Pendidikan akan menggalakkan penggunaannya dalam semua situasi formal atau keadaan rasmi.

LEBUHRAYA DAN LERENG BUKIT—PERBELANJAAN MEMBAIKI

38. Puan Noraini binti Haji Beluah minta Menteri Kerjaraya menyatakan:

- (a) berapakah kos perbelanjaan bagi membaiki lebuhraya dan juga mengubahsuaikan lereng-lereng Bukit di Sepanjang Lebuhraya Karak-Kuala Lumpur; dan
- (b) bilakah tempoh kerja-kerja yang tersebut dapat diselesaikan sepenuhnya.

Dato' S. Samy Vellu:

- (a) Kos perbelanjaan bagi membaiki dan mengubahsuaikan lereng-lereng bukit dan perkara-perkara yang berkaitan di sepanjang jalan raya Kuala Lumpur-Karak ialah dianggarkan \$46.02 juta.
- (b) Kerja-kerja tersebut dijangka siap sepenuhnya pada awal bulan Ogos 1988.

JAMBATAN PULAU PINANG—KADAR TOL

39. Puan Hajjah Salbiah bte Mohd. Akim minta Menteri Kerjaraya menyatakan bilakah pihak Kementerian akan menurunkan kadar tol jambatan Pulau Pinang, sebagaimana yang telah disebutkan satu masa dulu oleh Menteri Kerjaraya, kerana memandangkan lebih banyak menggunakan feri untuk masuk ke Pulau Pinang dan banyak menggunakan jambatan sewaktu untuk keluar dari Pulau Pinang. Kemungkinan dengan ramai pengguna akan melebihi kadar pendapatan setiap bulan.

Dato' S. Samy Vellu: Untuk makluman Ahli Yang Berhormat, Kerajaan sememangnya ada cadangan

untuk menurunkan kadar tol di jambatan Pulau Pinang. Kajian mendalam telah pun dibuat dan didapati bahawa adalah tidak wajar menurunkan kadar tol seperti yang dicadangkan itu. Ini kerana dengan penurunannya kadar tol tersebut lebih ramai pengguna-pengguna yang dahulunya menggunakan feri akan menggunakan jambatan. Keadaan ini akan menjejaskan pendapatan feri, dan seterusnya kemungkinan besar akan berlaku pembuangan pekerja-pekerja feri. Kerajaan tidak mahu perkara ini berlaku dan oleh hal yang demikian Kerajaan telah membatalkan cadangan menurunkan kadar tol.

Berhubung dengan kenyataan Ahli Yang Berhormat bahawa lebih ramai pengguna yang menggunakan jambatan Pulau Pinang semasa pulang ke Tanah Besar, jika berbanding dengan bilangan pengguna dari pulau ke Tanah Besar, ini adalah tidak benar. Untuk makluman Ahli Yang Berhormat, mengikut perangkaan, bilangan pengguna-pengguna yang melalui jambatan Pulau Pinang dari kedua-dua hala telah bertambah, ini dibuktikan dengan meningkatkan pungutan tol setiap bulan.

NAIK HAJI LEBIH DARI SEKALI

40. Tuan Haji Abdul Majid bin Haji Abdullah minta Perdana Menteri menyatakan:

- (a) apakah hasil kajian bagi orang Islam yang naik Haji lebih dari sekali.

Tuan Othman bin Abdul:

- (a) Hasil kajian implikasi Jemaah Haji menunaikan Haji lebih dari sekali belum dapat diumumkan lagi kerana ia masih berada di peringkat akhir penyediaan.

KOMPLEKS PERIKANAN DI PULAU WAN DAGANG

41. Tuan Mustaffa bin Awang minta Menteri Pertanian menyatakan sehingga kini sejauh mana tindakan telah diambil oleh pihak Kementerian yang berkenaan mengenai pelaksanaan pembinaan Kompleks Perikanan Laut, di Pulau Wan Dagang, Kemaman, Terengganu.

Tuan Mohd. Kassim bin Ahmed: Adalah dimaklumkan bahawa LKIM tidak ada rancangan untuk membina Kompleks Perikanan di Pulau Wan Dagang, Kemaman kerana sebuah kompleks perikanan telah pun siap dibina di Kuala Kemaman. Kompleks tersebut yang berharga \$1.0 juta telah pun beroperasi mulai 1hb Ogos, 1987. Kompleks ini boleh menampung pendaratan untuk semua bot penangkapan ikan di kawasan Kemaman.

UDA—PROGRAM PEMBANGUNAN

42. Tuan Haji Hamid Araby bin Haji Mohd. Salleh minta Menteri Perusahaan Awam menyatakan adakah benar UDA lebih mengutamakan keuntungan daripada membantu rakyat berpendapatan rendah, iaitu berlawanan dengan objektif asal ianya ditubuhkan. Jika benar, apakah langkah-langkah yang diambil untuk membetulkannya.

Dato Napsiah binti Omar: Adalah tidak benar bahawa UDA lebih mengutamakan keuntungan daripada membantu rakyat berpendapatan rendah dalam perancangan dan pelaksanaan program-program pembangunannya. Hakikat ini jelas di mana UDA telah dan akan terus merangka dan melaksanakan program-program dan projek-projek yang bukan sahaja bercorak komersial tetapi juga yang bercorak sosial. Ini memang sentiasa diberi perhatian oleh

UDA selaras dengan objektif penubuhannya, iaitu untuk memaju dan melaksanakan projek-projek pembangunan bandar di kawasan-kawasan tertentu dalam Malaysia bagi maksud menyusun semula masyarakat di bandar-bandar.

Projek-projek komersial yang dilaksanakan oleh UDA dipasarkan mengikut harga pasaran untuk mendapatkan aliran tunai bagi membiayai projek-projeknya yang lain. Bagi projek-projek sosial pula, harga jualan atau kadar sewanya adalah lebih rendah daripada kadar yang dikenakan bagi projek-projek komersialnya bahkan ada ketikanya di bawah paras harga kos, mengikut jenis projek itu. Ini dilakukan bagi membantu rakyat yang berpendapatan rendah, khususnya golongan bumiputera, untuk menceburkan diri dalam perniagaan atau untuk memiliki harta. Di samping itu, UDA juga memberi khidmat nasihat secara percuma dan bantuan wang pendahuluan tanpa faedah kepada pemilik-pemilik tanah bumiputera di bawah Program Khidmat Nasihatnya.

Berikutan dengan dasar untuk membantu golongan rakyat yang berpendapatan rendah, khususnya bumiputera, UDA telah mengorbankan pendapatan yang berjumlah \$126 juta. Jumlah ini merupakan subsidi yang telah diberikan kepada rakyat dalam bentuk pengenaan kadar sewa dan harga jualan yang lebih rendah daripada kadar pasaran.

PEMBINAAN RUMAH TERGENDALA

43. Tuan Lau Keng Siong minta Menteri Perumahan dan Kerajaan Tempatan menyatakan apakah langkah-langkah diperlukan oleh Kementerian tentang pembinaan rumah yang telah tergendala selama

lima tahun di Taman Sharifah, Jalan Bakri Muar dan Taman Indah Jalan Sungei Abong Muar.

Timbalan Menteri Perumahan dan Kerajaan Tempatan (Tuan Haji Hussein bin Ahmad): Projek perumahan Taman Sharifah, Muar pada asalnya telah dimajukan oleh Syarikat Perumahan Taman Baserah Sdn. Bhd. Projek ini mengandungi 134 unit rumah berbagai jenis seperti berikut:

1.1 Rumah murah	— 67 unit
1.2 Rumah teres satu tingkat	— 28 unit
1.3 Rumah teres dua tingkat	— 20 unit
1.4 Rumah berkembar	— 8 unit
1.5 Rumah kedai empat tingkat	— 9 unit
1.6 Rumah sesebuah	— 2 unit
	<hr/> 134 unit <hr/>

Projek ini telah dimulakan dalam tahun 1981 dan telah terbengkalai dalam tahun 1983.

Kementerian berpendapat bahawa kegagalan untuk menyiapkan projek ini adalah disebabkan oleh faktor-faktor yang berikut:

- 2.1 Pemaju menghadapi masalah aliran tunai.
- 2.2 Pengurusan syarikat yang tidak cekap.
- 2.3 Masalah beberapa lot tanah yang terlibat dengan rezab Jabatan Parit dan Tali Air, Daerah Muar.

Jawatankuasa Bertindak Pembeli-pembeli telah ditubuhkan dalam pertengahan tahun 1983. Usaha-usaha telah dibuat di antara Jawatankuasa Bertindak Pembeli-pembeli dan tuan tanah untuk projek, tetapi usaha-usaha tersebut tidak mencapai sebarang kejayaan.

Oleh kerana usaha-usaha yang dilakukan tidak berhasil, pihak Kementerian ini telah mengambil inisiatif menubuhkan Jawatankuasa Bertindak yang baru pada akhir tahun 1986. Jawatankuasa Bertindak yang baru ini telah mendapat Surat Kuasa (Power of Attorney) daripada tuan tanah bagi menyiapkan projek tersebut.

Usaha-usaha di peringkat akhir telah dibuat di mana pihak Jawatankuasa Bertindak Pembeli, Bank Bumiputra (M) Berhad, peguam pembeli, Kementerian dan kontraktor yang dilantik sedang membincangkan cara-cara untuk memulihkan projek Penyediaan "Jaminan Bank" kepada kontraktor yang akan melaksanakan pembinaan secara "Siap Bayar" (Turnkey) bagi Fasa I juga sedang diusahakan.

Kementerian sedang merancang agar semua pembayaran dibuat melalui peguam, supaya masalah pembinaan dapat dilaksanakan dengan lancar dan licin.

Projek Taman Indah telah dimajukan oleh Benaraya Development Sdn. Bhd. Projek ini telah diletakkan di bawah Pegawai Penerima (receivership) oleh pihak Eu Finance Berhad iaitu, "Institusi Kewangan yang memberikan pinjaman Bridging Finance". Oleh kerana syarikat tersebut telah diletakkan di bawah Pegawai Penerima, maka Pegawai Penerima adalah bertanggungjawab untuk menguruskan penyiapan projek tersebut. Bahagian Penguatkuasa, Kementerian Perumahan dan Kerajaan Tempatan akan menghubungi agensi-agensi yang terlibat untuk mengetahui perkembangan projek tersebut dari masa ke semasa.

RASUAH KAKITANGAN KERAJAAN

44. Puan Hajjah Rosnah binti Haji Mohd. Salleh minta Perdana Menteri menyatakan adakah benar ramai kakitangan Kerajaan Kumpulan A-D ditangkap kerana rasuah:

- berapa ramaikah bilangan Kakitangan Kumpulan A, B, C, D yang terlibat;
- mengapa rasuah itu berlaku;
- bagaimana cara-cara untuk mengatasi perkara di atas.

Tuan Othman bin Abdul: adalah "TIDAK BENAR" menyatakan bahawa ramai kakitangan Kerajaan di dalam Kumpulan "A" hingga "D" telah ditangkap kerana kesalahan rasuah. Buktinya sejak tahun 1981 jumlah keanggotaan perkhidmatan awam adalah kira-kira seramai 800,000 orang berbanding dengan 1,195 orang kakitangan Kerajaan yang telah ditangkap oleh BPR kerana kesalahan rasuah:

- Bagi tempoh 3 tahun yang lepas, iaitu dari tahun 1985 hingga bulan Februari 1988 seramai 529 orang kakitangan Kerajaan telah ditangkap dan pecahan mengikut kumpulan ialah:

Kumpulan A	— 62 orang
Kumpulan B	— 50 orang
Kumpulan C	— 158 orang
Kumpulan D	— 259 orang
Jumlah	— 529 orang

- Setakat ini belum ada penyelidikan akademik atau kajian yang khusus dijalankan ke atas punca-punca yang menyebabkan berlakunya rasuah. Walau bagaimanapun, berdasarkan pengalaman BPR, antara fakta-fakta yang dikenalpasti yang menjadi

punca kepada perubatan rasuah adalah seperti berikut:

- (i) fakta kelemahan individu seperti ingin cepat kaya, kurang pendidikan agama serta nilai moral rendah;
 - (ii) menyenggara hidup lebih dari pendapatan.
 - (iii) kelonggaran di dalam penguatkuasaan undang-undang dan peraturan;
 - (iv) modenisasi dan pembangunan ekonomi yang pesat yang menyebabkan masyarakat hidup berlumba-lumba; dan
 - (v) fakta kebudayaan dan adat resam;
- (c) Berbagai cara dan pendekatan dilaksanakan sepanjang masa di dalam usaha BPR untuk mencegah rasuah. Antara usaha-usaha yang dilakukan oleh BPR ke arah mengurangkan amalan rasuah ialah:
- (i) mengadakan perjumpaan dan perbincangan secara tertutup dengan Ketua-ketua Jabatan dan pegawai-pegawai tinggi Kerajaan mengenai masalah rasuah dan cara-cara mengatasinya di Jabatan berkenaan;
 - (ii) menghendaki pegawai-pegawai Kerajaan yang mempunyai harta yang banyak supaya memberi penjelasan tentang cara harta-harta tersebut diperolehi;
 - (iii) menjalankan kajian dan penyelidikan ke atas sistem pengurusan dan pentadbiran sesuatu Jabatan untuk mengenalpasti peluang-peluang

rasuah yang wujud dan seterusnya membuat perakuan-perakuan untuk mengatasinya;

- (iv) mengadakan lawatan-lawatan mengejut ke atas Jabatan-jabatan Kerajaan yang mana BPR sering menerima maklumat rasuah dan penyelewengan;
- (v) mengadakan usahasama dengan pihak-pihak tertentu di dalam mengendalikan sekatan-sekatan jalan yang bertujuan untuk memberkas pemberi-pemberi rasuah;
- (vi) mengadakan pemeriksaan mengejut ke atas pegawai-pegawai penguatkuasaan yang sedang bertugas di kaunter-kaunter untuk memastikan mereka tidak menerima rasuah;
- (vii) mempergiatkan lagi kempen pencegahan rasuah dengan menganjurkan ceramah-ceramah, sesi dialog, forum dan seumpamanya sebagai usaha untuk menyebarkan maklumat mengenai rasuah dan kesan buruknya kepada semua lapisan masyarakat termasuk penuntut-penuntut; dan
- (viii) menerbitkan dan mengedar bahan-bahan penerangan dan bacaan kepada orang ramai terutamanya kakitangan Kerajaan untuk menimbulkan kesedaran serta peringatan tentang bahaya rasuah dan menghendaki mereka tampil untuk bekerjasama dengan BPR.

KOMPLEKS PERIKANAN LKIM

45. Dr Tan Chong Keng minta Menteri Pertanian menyatakan:

- (a) bilangan dan lokasinya kompleks-kompleks perikanan yang dibina oleh Lembaga Kemajuan Perikanan Malaysia (LKIM) di seluruh Malaysia; dan
- (b) apakah cara jualbeli yang diamalkan di kompleks perikanan LKIM.

Tuan Mohd. Kassim bin Ahmed:

- (a) Sehingga akhir 31hb Disember, 1987, sebanyak 11 buah Kompleks/Labuhan Perikanan telah dibina dan sedang beroperasi. Lokasi kompleks-kompleks tersebut adalah seperti berikut:

Bil.	Nama Kompleks	Lokasi
1.	Kompleks Perikanan LKIM Genting	Tumpat, Kelantan
2.	Kompleks Perikanan LKIM Kuala Besut	Terengganu
3.	Kompleks Perikanan LKIM Pulau Kambang	Terengganu
4.	Pelabuhan Perikanan, Chendering	Terengganu
5.	Kompleks Perikanan LKIM Kuala Kemaman	Terengganu
6.	Kompleks Perikanan LKIM Mersing	Johor
7.	Kompleks Perikanan LKIM Kuala Sedili	Johor
8.	Kompleks Perikanan LKIM Batu Maung	Pulau Pinang
9.	Kompleks Perikanan LKIM Kuala Kedah	Kedah
10.	Kompleks Pemeriksaan LKIM Bukit Kayu Hitam	Kedah
11.	Kompleks Perikanan LKIM Bintawa	Sarawak

- (b) Cara jualbeli yang diamalkan di beberapa buah kompleks LKIM ialah cara jualan ikan terbuka (lelong). Ikan tangkapan nelayan ditawarkan kepada

pembeli berlesen dan pembeli yang menawarkan harga yang tinggi memperoleh barangan berkenaan. Sistem ini bertujuan untuk membanteras perbuatan eksploitasi orang tengah ke atas nelayan. Sistem ini diamalkan di kompleks-kompleks Genting, Kelantan; Mersing dan Kuala Sedili, Johor; Kuala Kedah, Kedah; dan Batu Maung, Pulau Pinang. Di lain-lain kompleks mengamalkan sistem jualan kiriman (consignment) dan sistem ini juga akan beransur digantikan dengan sistem lelong.

Kompleks pemeriksaan Bukit Kayu Hitam tidak menjalankan urusan jualbeli ikan. Ia cuma memeriksa ikan yang diimport dari luar negeri.

ORANG ASLI—MEMAJUKAN TARAF HIDUP

46. Tuan Hassan bin Nam minta Perdana Menteri menyatakan iaitu sama ada Kerajaan pernah membuat sebarang kajian Sosio-ekonomi terhadap masyarakat Orang Asli di Semenanjung yang mana sebahagian dari mereka kebanyakannya masih mengamalkan bertani secara tradisi yang hasilnya kebanyakan tidak menjamin masa depan mereka dan jauh di kawasan pedalaman. Jika ada, apakah hasil dan tindakan yang telah diambil atau akan diambil selanjutnya.

Dato' Megat Junid bin Megat Ayob: Kerajaan telah merancang dan melaksanakan beberapa program dalam usahanya untuk memajukan lagi taraf hidup masyarakat Orang Asli di negara ini. Beberapa program pembangunan sosio ekonomi telah dilancarkan meliputi bidang pelajaran, kesihatan dan pembangunan.

Dalam bidang pelajaran, Kerajaan telah mendirikan 60 buah sekolah di 19 buah Daerah di seluruh Semenanjung yang diselenggarakan oleh 190 orang guru. Sekolah-sekolah ini dapat menampung seramai 11,593 orang murid.

Kerajaan juga menjalankan beberapa program dalam bidang perubatan dan kesihatan. Program ini dikendalikan bersama oleh Jabatan Hal Ehwal Orang Asli dan Kementerian Kesihatan dan meliputi aktiviti-aktiviti seperti berikut:

- (a) Perkhidmatan Doktor Terbang;
- (b) Perkhidmatan Kesihatan Keluarga;
- (c) Perkhidmatan mengawal penyakit berjangkit dan bawaan vektor; dan
- (d) Perkhidmatan Kesihatan Alam Sekitar.

Selain daripada program pelajaran dan kesihatan, rancangan-rancangan pembangunan ekonomi juga dijalankan untuk meninggikan taraf hidup Orang Asli. Program-program ini dibahagikan kepada tiga bahagian seperti berikut:

- (a) Memodenkan sistem dan teknik-teknik pertanian dan perikanan;
- (b) Mengembangkan perusahaan-perusahaan kecil;
- (c) Mewujudkan Rancangan Perkumpulan Semula yang bertujuan untuk melaksanakan projek pembangunan sosio ekonomi yang komprehensif dan bersepadu di pusat-pusat pembangunan yang diwujudkan.

Ketiga-tiga aktiviti ini telah membolehkan masyarakat Orang Asli melibatkan diri di dalam projek-projek industri kecil, pertanian, perikanan ternakan dan lain-lain secara lebih teratur dan produktif. Ianya dilaksanakan secara integrasi oleh

Jabatan Hal Ehwal Orang Asli dan lain-lain agensi pelaksanaan di bidang-bidang berkenaan seperti FELDA, FELCRA, Jabatan-jabatan Pertanian dan Perikanan, serta pihak berkuasa Pembangunan Wilayah yang lain.

Langkah-langkah di atas telah mendatangkan kesan yang sangat memuaskan. Kerajaan akan terus mempertingkatkan usaha-usaha ini untuk memajukan masyarakat Orang Asli selaras dengan Kemampuan Kerajaan dari segi ekonomi.

PERSATUAN BEKAS PERAJURIT MALAYSIA—SUMBANGAN

47. Tuan Abdul Hamid bin Ibrahim minta Menteri Pertahanan menyatakan sama ada Kerajaan Malaysia bercadang untuk memberi sumbangan kepada Persatuan Bekas Perajurit Malaysia (PBPM) bagi membantu Persatuan di dalam kegiatan-kegiatan seperti mana yang telah dikurniakan kepada Persatuan Bekas Polis Malaysia baru-baru ini.

Menteri Pertahanan (Tengku Dato' Ahmad Rithauddeen Al-Haj): Kerajaan pada masa ini tidak bercadang untuk memberi sumbangan kewangan kepada Persatuan Bekas Perajurit Malaysia (PBPM) bagi membantu Persatuan di dalam kegiatan-kegiatannya. Dalam hubungan ini tidak bererti bahawa Kerajaan tidak membantu PBPM. Seperti sedia maklum bahawa Kerajaan telah membantu PBPM dalam pembinaan Wisma Pahlawan dengan memberi \$2.00 dari setiap \$1.00 yang dikutip oleh PBPM. Sumbangan Kerajaan bagi penubuhan Wisma Pahlawan berjumlah \$3 juta. Selain dari itu dengan sokongan Kerajaan, PBPM telah melancarkan Kutipan Derma Rayuan Hari Pahlawan pada setiap tahun. PBPM tidak perlu lagi kepada bantuan kewangan sekiranya kutipan derma

tersebut mendapat sokongan semua pihak.

BAHASA IBUNDA (POL)— PENGAJARAN

48. Tuan G. Rajoo minta Menteri Pendidikan menyatakan program dan rancangan Kementerian untuk mengelola dan menyelia pengajaran Bahasa Ibunda (POL) di sekolah menengah apabila KBSM dimulakan pada tahun hadapan di sekolah-sekolah menengah negara ini.

Tuan Anwar bin Ibrahim: Untuk makluman Ahli Yang Berhormat, Kurikulum Bersepadu Sekolah Menengah (KBSM) telah mula dilaksanakan pada tahun 1988 ini dengan program keempat-empat bahasa, iaitu Bahasa Malaysia, Bahasa Inggeris, Bahasa Cina dan Bahasa Tamil. Pelaksanaan lain-lain mata pelajaran akan dimulakan pada tahun 1989.

Bagi Bahasa Cina dan Bahasa Tamil, pengajarannya dimulakan di Kelas Peralihan dan Tingkatan Satu. Dalam hubungan ini, langkah-langkah berikut telah diambil oleh Kementerian Pendidikan untuk menjayakan pelaksanaannya:

- (i) Menyediakan sukatan pelajaran dan huraian untuk kegunaan guru.
- (ii) Menyediakan buku teks untuk kegunaan murid.
- (iii) Menjalankan kursus orientasi di peringkat pusat dan di peringkat negeri untuk guru-guru yang terlibat dalam pengajaran mata-mata pelajaran tersebut.
- (iv) Menerangkan kaedah-kaedah pengendalian mata pelajaran tersebut oleh pihak sekolah.

Kementerian Pendidikan telah juga merancang untuk mengesan pengajaran dan pembelajaran di dalam bilik darjah. Untuk tujuan tersebut pegawai-pegawai dari Jabatan Pendidikan Negeri dan Jemaah Nazir Sekolah Persekutuan, akan sentiasa memonitor dan menyelia pelaksanaan Kurikulum Bersepadu Sekolah Menengah yang juga meliputi Bahasa Cina dan Bahasa Tamil.

KEBAKARAN DISEBABKAN KECUAIAN

49. Puan Rokiah binti Zainuddin minta Menteri Perumahan dan Kerajaan Tempatan menyatakan berapa banyak kebakaran yang berlaku pada tahun lalu kerana:

- (a) Kelalaian atau kecuaiian penghuni rumah;
- (b) kerosakan kuasa letrik dan;
- (c) pengkhianatan.

Tuan Haji Hussein bin Ahmad: Mengikut perangkaan Jabatan Bomba, jumlah kebakaran kesemuanya bagi tahun 1987 di seluruh Malaysia ialah 14,015.

- (a) Daripada jumlah itu, dianggarkan 3,852 kebakaran adalah disebabkan oleh kecuaiian. Pecahan-pecahan mengenai punca-punca kecuaiian itu adalah seperti berikut:

Punca	Jumlah
(i) Puntung Rokok	2,914
(ii) Mercun/Bunga api	259
(iii) Ubat Nyamuk/Lilin/Colok	199
(iv) Dapur Gas/Minyak	312
(v) Budak Bermain Mancis	168
Jumlah	3,852
	bersamaan 27.48%

- (b) Kebakaran yang berlaku disebabkan oleh kerosakan kuasa letrik mengikut rekod di

Jabatan Bomba bagi tahun 1987 adalah berjumlah 1,005 bersamaan 7.1%.

- (c) Kebakaran yang disyaki disebabkan oleh perbuatan tidak bertanggungjawab pada tahun yang sama adalah 3,033 bersamaan 21.64%.

Punca-punca kebakaran yang lain seperti reaksi spontan, percikan api, tindakbalas kimia dan lain-lain punca yang tidak dapat dikesan merupakan baki sebanyak 6,125 atau 43.71%.

ALAT PENGESAN LAJU

50. Tuan Haji Ibrahim bin Haji Ujang minta Menteri Pengangkutan menyatakan jumlah alat-alat pengesan laju yang telah digunakan bagi mengesan kelajuan kenderaan di jalan raya.

Timbalan Menteri Pengangkutan (Datin Paduka Hajjah Zaleha binti Ismail): Ketika ini dua jenis alat pengesan kelajuan adalah digunakan untuk mengesan kelajuan kenderaan di jalan raya, iaitu alat radar gun dan alat amaran had laju.

Alat radar gun digunakan oleh pegawai-pegawai penguatkuasa, khasnya pihak Polis, manakala alat amaran had laju dipasangkan dikenderaan perdagangan yang berat sahaja. Pada masa ini, pihak Polis mempunyai 55 unit alat radar gun.

SEKOLAH RENDAH JENIS KEBANGSAAN TAMIL— PERUNTUKAN PEMBINAAN

51. Tuan C. Krishnan minta Menteri Pendidikan menyatakan sebanyak \$102 million telah diperuntukan bagi pembinaan dan memperbaiki sekolah-sekolah rendah sebanyak 7,700 bilik darjah, bagi tahun 1988. Berapakah peruntukan yang telah diberi kepada

sekolah-sekolah Jenis Rendah Kebangsaan Tamil.

Tuan Anwar bin Ibrahim: Untuk makluman Ahli Yang Berhormat, daripada \$209 million yang telah diperuntukan bagi pembinaan bilik darjah tersebut, sebanyak \$1,161,000 telah diperuntukkan kepada Sekolah Rendah Jenis Kebangsaan Tamil di seluruh negara. Saya juga ingin menjelaskan bahawa peruntukan yang diberikan oleh Kementerian ini tidak berdasarkan kepada jenis sekolah tetapi mengikut keperluan sesuatu sekolah tanpa mengira jenisnya.

KEMEROSOTAN SEKTOR PEMBINAAN

52. Tuan Haji Abu Bakar bin Lajim minta Perdana Menteri menyatakan apakah langkah-langkah Kerajaan yang telah diambil bagi memperbaiki kemerosotan sektor pembinaan akibat kemelesetan ekonomi negara.

Timbalan Menteri di Jabatan Perdana Menteri (Dato' Dr Siti Zaharah binti Haji Sulaiman): Langkah-langkah Kerajaan yang telah diambil bagi memperbaiki kemerosotan sektor pembinaan akibat kemelesetan ekonomi negara termasuklah:

- (i) pelaksanaan program pembinaan seperti Program Khas Perumahan Kos Rendah dan Lebuh Raya Timur/Selatan;
- (ii) langkah-langkah kewangan dan belanjawan bagi menggalakan lagi perkembangan pasaran harta seperti penurunan kadar pinjaman asas bank, pengurangan sebanyak 50% kadar cukai keuntungan harta yang dikuatkuasa mulai 24 Oktober 1986, penubuhan Perbadanan Cagaran Negara (Cagarmas Berhad), memudahkan dan menyeragamkan

prosedur dan syarat-syarat
peraturan pinjaman
perumahan.

PENDAPATAN EKSPORT BARANGAN UTAMA

53. Tuan Tan Choong Tak minta Menteri Perusahaan Utama menyatakan:

(a) pendapatan keluaran-keluaran utama di bawah Kementerian-nya yang telah diterima oleh negara semasa tahun-tahun kemelesetan ekonomi yang ditemui oleh kita.

(i) 1985;

(ii) 1986;

(iii) 1987.

(b) namakan lima jenis keluaran yang telah menerima keuntungan paling banyak semasa tahun-tahun tersebut di atas dengan faktor-faktor dan angka.

Tuan Alias bin Md. Ali:

(a) Jumlah pendapatan eksport daripada barangan utama di bawah Kementerian Perusahaan Utama yang diterima oleh negara pada tahun 1985 ialah sebanyak \$14,888.8 juta, tahun 1986 sebanyak \$13,142.0 juta dan tahun 1987 sebanyak \$16,925.9 juta.

(b) 5 jenis barangan utama yang telah menerima pendapatan eksport yang paling banyak dalam negara-negara tersebut adalah seperti berikut:

	\$ Juta		
	1985	1986	1987
Kayu Kayan ..	4,320.0	4,651.5	6,879.7
Getah	2,872.2	3,182.7	3,915.4
Minyak Kelapa Sawit	4,142.7	3,099.5	3,361.8
Koko dan produk ..	544.8	644.8	863.7
Timah	1,648.0	649.6	838.8

AKTA PERTUBUHAN 1966— PINDAAN

54. Tuan Tan Chai Ho minta Menteri Dalam Negeri menyatakan sama ada Kerajaan berhajat meminda Akta Pertubuhan 1966 supaya sesebuah Pertubuhan yang mempunyai cawangan yang tidak sah tidak mengakibatkan keseluruhan Pertubuhan itu diharamkan.

Dato' Megat Junid bin Megat Ayob: Sebagaimana Yang Berhormat sedia maklum, Rang Undang-undang yang mengandungi pindaan itu akan dibentang di Dewan Yang Mulia ini setelah diluluskan oleh Dewan Rakyat pada 18-3-88.

TABUNG HAJI—SISTEM BUKU SIMPANAN WANG

55. Puan Hajjah Azizah binti Haji Mohd. Said minta Perdana Menteri menyatakan adakah Lembaga Urusan dan Tabung Haji akan memperkenalkan "Sistem Buku Simpanan Wang" sebagai satu langkah menggalakkan setiap lapisan masyarakat Islam, termasuklah penuntut-penuntut di sekolah dan Pusat Pengajian Tinggi, menyimpan wang mereka dengan Lembaga tersebut.

Tuan Othman bin Abdul: Tabung Haji belum bercadang untuk mengadakan buku akaun simpanan kerana sistem yang ada sekarang ini adalah memadai dan sesuai dengan kehendak Akta Tabung Haji.

Untuk makluman Yang Berhormat, pada masa ini Tabung Haji mengeluarkan penyata simpanan dua kali setahun iaitu pada 30 Jun dan 31 Disember, Penyata Simpanan itu mencatatkan dengan terperinci pergerakan simpanan seseorang pendeposit dalam tempoh 6 bulan berkenaan. Selain dari itu pendeposit

boleh juga pada bila-bila masa meminta Tabung Haji memberikan rekod simpanannya yang terakhir. Sehingga ini pendeposit tidak menghadapi masalah dalam memeriksa akaun simpanannya.

SETINGGAN MENDUDUKI TANAH KTM

56. Tuan Haji Shaharom bin Haji Maasom minta Menteri Pengangkutan menyatakan sehingga 31 Disember, 1987 berapa ramaikah jumlah mereka yang menduduki tanah-tanah rizab KTM. Apakah usaha-usaha KTM selama ini untuk mencegah orang ramai dari terus menduduki tanah-tanah rizab KTM.

Datin Paduka Hajjah Zaleha binti Ismail: Jumlah setingan yang menduduki tanah KTM sehingga 31 Disember 1987 adalah lebih kurang 200,000 orang. Setelah bulan Jun 1984 ekoran dari keputusan Jemaah Menteri, KTM tidak membenarkan sebarang bangunan baru atau bangunan tambahan kepada bangunan yang sedia ada didirikan atas tanah KTM. Bagi tapak-tapak yang telah dikosongkan oleh setingan, ianya ditanam dengan pokok-pokok bagi mengelakkan setingan baru masuk.

TANGKAPAN IKAN SYARIKAT K & I

57. Tuan Mustafa bin Awang minta Menteri Pertanian menyatakan perkara-perkara seperti berikut:

- (a) sehingga kini berapa banyak tangkapan ikan yang didaratkan oleh bot-bot projek laut dalam syarikat K & I;
- (b) di manakah pengkalan/pusat pendaratan ikan yang disyaratkan kepada syarikat ini mendaratkan hasil tangkapan mereka; dan

(c) berapakah nilai harga ikan/hasil ikan yang didaratkan oleh syarikat K & I Malaysia.

Tuan Mohd. Kassim bin Ahmed:

- (a) Tangkapan ikan oleh Syarikat K & I ialah 1,390 tan.
- (b) Pengkalan/pusat ikan yang disyaratkan ialah Pelabuhan Kuantan.
- (c) Nilai harga ikan ialah \$2.4 juta.

TAHANAN AKTA KESELAMATAN DALAM NEGERI

58. Tuan Chan Choong Tak minta Menteri Dalam Negeri menyatakan sama ada mereka yang ditahan di bawah Akta Keselamatan Dalam Negeri baru-baru ini akan dilepaskan sebaik sahaja mereka didapati tidak mengancam keselamatan negara.

Dato' Megat Junid bin Megat Ayob: Orang-orang yang ditahan di bawah Akta Keselamatan Dalam Negeri adalah atas tujuan untuk mencegah mereka daripada menjalankan kegiatan yang memudaratkan keselamatan negara dan mereka akan dibebaskan apabila mereka tidak lagi memudaratkan keselamatan negara.

PROTON SAGA—EKSPORT KE LUAR NEGERI

59. Tuan Hassan bin Nam minta Perdana Menteri menyatakan berapakah jumlah bilangan kereta PROTON SAGA yang telah dipasarkan ke luar negeri sehingga awal tahun 1988 jika ada, nyatakan nama negara-negara serta bilangan kereta PROTON SAGA yang telah dijual ke negeri berkenaan.

Tuan Othman bin Abdullah: PROTON telah mengeksport sebanyak 781 unit PROTON SAGA ke luar negeri sehingga 15 Mac 1988.

Negara-negara yang telah mengimport kereta nasional adalah seperti berikut:

<i>Negara</i>	<i>Bilangan (unit)</i>
Bangladesh	98
Brunei Darussalam	100
New Zealand	167
Malta	80
Sri Lanka	65
Eire	200
Jamaica	71
Jumlah ..	781

HICOM—PELABURAN KERAJAAN

60. Tuan Bee Yang Sek minta Perdana Menteri menyatakan:

- jumlah pelaburan Kerajaan dalam Syarikat Industri Berat (HICOM), termasuk pengeluaran kereta nasional setakat akhir tahun 1987; dan
- jumlah keuntungan/kerugian dari pelaburan itu setakat akhir tahun 1987.

Tuan Othman bin Abdul: Jumlah pelaburan Kerajaan dalam bentuk ekuiti dalam projek-projek Perbadanan Industri Berat Malaysia Bhd. (HICOM) sehingga tahun kewangan berakhir pada 31 Mac 1987 ialah \$338.9 juta. Jumlah ini termasuk pelaburan sebanyak \$105.0 juta dalam projek Perusahaan Otomobil Nasional Sdn. Bhd. (PROTON).

Adalah terlalu awal untuk mempersoalkan kedudukan untung/rugi HICOM memandangkan HICOM terlibat dalam projek industri berat seperti Perwaja, Kereta PROTON, enjin motosikal dan simen yang mengikut perkiraan memang mengambil masa yang panjang (long gestation period) untuk memperlihatkan pulangan. Pihak HICOM memberi perhatian yang berat

dan mengambil usaha-usaha yang gigih untuk meningkatkan prestasinya.

USUL-USUL

JALAN-JALAN MASUK KE PARLIMEN

Timbalan Menteri Dalam Negeri (Dato' Megat Junid bin Megat Ayob): Tuan Yang di-Pertua, saya mewakili Yang Amat Berhormat Menteri Dalam Negeri mencadangkan:

Bahawa Majlis ini memerintahkan Ketua Polis Negara menjaga supaya selama penggal Dewan Negara yang ada sekarang, jalan-jalan melalui lorong-lorong menuju ke Dewan ini hendaklah sentiasa terbuka dan boleh dilalui dan jangan ada apa-apa halangan menghalang Ahli-ahli hendak pergi dan balik dari Dewan ini, jangan berlaku apa-apa kacau-bilau di jalan-jalan menuju ke Dewan ini, dan supaya jangan ada huru-hara di Bangunan Dewan ini dan berhampiran dengan bangunan ini, dan Setiausaha Dewan Negara hendaklah menyampaikan perintah ini kepada Ketua Polis Negara yang tersebut itu.

Timbalan Menteri Perumahan dan Kerajaan Tempatan (Tuan Haji Hussein bin Ahmad): Tuan Yang di-Pertua, saya mohon menyokong.

Tuan Yang di-Pertua: Ahli-ahli Yang Berhormat, sekarang saya kemukakan masalah bagi diputuskan. Masalahnya ialah bahawa Usul atas nama Menteri Dalam Negeri bagi diputuskan bahawa Majlis ini memerintah Ketua Polis Negara menjaga supaya selama penggal Dewan Negara yang ada sekarang, jalan-jalan melalui lorong-lorong menuju ke Dewan ini hendaklah sentiasa terbuka dan boleh dilalui dan jangan ada apa-apa halangan menghalang Ahli-ahli hendak pergi

dan balik dari Dewan ini, jangan berlaku apa-apa kacau-bilau di jalan-jalan menuju ke Dewan ini, dan supaya jangan ada huru-hara di Bangunan Dewan ini dan berhampiran dengan bangunan ini, dan Setiausaha Dewan Negara hendaklah menyampaikan perintah ini kepada Ketua Polis Negara yang tersebut itu disetujukan.

Usul dikemuka bagi diputuskan, dan disetujukan.

Diputuskan,

Bahawa Majlis ini memerintah Ketua Polis Negara menjaga supaya selama penggal Dewan Negara yang ada sekarang, jalan-jalan melalui lorong-lorong menuju ke Dewan ini hendaklah sentiasa terbuka dan boleh dilalui dan jangan ada apa-apa halangan menghalang Ahli-ahli hendak pergi dan balik dari Dewan ini, jangan berlaku apa-apa kacau-bilau di jalan-jalan menuju ke Dewan ini, dan supaya jangan ada huru-hara di Bangunan Dewan ini dan berhampiran dengan bangunan ini, dan Setiausaha Dewan Negara hendaklah menyampaikan perintah ini kepada Ketua Polis Negara yang tersebut itu.

JAWATANKUASA PEMILIH— LANTIKAN AHLI-AHLI

Menteri di Jabatan Perdana Menteri (Dato' Dr Mohamad Yusof bin Haji Mohamed Nor): Tuan Yang di-Pertua, saya mencadangkan:

Bahawa mengikut peruntukan Peraturan Mesyuarat 70 (1) Majlis Dewan Negara memutuskan iaitu Ahli-ahli yang berikut hendaklah dilantik menjadi Ahli-ahli Jawatankuasa Pemilihan bagi tempoh Penggal Kedua Parlimen yang Ketujuh.

1. Yang Berhormat Tuan Haji Hussein bin Ahmad;
2. Yang Berhormat Dato' Mak Hon Kam;

3. Yang Berhormat Puan Mazidah binti Haji Zakaria;
4. Yang Berhormat Tuan Rajoo a/l Desari @ Govindasamy.

Dato' Haji Zakaria bin Haji Yahya: Tuan Yang di-Pertua, saya mohon menyokong.

Tuan Yang di-Pertua: Ahli-ahli Yang Berhormat, sekarang saya kemukakan masalah bagi diputuskan. Masalahnya ialah bahawa Usul di atas nama Menteri di Jabatan Perdana Menteri bagi diputuskan. Bahawa mengikut peruntukan Peraturan Mesyuarat 70 (1) Majlis Dewan Negara memutuskan iaitu Ahli-ahli yang berikut hendaklah dilantik menjadi Ahli-ahli Jawatankuasa Pemilihan bagi tempoh Penggal Kedua Parlimen Yang Ketujuh.

1. Yang Berhormat Tuan Haji Hussein bin Ahmad;
2. Yang Berhormat Dato' Mak Hon Kam;
3. Yang Berhormat Puan Mazidah binti Haji Zakaria;
4. Yang Berhormat Tuan Rajoo a/l Desari @ Govindasamy.

Usul dikemuka bagi diputuskan, dan disetujukan.

Diputuskan,

Bahawa mengikut peruntukan Peraturan Mesyuarat 70 (1) Majlis Dewan Negara memutuskan iaitu Ahli-ahli yang berikut hendaklah dilantik menjadi Ahli-ahli jawatankuasa Pemilihan bagi tempoh Penggal Kedua Parlimen Yang Ketujuh disetujukan.

1. Yang Berhormat Tuan Haji Hussein bin Ahmad;
2. Yang Berhormat Dato' Mak Hon Kam;
3. Yang Berhormat Puan Mazidah binti Haji Zakaria;
4. Yang Berhormat Tuan Rajoo a/l Desari @ Govindasamy.

**UCAPAN TERIMA KASIH
KEPADA D.Y.M.M. SERI
PADUKA BAGINDA YANG
DI-PERTUAN AGONG**

3.40 ptg.

Tuan Haji Abu Bakar bin Lajim:
Tuan Yang di-Pertua, saya mohon
mencadangkan:

Bahawa suatu Ucapan yang tidak
sepertinya dipersembahkan
Kebawah Duli Yang Maha Mulia
Seri Paduka Baginda Yang di-
Pertuan Agong, demikian bunyinya:

“Ampun Tuanku,

Patik, Yang di-Pertua dan Ahli-
ahli Dewan Negara Malaysia di
dalam Persidangan Parlimen,
memohon ampun memper-
sembahkan suatu ucapan yang zalil
daripada Majlis Dewan Negara
mengucapkan berbilang-banyak
syukur dan menjunjung kasih
Kebawah Duli kerana Titah Ucapan
Kebawah Duli pada masa membuka
Penggai Kedua Parlimen Yang
Ketujuh.”

Tuan Yang di-Pertua, dalam Titah
Ucapan Kebawah Duli Yang Maha
Mulia Seri Paduka Baginda Yang di-
Pertuan Agong sungguhpun ringkas,
tetapi telah menyentuh banyak
perkara. Duli Yang Maha Mulia telah
memperingatkan semua lapisan rakyat
terhadap tanggungjawab kita menjaga
keharmonian dan kestabilan negara.
Tanpa kestabilan negara, terutamanya
kestabilan politik, pembangunan
ekonomi tidak akan dapat berterusan
dinikmati oleh rakyat. Sekiranya
kestabilan politik tergugat dan
mengancam kegiatan kehidupan
sehari-hari, pembangunan ekonomi
tidak akan wujud.

Saya menyeru semua pemimpin-
pemimpin semua peringkat, baik
serendah-rendahnya dari peringkat
kampung hingga ke pemimpin negara
supaya terus menjaga keamanan dan

keharmonian negara kita. Sebagai satu
bangsa yang cintakan keamanan, kita
bertanggungjawab memastikan
supaya tidak ada dilakukan sebarang
tindakan, sama ada oleh individu atau
berkumpulan yang boleh menganggu-
gugat kestabilan politik negara.
Sebagai sebuah negara yang berbilang
kaum dan kepercayaan, faktor utama
yang mesti dititikberatkan adalah
perpaduan yang tulin. Perpaduan
negara perlu dipelihara kerana ia
merupakan kekuatan kita. Oleh itu,
sifat-sifat kesederhanaan perlu
dipupuk untuk mengelakkan
perselisihan sesama kaum yang
akhirnya jika berlaku perpecahan tidak
ada sesiapa pun yang mendapat untung
melainkan musuh-musuh negara kita.

Tuan Yang di-Pertua, sebagai Ahli
Dewan Negara yang mulia ini kita
semua perlu bersikap adil dan menjadi
penegur yang peka kepada
persekitaran kita. Kita semua tidak
seharusnya sekadar mencari kesalahan
sahaja atau terikut-ikut dengan arus
tanpa mengira akibat-akibat yang
menimpa, tetapi kita perlu bersikap
membina dengan memberi pandangan-
pandangan yang berguna dan ikhlas
kepada Kerajaan jika kita dapati satu-
satu tindakan atau perbuatan itu boleh
membawa kemudharatan kepada
negara. Usaha-usaha pembinaan
negara memerlukan kita semua
bersikap positif sebagai seorang
negarawan dan bukannya hanya
mengenengahkan kepentingan
peribadi sahaja.

Tuan Yang di-Pertua, syukur
alhamdulillah, kedudukan ekonomi
negara telah beransur pulih pada tahun
1987 sebagaimana yang telah
dititahkan oleh Kebawah Duli Yang
Maha Mulia, pertumbuhan ekonomi
negara telah mencapai 4% pada awal
tahun 1987 berbanding dengan
jangkaan 2% pada awalnya dahulu
dengan kenaikan Keluaran Dalam
Negara Kasar kepada 4.7%. Besar
kemungkinan angka ini akan

bertambah baik pada penghujung tahun 1988 ini. Ingatan murni Kebawah Duli Yang Maha Mulia ini akan seterusnya menjadi peransang kepada rakyat supaya terus mempertingkatkan produktiviti dan berusaha keras untuk sama-sama memulihkan dan menikmati dari pemulihan ekonomi negara ini.

Dari statistik yang diperolehi pada tahun 1987, lebihan dagangan naik sebanyak 69.2% kepada \$13,193.2 juta daripada \$7,799.6 juta pada tahun 1986 berikutan dari pertambahan pendapatan punca eksport. Kebanyakan harga barangan utama negara naik pada paras di luar jangkaan. Pertambahan jumlah eksport dan harga getah yang baik telah menaikkan pendapatan eksport getah sebanyak 23% kepada \$3.9 billion dan kayu balak dan kayu gergaji naik 48.7% dan 38.1%, masing-masingnya kepada \$4.3 billion dan \$1.6 billion. Pendapatan dari bijih timah juga meningkat daripada \$189.2 juta kepada \$838.3 juta berikutan dari pertambahan jumlah eksport sebanyak 22.9%. Petroleum dan barangan dari petroleum membawa pendapat sebanyak \$7,044.4 juta. Pendapatan dari kelapa sawit juga bertambah sebanyak 8% dengan hasil sebanyak \$3,249.9 juta, tetapi hasil dari gas cecair asli menurun sedikit daripada \$1,741.7 juta, daripada \$1,848.2 juta sebelumnya.

Dari segi import pula, jumlah keseluruhan import banyak tertumpu kepada jentera dan peralatan pengangkutan yang berjumlah sebanyak \$14,355.8 juta yang merupakan 44.9% dari jumlah import. Pengimportan barang kilang juga bertambah sebanyak 23.3% kepada \$4,979.5 juta oleh kerana perbelanjaan kepada barangan tenunan kain, besi dan besiwaja, besi non-ferrous dan bahan-bahan kertas. Barang-barang ini tidak dapat dielakkan dari pengimportan untuk penggunaan

dalam negeri. Walau bagaimanapun, sebagaimana yang diperingatkan oleh Kebawah Duli Yang Maha Mulia bahawa Kerajaan masih lagi menghadapi defisit akaun semasa. Oleh itu, usaha-usaha memperingkatkan hasil Kerajaan dan langkah-langkah penjimatan perbelanjaan perlu diteruskan.

Sebagai seorang usahawan, saya berpendapat mentadbir sebuah negara mempunyai banyak persamaan seperti mentadbir sebuah syarikat. Apabila syarikat dalam keadaan tenat, 3 aspek yang selalu ditekankan ialah:

- (i) mengecil sama ada dari segi saiz atau perbelanjaan;
- (ii) menjual harta-harta yang tidak diperlukan; dan
- (iii) mendapatkan punca-punca pendapatan yang terbiar atau bertindak kepada piutang-piutang Kerajaan yang kurang teliti semasa memungutnya.

Saya percaya Kerajaan memang telah berusaha mencari masalah ini, terutama menerusi langkah-langkah pencegahan perbelanjaan Kerajaan yang bukan keutamaan.

Tuan Yang di-pertua, dari segi hala perdagangan dengan dunia luar, perubahan yang bertambah adalah direkodkan perdagangan dengan ASEAN, Amerika Syarikat, EEC, India, Hongkong dan Eropah Timur, tetapi perdagangan dengan Australia dan China masih berterusan tidak seimbang atau defisit. Perdagangan dengan negara-negara ASEAN naik kepada 128.2% dengan nilai \$4,273.7 juta di mana perdagangan dengan Singapura sahaja berjumlah \$2,129 juta. Dari segi pelaburan pula, pihak Kerajaan telah menerima permohonan untuk cadangan pelaburan modal sejumlah \$747 juta untuk berbagai-bagai projek dari penanam-penanam modal luar negeri pada tahun 1987. Angka ini menunjukkan kenaikan

sebanyak 76.2% dari tahun 1986 di mana ketika itu jumlah pelaburan modal luar berjumlah \$427.9 juta. Kebanyakan pelaburan ini tertumpu kepada perusahaan elektrik dan elektronik, memproseskan makanan dan industri berasaskan kayu-kayan, pelabur-pelabur tersebut kebanyakannya daripada Amerika Syarikat, Jepun dan Belanda.

Tuan Yang di-Pertua, mengikut usaha-usaha penggalakan pelaburan yang dilakukan oleh Kementerian Perdagangan dan Perindustrian ke Amerika Syarikat, Britain dan Jerman Barat pada bulan September 1987 dahulu, adalah dijangkakan Kerajaan akan dapat menarik pelaburan sebanyak \$1.5 billion yang akan melibatkan 23 projek utama. Projek-projek utama tersebut adalah wafer fabrication, pengeluaran peralatan semi conductor, sarung getah, peralatan perubatan, bahan-bahan kimia dan racun rumpai.

Tahun 1986 merupakan tahun bermakna kerana tahun ini menandakan pelancaran-pelancaran dua Rancangan Malaysia Kelima (1986-1990), dan Pelan Induk Perindustrian (1986-1995), di bawah kedua-dua Pelan tersebut sektor perkilangan telah diberi peranan sebagai penggerak utama pertumbuhan ekonomi.

Tahun 1986 juga merupakan pengenalan kepada beberapa langkah yang bertujuan untuk memperbaiki iklim pelaburan negara seterusnya mempercepatkan pertumbuhan dalam sektor perkilangan. Sektor ini telah bertambah baik dengan mencatatkan kenaikan nilai ditambah sebanyak 6.8% berbanding dengan penurunan sebanyak 3.8% dalam tahun 1986. Pemulihan ini adalah disebabkan oleh permintaan luar yang lebih baik bagi beberapa pengeluaran yang berpotensi eksport. Sumbangan daripada sektor perkilangan kepada

Keluaran Dalam Negara Kasar bertambah daripada 19.7% dalam tahun 1985 kepada 20.8% dalam tahun 1986.

Pihak Kerajaan dalam usahanya yang berterusan untuk menarik lebih banyak lagi pelaburan daripada sektor swasta telah pun memperkenalkan beberapa langkah pada tahun 1986. Di antara langkah-langkah yang penting ialah pengenalan galakan-galakan pelaburan yang diperbaiki untuk sektor perkilangan dengan berkuatkuasanya Akta Penggalakan Pelaburan 1986 mulai 1hb Januari, 1986. Kelonggaran peraturan mengenai lesen perkilangan, kajian semula garis panduan mengenai penyertaan ekuiti asing dan penggunaan pekerja asing, dan pembaikan skim pembiayaan semula kredit eksport untuk memudahkan para pengeksport Malaysia bersaing dengan lebih berkesan lagi dalam pasaran antarabangsa. Pindaan juga telah dibuat kepada Akta Cukai Pendapatan 1967 dan Perintah Penyelarasan Perindustrian (Pengeluaran) (Pindaan) 1985, di bawah Akta Penyelarasan Perindustrian 1976.

Tuan Yang di-Pertua, Kerajaan telah menerima syor-syor utama Pelan Induk Perindustrian dan memberi keutamaan kepada pelaksanaan objektif untuk menjadikan sektor perkilangan sebagai penggerak pertumbuhan. Setahu saya Jabatan Perdana Menteri (JPM) telah menggariskan Pelan Tindakan yang komprehensif mengenai pelaksanaan PIP. Pelan tersebut telah menyarankan penubuhan beberapa Pasukan Petugas dan Jawatankuasa di bawah beberapa Kementerian dan agensi-agensi Kerajaan. Sehubungan dengan 12 sektor-sektor industri yang dikenalpasti. Pelan Induk Perindustrian di antara lain telah mengesyorkan kajian selanjutnya dijalankan ke atas beberapa keluaran yang telah dikenalpasti. Kebanyakan kajian yang

dijalankan adalah berdasarkan syor-syor Pelan Induk dan merangkumi perkara-perkara seperti faedah bandingan, prestasi dan masalah sektor industri terpilih dan prospek-prospek pembangunan di masa hadapan.

Satu aspek yang terlibat secara langsung dengan perkembangan industri negara ialah industri kecil dan menengah. Memandangkan semua pengusaha kecil dapat bertanding untuk maju ke tahap industri pertengahan dan berat, Kerajaan perlu bersikap memilih menentukan bidang perusahaan yang perlu diceburi oleh pihak swasta untuk menjamin industri berkenaan dapat berkembang maju.

Dari statistik yang saya dapati statistik industri kecil telah memberi sumbangan besar kepada keluaran Dalam Negara Kasar dari 10% pada tahun 1964 kepada 20.5% dalam tahun 1980. Industri kecil dan menengah ini akan menjadi industri pembantu kepada industri berat kelak. Di dalam hal ini 300,000 usahawan kecil kita yang menyumbang 15% pekerjaan boleh menjadi pelengkap kepada gagasan perindustrian negara secara keseluruhannya.

Saya dengan ini ingin menyarankan supaya satu Pelan Induk Perindustrian Kecil dan Menengah diadakan bagi menunjukkan perhatian berat Kerajaan pada bidang ini.

Menyentuh mengenai industri kecil ini, izinkan saya menyampaikan sedikit permasalahan yang dihadapi oleh pengusaha-pengusaha bumiputera:

- (i) saya difahamkan iaitu Kementerian Perdagangan telah mengambil keputusan iaitu tambahan Elaun Cukai Pelaburan tidak lagi diberi kepada projek-projek bumiputera seperti yang diberikan pada masa-masa yang lalu.

- (ii) pengeksport-pengeksport rotan yang mana kebanyakannya terdiri daripada pengeksport bumiputera yang dahulunya cukai eksportnya dikenakan sebanyak lebih kurang \$300 pada satu metrik tan, tetapi sekarang sudah dinaikkan sebanyak \$3,000 satu metrik tan.

Implikasi daripada langkah ini ialah pengeksport-pengeksport rotan bumiputera bukan sahaja mendapat kerugian besar akibat dari penurunan harga, tetapi sekaligus industri mereka selaku pengeksportan rotan meleset terus.

Keadaan ini memanglah ditunggu-tunggu oleh pihak pengilang-pengilang rotan. Jika segala sungutan ini benar, nampaknya Kerajaan tidak lagi memandang berat atau mengambil daya-usaha yang kuat untuk memberi galakan bagi menghadapi pertandingan memandangkan lapangan baru yang diterokai ini memerlukan sedikit insentif. Jika keistimewaan ini diluputkan maka harapan untuk membangun pengilang-pengilang bumiputera tidak akan berhasil, walaupun kita tahu bumiputera juga mesti sanggup bertanding di pasaran terbuka.

Selain daripada itu saya difahamkan syarikat-syarikat yang memerlukan lesen daripada Kementerian tersebut dahulunya memerlukan ekuiti bumiputera, tetapi sekarang diganti dengan syarat syarikat-syarikat mesti mempunyai modal berbayar sebanyak \$2.5 juta. Dengan cara ini dengan sendirinya gugurlah keistimewaan yang diberikan kepada syarikat-syarikat bumiputera pada masa-masa yang lalu. Dengan ini sekali lagi saya meminta Kementerian tersebut membuat ulang-kaji berhubung dengan perkara tersebut.

Tuan Yang di-Pertua, saya menyokong penekanan yang diberikan

oleh pihak Kerajaan terhadap usaha-usaha penyelidikan dan pembangunan R & D untuk pelbagai sektor dalam ekonomi Malaysia terutama di bawah Rancangan Malaysia Kelima. Ini terbukti daripada peruntukan pembangunan R & D meningkat dari \$124.3 juta di bawah Rancangan Malaysia Keempat kepada \$400 juta di bawah Rancangan Malaysia Kelima. Penekanan ini adalah kerana R & D adalah menjadi teras kepada pembangunan ekonomi dan modernen utama di bidang sains dan teknologi.

Kita mempunyai Badan-badan seperti MARDI, PORIM untuk menjalankan penyelidikan di bidang pertanian, Institut Penyelidikan Perikanan untuk membuat penyelidikan di bidang perikanan dan Institut Penyelidikan Perhutanan dalam bidang perhutanan. Kita juga ada SIRIM, Institut Perlombongan, Institut Penyelidikan Tenaga Atom, Institut Penyelidikan Perubatan dan Institut Mikro Elektronik Malaysia (MIMOS) bagi menjalankan R & D di bidang masing-masing.

Di bawah Rancangan Malaysia Kelima juga Kementerian Sains, Teknologi dan Alam Sekitar juga telah diperuntukkan bagi menubuhkan "Science Park" untuk tujuan penyelidikan di bidang sains dan teknologi.

Saya berpendapat usaha-usaha penubuhannya perlu diambil perhatian berat supaya kemajuan sains dan teknologi terutamanya pemindahan teknologi dari negara-negara luar dapat diterima secara lebih berkesan lagi.

Kerajaan telah memperuntukkan sejumlah wang yang besar iaitu sejumlah \$524.3 juta bagi Rancangan-rancangan Malaysia Keempat dan Kelima, pulangan yang didapati hendaklah mendatangkan faedah yang

besar kepada negara di masa-masa hadapan. Oleh itu kita semua amat menyanjung di atas perhatian berat yang telah diberikan oleh Kebawah Duli Yang Maha Mulia bagi Kerajaan mempertingkatkan lagi produktiviti, mutu dan kos pengeluaran barangan negara terutama barangan eksport.

Tuan Yang di-Pertua, Kebawah Duli Yang Maha Mulia juga telah memperingatkan kita semua akan peri mustahaknya usaha-usaha mempergiatkan lagi penyertaan rakyat dalam aktiviti ekonomi sesuai dengan pencapaian matlamat-matlamat Dasar Ekonomi Baru.

Sebagaimana kita semua sedia maklum, Dasar Ekonomi Baru akan tamat tempoh pelaksanaannya pada tahun 1990, tetapi ini tidak bermakna semangat Dasar Ekonomi Baru turut berakhir. Oleh itu, Tuan Yang di-Pertua, dan Ahli-ahli Yang Berhormat sekalian, saya ingin menyentuh satu perkara yang penting kepada kestabilan negara, dalam jangka masa panjang iaitu Dasar Ekonomi Baru selepas tahun 1990 atau penyambung matlamat-matlamat ekonomi negara, selepas tamat tempoh Dasar Ekonomi Baru. Banyak perkara-perkara yang terjadi di luar jangkaan dan kawalan manusia. Kemelesetan ekonomi negara yang dialami sejak beberapa tahun yang lalu telah mempengaruhi pelaksanaan program-program pembangunan Kerajaan, termasuk program-program penyusunan semula masyarakat.

Berdasarkan kepada prospek ekonomi negara yang tidak lagi menggalakkan bahagian pemilikan bumiputera dalam sektor syarikat di anggarakan mencapai kira-kira 22% sahaja menjelang tahun 1990 sebab pertumbuhan ekonomi yang rendah, kemelesetan dan juga sumber-sumber Kerajaan terhad. Bagi menghadapi suasana yang tidak menggalakkan ini, Kerajaan perlulah membuat beberapa

penyesuaian kepada strategi dan program penyusunan semula masyarakat, khasnya strategi pemilikan sektor syarikat ke arah memastikan supaya kegiatan ekonomi terus berkembang serta dapat menghasilkan peluang-peluang penyertaan yang baru, menggalakkan pelaburan swasta juga pelaburan asing, seterusnya menamakan etika "usahawan yang terpuji di kalangan usahawan-usahawan kita".

Satu aspek penting di dalam menjayakan Dasar Ekonomi Baru ialah penglibatan sektor swasta. Saya dapati wujud semacam sikap sambil lewa daripada segolongan syarikat-syarikat tertentu untuk menjayakan dasar ini dengan memberi alasan kononnya wujud krisis keyakinan terhadap kestabilan politik negara ini. Jika banyak kalangan private sector bersikap sedemikian, saya khawatir pelabur-pelabur asing juga akan berasa serba salah untuk sama-sama menjayakan Dasar Ekonomi Baru itu. Proses penyusunan semula masyarakat dapat diteruskan dengan pertumbuhan ekonomi negara yang pesat. Saya amat berharap supaya Kerajaan akan meneruskan Dasar Ekonomi Baru walau apapun di dalam nama atau bentuk yang lain selagi taraf ekonomi bumiputera mahupun kaum-kaum bukan bumiputera belum tercapai secara memuaskan.

Tuan Yang di-Pertua, saya teringat satu pepatah orang Cina. izinkan saya membaca dalam Bahasa Inggeris, "If you are planning for a year, plant grain. If you are planning for ten years, plant trees. If you are planning for hundred years, plant men". Kepada saya, manusia adalah punca utama pembentukan negara di mana pendidikan dan latihan sebagai acuan kepada pembentukan mental dan kerohanian manusia sejagat. Konsep pendidikan bersepadu yang dianjurkan oleh Kerajaan adalah langkah mengeluarkan tenaga-tenaga manusia

yang sesuai untuk keperluan negara pada masa sekarang dan masa akan datang. Di samping itu, kita jangan lupa di atas ingatan Kebawah Duli Yang Maha Mulia supaya kita semua terus memupuk sifat-sifat positif dan unsur-unsur akhlak yang tinggi menerusi pendidikan formal dan tidak formal supaya sifat-sifat penyelewangan, pecah amanah, rasuah dan sifat-sifat keji lainnya akan dipandang jijik oleh masyarakat. Oleh itu, usaha-usaha Kerajaan untuk menerapkan nilai-nilai Islam perlu mendapat perhatian dan sokongan. Penyakit-penyakit masyarakat seperti penagihan dadah juga perlu dibasmi sepenuhnya menerusi langkah-langkah pencegahan dan rawatan.

Tuan Yang di-Pertua, berdasarkan kepada Laporan Separuh Penggal Malaysia Keempat dianggarkan 30.3% daripada 2.4 juta keluarga di negara ini adalah dari golongan miskin. Pada tahun 1980 kadar kemiskinan turun kepada 29%. Pada tahun 1984 misalnya kadar kemiskinan di kalangan penanam padi berjumlah 57.7% sementara di kalangan nelayan dan penoreh getah melebihi 40%. Perbandingan kadar ini menunjukkan bahawa kemiskinan masih wujud pada kadar yang tinggi, malah keadaannya mungkin bertambah buruk di dalam keadaan kemelesetan sekarang ini. Kemiskinan bukanlah sesuatu yang mudah dibasmikan, tetapi Kerajaan tidak pernah melupakan tanggungjawabnya melaksana program-program membasmi kemiskinan di negara ini. Kita amat menyokong akan saranan Kebawah Duli Yang Maha Mulia supaya usaha-usaha mempertingkatkan taraf hidup rakyat diteruskan dengan menyediakan kemudahan-kemudahan asas seperti bekalan air paip, elektrik, jalan raya dan telefon. Program-program pencegahan dan pengawalan di segi kesihatan juga perlu dilaksanakan bagi meninggikan taraf kesihatan rakyat terutamanya yang tinggal di luar

bandar. Usaha-usaha yang sama juga telah dilakukan kepada golongan miskin di bandar-bandar seperti usaha-usaha penempatan setinggan di Wilayah Persekutuan menerusi pembangunan kawasan-kawasan perumahan kos rendah dan penyediaan kemudahan-kemudahan asas di kawasan-kawasan setinggan yang belum dibangunkan. Seterusnya kita berharap Kerajaan terus mencari dan mengatasi kelemahan-kelemahan yang ada dan idea-idea yang baru supaya dapat mempercepatkan proses membasmikan kemiskinan ini.

Tuan Yang di-Pertua, kita seharusnya tidak lupa kepada kakitangan Kerajaan yang telah menjadi nadi dan jentera penggerak kepada pembangunan dan pentadbiran Kerajaan. Tidak syak lagi Perkhidmatan Awam kita adalah satu perkhidmatan yang cekap dan produktif. Mereka telah memainkan peranan yang besar di dalam pembangunan ekonomi negara sejak negara mencapai kemerdekaan.

Walau bagaimanapun, peningkatan kecekapan dan produktiviti adalah satu usaha yang berterusan sesuai dengan permodenan negara dan peredaran masa. Banyak usaha-usaha yang telah dilaksanakan bagi mempercepatkan Perkhidmatan Awam Kerajaan, antaranya ialah mewujudkan sikap positif dan nilai-nilai murni, perubahan kepada sistem dan prosedur kerja, peningkatan tahap perkhidmatan kepada orang ramai, peningkatan mutu pentadbiran di peringkat daerah, peningkatan kawalan dan penjimatan kos dan peningkatan penggunaan teknologi maklumat.

Proses modenisasi ini telah diterima dan dilaksanakan secara meluas di dalam Perkhidmatan Awam kita. Di dalam kajian perbandingan di antara tahun-tahun 1981 dan 1985, menunjukkan tambahan tingkat kepuasan masyarakat terhadap

perkhidmatan agensi-agensi Kerajaan. Kita berharap usaha-usaha modenisasi ini akan menerapkan kesedaran pegawai-pegawai Kerajaan mengenai kepentingan masa, keperluan penjimatan perbelanjaan dan penggunaan sumber-sumber secara berkesan serta berdedikasi dan pengurusan yang baik oleh pegawai-pegawai atasan yang boleh dicontohi oleh pegawai-pegawai lain.

Sungguhpun begitu, saiz Perkhidmatan Awam yang optima perlu dibuat bertujuan memperkemaskan jentera Kerajaan dengan pengurangan bilangan kakitangannya. Langkah-langkah ini sebenarnya telah pun diambil sejak tahun 1982 lagi. Misalnya dengan dasar pengswastaan, Kerajaan telah dapat mengurangkan bilangan kakitangan Kerajaan secara tidak langsung.

Saya percaya usaha-usaha peningkatan produktiviti jabatan-jabatan Kerajaan akan membawa kesan secara langsung kepada kemajuan dan pembangunan negara sesuai dengan cogan kata mereka, "Berkhidmat Untuk Negara".

Tuan Yang di-Pertua, saya amat bersetuju dengan saranan yang dititahkan oleh Kebawah Duli Yang Maha Mulia bahawa industri pelancongan adalah menjadi salah satu sumber pendapatan tukaran wang asing yang penting. Pada tahun 1972, kemasukan pelancong asing ke Malaysia ialah seramai 1 juta orang dengan pendapatan negara yang diterima darinya berjumlah \$230 juta.

Pada tahun 1985 jumlah pelawat asing berjumlah \$2.9 juta dengan mendapat hasil berjumlah \$1,412.4 juta. Perangkaan ini menunjukkan satu pencapaian yang amat menggalakkan. Dengan tertubuhnya Kementerian Kebudayaan dan Pelancongan, usaha-usaha pelancongan akan lebih terselaraskan.

Soal penyelarasan ini penting memandangkan sebelumnya Kerajaan-kerajaan Negeri dan sektor-sektor swasta menjalankan aktiviti pembangunan dan penggalakan pelancongan kadangkala secara berasingan dan menyebabkan pertindihan dan percanggahan. Usaha-usaha semua pihak memang perlu disatukan terutamanya oleh Jawatankuasa Induk Pelancongan untuk mencapai matlamat pembangunan pelancongan yang teratur, bersepadu dan lebih berkesan lagi.

Di samping itu, kadar pertumbuhan pelancongan perlu dipertingkatkan sesuai dengan peruntukan kewangan 1987/88 yang bertambah supaya mencapai angka 9% bagi tempoh 1989-1990 dan 20% bagi tempoh 1991-1995. Tidak syak lagi ingatan Kebawah Duli Yang Maha Mulia Seri Paduka Baginda supaya industri ini diberi penekanan adalah tepat sekali untuk menjadikannya industri utama negara.

ASEAN dan Dasar Luar Negeri Malaysia

Tuan Yang di-Pertua, kerjasama ekonomi serantau menerusi ASEAN perlu dipertingkatkan terutamanya di dalam suasana ekonomi sekarang ini.

Prestasi ekonomi negara-negara ASEAN bagi tahun 1988 menerusi Keluaran Dalam Negeri Kasar sebenar dijangka tumbuh lebih tinggi sedikit daripada anggaran tahun 1987. Memandangkan langkah-langkah untuk memperkukuhkan ekonomi masing-masing yang dilaksanakan di negara ASEAN serta langkah-langkah penyesuaian yang dilakukan bagi menghadapi kemelesetan di samping dasar-dasar menggalakkan pelaburan dalam negeri serta kejatuhan kadar faedah, adalah antara faktor-faktor yang dijangka menjadi pendorong untuk pertumbuhan yang lebih baik

bagi ekonomi ASEAN. Kenaikan nilai Yen dan rizab luar negeri Taiwan juga dapat menggalak Jepun dan Taiwan menempatkan semula industri-industri mereka di rantau ini.

Ekonomi Filipina sedang mengalami rancangan-rancangan penyesuaian struktur bagi memperbaiki imbalan pembayaran dan mengurangkan inflasi. Bagi menambahkan eksport bukan minyak dan menarik lebih pelabur asing, Indonesia telah memperkenalkan tiga gabungan langkah-langkah melonggarkan dasar-dasar perdagangan barangan dan pelaburan asing pada bulan Mei dan Oktober 1986 dan Januari, 1987. Penurunan nilai rupiah sebanyak 31% terhadap nilai dollar Amerika Syarikat pada bulan September, 1986 dijangka dapat menggalakkan pertumbuhan ekonomi Indonesia. Usaha negeri Thai untuk memperbaiki iklim pelaburan dan sektor eksportnya melalui penanguhan cukai, pengecualian tarif ke atas mesin-mesin diimport, hak membeli tanah dan kadar faedah yang lebih rendah, dijangka dapat mengukuhkan ekonominya pada tahun 1988 ini.

Langkah-langkah yang diambil oleh Singapura untuk memperbaiki daya saingan antarabangsa melalui langkah-langkah pemotongan kos dan galakan eksport telah menunjukkan tanda-tanda yang menggalakkan. Oleh itu ekonomi Singapura dijangka mencapai prestasi yang lebih baik daripada tahun-tahun sebelumnya.

Kita berpendapat Kerajaan negara-negara anggota ASEAN perlu mempertingkatkan lagi kerjasama ekonomi dalam hubungan kerjasama serantau, walaupun sudah disebutkan oleh Timbalan Menteri Luar Negeri tadi bahawa mereka sedang giat untuk mencari jalan bagi mengatasi masalah ekonomi di rantau ini. Di dalam

keadaan kemelesetan ekonomi dunia, perdagangan intra-ASEAN juga turut terjejas. Jumlah perdagangan di kalangan negara-negara ASEAN berkurangan kepada AS\$21.2 ribu juta pada tahun 1986 berbanding dengan AS\$23.7 ribu juta pada tahun 1985 iaitu kekurangan sebanyak 10.5%. Kekurangan ini disebabkan oleh kelembapan ekonomi yang dialami oleh kebanyakan negara-negara ASEAN pada tahun 1986 yang memerlukan negara-negara anggota mengurangkan jumlah import masing-masing untuk membendung defisit akaun semasa.

Beberapa mesyuarat di peringkat Menteri dan pegawai kanan ASEAN telah diadakan dalam tempoh 1986/1987 bagi membincangkan berbagai isu ekonomi terutamanya dalam bidang perdagangan, industri, bank dan kewangan.

Dengan langkah-langkah pemulihan yang diambil oleh negara-negara ASEAN itu, kita juga seharusnya berawas-awas akan kecenderungan kuasa-kuasa ekonomi dunia yang terus mengamalkan dasar-dasar perlindungan dan nasionalisma ekonominya. Jika dasar-dasar ini berlaku secara berleluasa, akhirnya akan menjejaskan kerjasama ekonomi dan perdagangan dengan lain-lain negara.

Saya tertarik dengan satu ramalan ekonomi yang dibuat oleh Dr Ravi Batra di dalam bukunya bertajuk "The Great Depression of 1990", dengan izin. Menurut teori beliau dunia akan mengalami malapetaka ekonomi pada tahun 1990 sehingga ke tahun 1996, berikutan dari dasar-dasar negara di dunia mengamalkan perlindungan yang menyebabkan kegiatan ekonomi tertumpu kepada aktiviti-aktiviti dalam negeri. Pada masa itu hanya mereka yang mempunyai wang ringgit sahaja yang menikmati situasi tersebut.

Walaupun ianya sebagai satu ramalan ekonomi dengan kajian-kajian berdasarkan kepada ekonomi di Amerika Syarikat, tetapi negara-negara di dunia seharusnya memahami kesan-kesan dari dasar perlindungan terutamanya kepada negara-negara miskin dan yang membangun.

Di dalam hubungan yang sama, negara-negara ASEAN sebagai pengeluar barangan utama dunia perlu bersepakat di dalam menentang kempen-kempen yang ditujukan kepada setengah-setengah keluaran utamanya. Satu daripada contohnya Malaysia sedang alami iaitu kempen-kempen memburuk-burukkan minyak kelapa sawit yang dilakukan oleh Persatuan Kacang Soya Amerika.

Kementerian Luar Negeri

Tuan Yang di-Pertua, di dalam usaha mempertingkatkan perkembangan ekonomi dengan negara luar, saya amat bersetuju dengan langkah-langkah yang telah diambil oleh Kementerian Luar Negeri dalam soal mengutamakan hal ehwal ekonomi. Perlaksanaan dasar luar berteraskan ekonomi ini memerlukan Kerajaan melaksanakan konsep organisasi bersepadu pada 1hb Januari, 1988. Dengan pelaksanaan konsep ini aktiviti-aktiviti ekonomi seperti perdagangan, pelancongan dan pelaburan akan diselaraskan oleh ketua perwakilan. Saya berpendapat cara ini akan dapat mempertingkatkan lagi prestasi negara kita dalam hal ehwal ekonomi di luar negeri.

Untuk melaksanakan tugas-tugas ini dengan lebih berkesan lagi, Kementerian Luar Negeri perlulah diberikan peruntukan kewangan yang mencukupi dan dibekalkan dengan pegawai-pegawai yang berkelayakan dan berpengalaman di dalam hal ehwal ekonomi.

Di antara lain langkah-langkah yang saya rasa perlu diambil perhatian oleh Kementerian ialah:

- (1) Memperkemarkan lagi bahagian ekonomi di Kementerian supaya tugas-tugas ekonomi dapat dilaksanakan dengan lancar dan berkesan.
- (2) Menubuhkan satu Jawatankuasa Penyelaras hal Ehwal Ekonomi Luar di semua Perwakilan di luar negeri yang dikendalikan oleh ketua perwakilan dengan dianggotai oleh pegawai-pegawai dari berbagai agensi Kerajaan yang terlibat dengan hal-hal ekonomi.
- (3) Mengeluarkan arahan-arahan serta garis-garis panduan kepada Perwakilan Malaysia di luar negeri supaya memberi perhatian yang lebih terhadap hal-hal ekonomi.
- (4) Menghantar pegawai-pegawai berkursus di dalam dan luar negeri dalam bidang ekonomi.
- (5) Mempereratkan hubungan dengan semua agensi-agensi Kerajaan bagi mempertingkatkan kefahaman dan keberkesanan pegawai-pegawai Kementerian dalam hal-hal ekonomi.

Isu Palestin

Tuan Yang di-Pertua, sebagaimana yang kita semua ketahui, kejayaan dan keganasan Israel ke atas rakyat Palestin telah sampai ke tahap yang di luar perikemanusiaan. Kami semua menyanjung di atas sokongan Kerajaan Seri Paduka ke atas perjuangan rakyat Palestin bagi mengembalikan hak mutlak mereka di bumi Palestin. Rakyat negara ini juga telah menunjukkan simpati mereka dengan menghulurkan derma-derma ikhlas kepada tabung Palestin. Tetapi satu perkara pokok yang perlu kita

ingat ialah perjuangan kita menentang Zionis dengan agen-agen Zionis yang berhasrat menakluki seluruh dunia.

Israel akan menggunakan mana-mana juga negara bagi memperkembangkan cita-cita jahat zionisnya termasuklah menggunakan kuasa-kuasa besar.

Perdamaian dan pergeseran di Timur Tengah melibatkan juga perancangan politik kuasa-kuasa besar dunia. Di dalam pendedahan terakhir di Amerika Syarikat, Israel telah berselindung di sebalik penubuhan Jawatankuasa Hal Ehwal Awam Amerika-Israel (AIPAC) dengan menggunakan pengaruh dan keganasan lobi Yahudi dalam pentadbiran Amerika Syarikat hinggan seorang Senator tersisir daripada Kongres Amerika.

Yahudi menggunakan kuasa lobinya yang kuat dengan mengeksploitasikan nilai-nilai kebanggaan orang-orang Amerika seperti kebebasan bersuara, kebebasan akademik dan komitmen terhadap hak asasi manusia untuk kepentingan Israel.

Jelaslah bahawa perjuangan mengembalikan hak mutlak Palestin bukan terletak di bumi Palestin sahaja tetapi juga pengaruh-pengaruh Zionis di negara-negara kuasa dunia.

Keselamatan Dalam Negeri

Tuan Yang di-Pertua, kita semua sentiasa diperingatkan oleh Kebawah Duli Yang Maha Mulia Seri Paduka Baginda supaya sentiasa berwaspada terhadap kegiatan-kegiatan anasir komunis dan golongan-golongan antinasional yang mengeksploitasi berbagai-bagai isu untuk mewujudkan huru-hara yang menjejaskan keselamatan negara.

Pendedahan Kerajaan menerusi Kertas Putih yang bertajuk "Ke Arah

Memelihara Keselamatan Negara", jelas menunjukkan penglibatan keji pihak komunis kepada segala isu-isu sensitif yang berlaku di negara ini. Eksploitasi ini bertujuan memajukan objektif Parti Komunis Malaya (PKM) untuk merampas kuasa dan menubuhkan sebuah negara komunis.

PKM mengatur dakyah-dakyah dan propaganda yang halus sesuai dengan sensitiviti dan rasa ketidakpuasan hati setiap kaum di negara ini. PKM juga telah berusaha menggerakkan semula kegiatan militan di kalangan pelajar-pelajar terutamanya pelajar-pelajar Melayu di luar negeri dengan menyediakan pemikiran mereka kepada kefahaman komunisme. Apa yang lebih mendukacitakan ialah penglibatan individu-individu dan pertubuhan-pertubuhan yang memperalatkan agama untuk kepentingan diri sendiri dengan sifat-sifat melampau dan cuba mencapai hasrat mereka dengan cara kekerasan dan di luar Perlembagaan.

Pengeksploitasian pelbagai isu sensitif berbentuk perkauman dan tindakbalas-tindakbalas dari penyokong-penyokong Kerajaan telah menyebabkan satu reaksi yang berangkaian atau, dengan izin, "vicious circle" yang boleh menjejaskan keselamatan negara. Apatah lagi wujudnya pula akhbar-akhbar yang membakar dan menyemarakkan perasaan semua kaum di negara ini kepada setiap isu yang timbul.

Walau bagaimanapun, berkat kebijaksanaan dan budibicara pemimpin-pemimpin dan kerjasama rakyat, kita telah dapat melintasi keadaan mencemaskan itu dengan tenang.

Tuan Yang di-Pertua, kita semua menyokong di atas segala tindakan wajar yang diambil oleh Kerajaan Seri Paduka bagi mengekalkan ketenteraman awam dan keselamatan negara.

Tuan Yang di-Pertua, dengan penuh hormat dan takzim, izinkan saya mohon mencadangkan. Terima kasih.

4.21 ptg.

Dato' Tan Peng Khoo: Tuan Yang di-Pertua, saya bangun untuk menyokong Usul Menjunjung Kasih atas Titah Ucapan Kebawah Duli Yang Maha Mulia Seri Paduka Baginda Yang di-Pertuan Agong yang dilafazkan pada masa membuka Penggal Kedua, Parlimen Ketujuh.

Tuan Yang di-Pertua, sepertimana yang tercatat dalam Titah Ucapan itu, saya mohon izin, Tuan Yang di-Pertua, untuk membacakan paragraf permulaan iaitu:

"Dengan izin Allah, sejak merdeka negara kita terus aman dan berjaya mengekalkan sistem demokrasi berparlimen, sekalipun menghadapi berbagai-bagai cabaran. Ini semua adalah berkat bakti dan pengorbanan para pemimpin dan pejuang kemerdekaan yang mempunyai semangat kesetiaan dan cintakan negara mengatasi kepentingan peribadi; ianya telah berjaya membina asas-asas perpaduan rakyat berdasarkan sikap toleransi dan saling hormat menghormati sehingga kedaulatan negara dapat dipertahankan dan kemajuan dapat tercapai. Semangat inilah yang perlu kita kekalkan supaya kemajuan negara dapat dipertingkatkan lagi".

Tuan Yang di-Pertua, bagi pihak saya sendiri, paragraf permulaan yang saya baca sebentar tadi adalah dengan harapan supaya pemimpin-pemimpin yang sedia ada pada masa sekarang dan juga pada masa-masa yang akan datang sentiasa akan mengingati serta mengamalkan semangat yang telah diamalkan oleh pejuang-pejuang kemerdekaan pada masa negara kita menuntut 31 tahun dahulu. Bukan

hanya mengekalkan sahaja tetapi hendaklah dipertingkatkan lagi dan diharap juga supaya setiap rakyat dalam negara kita ini tidak kira keturunannya akan mengambil langkah-langkah sepertimana yang telah ditekankan dalam Titah Ucapan Baginda.

Tuan Yang di-Pertua, sungguhpun negara kita menghadapi berbagai-bagai cabaran dan krisis semenjak kemerdekaan tetapi dengan kebijaksanaan pemimpin-pemimpin tertinggi dari semasa ke semasa telah dapat mengatasi segala-galanya. Kesemua ini tidak akan dapat dihasilkan jika tidak ada kerjasama dari semua kaum dan semua lapisan rakyat. Kita hendaklah juga sentiasa mengkaji segala pengalaman-pengalaman pahit yang telah kitaalui.

Tuan Yang di-Pertua, dalam tempoh Baginda memerintah negara kita, sungguhpun kita menghadapi kemelesetan ekonomi sedunia, tetapi sekali lagi dengan kerjasama dan persefahaman dari semua kaum, maka kita dapat memulihkan ekonomi negara kita dengan cara beransur-ansur sehingga Kerajaan kita dapat menarik pelaburan modal dari luar dan dalam negeri dengan begitu banyak sekali. Kita berasa amat berbangga atas kejayaan-kejayaan yang telah diperolehi.

Tuan Yang di-Pertua, Baginda merupakan Yang di-Pertuan Agong yang adil dan yang telah memerintah negara kita atas dasar dan corak sebuah masyarakat berbilang keturunan yang menjadi rakyat Malaysia. Dalam Titah Ucapan Baginda, Baginda telah menitik-beratkan perpaduan rakyat. Ini membuktikan kepada kita semua bahawa Baginda sentiasa memberi perhatian yang utama dan serius terhadap soal perpaduan rakyat. Sekiranya perpaduan di antara semua kaum dalam negara kita tidak wujud

lagi, maka sudah tetap keamanan, kemakmuran dan kestabilan negara yang sedia ada akan musnah. Dalam hubungan ini peristiwa-peristiwa yang telah dialami oleh kita semua patut dijadikan sebagai pengajaran kepada kita semua.

Tuan Yang di-Pertua, untuk menyambut saranan Baginda, maka kita semua sebagai pemimpin-pemimpin di berbagai-bagai peringkat serta seluruh rakyat Malaysia hendaklah berpegang teguh kepada nilai-nilai yang dilafazkan oleh Baginda seperti bersikap toleransi dan saling hormat menghormati serta mempunyai semangat kesetiaan dan cintakan negara.

Tuan Yang di-Pertua, walau apa pun dasar-dasar Kerajaan saya percaya kejayaan terletak kepada pencapaian kerjasama dan perpaduan rakyat. Oleh yang demikian, izinkan saya mencadangkan supaya Kerajaan kita hendaklah mengambil langkah-langkah yang lebih realistik, positif dan efektif bagi mencapai matlamat perpaduan negara.

Saya berasa dukacita kerana negara kita telah merdeka selama lebih kurang 31 tahun, tetapi soal perpaduan masih jadi satu masalah utama. Sungguhpun sebentar tadi dalam masa pertanyaan bagi Jawab Mulut telah juga dibangkitkan perkara mengenai langkah-langkah yang sedang diambil oleh Kerajaan untuk memupuk dan memperbaiki hubungan antara kaum di Malaysia dan kita telah diberi jawapan dan penjelasan sedikit sebanyak oleh Setiausaha Parlimen di Jabatan Perdana Menteri, saya berpendapat iaitu rancangan-rancangan atau program-program yang telah dan sedang dilaksanakan itu tidak memberi kesan yang memuaskan. Oleh yang demikian, izinkan saya menarik perhatian Dewan yang mulia ini terhadap perkara ini lagi.

Tuan Yang di-Pertua, pada masa-masa yang lampau, Kerajaan kita mempunyai satu Lembaga yang dinamakan Lembaga Perpaduan Negara yang terletak di bawah Jabatan Perdana Menteri dengan dipengerusikan oleh seorang Menteri kalau tidak silap saya. Tetapi pada masa sekarang kita tidak dengar apa sudah terjadi terhadap Lembaga itu, senyap sahaja, sama ada masih wujud lagi atau tidak dan jika wujud siapa pengerusinya.

Izinkan saya mengesyorkan supaya dihidupkan semula Lembaga ini dan diberikan tempat serta kedudukan yang sewajarnya dengan seorang Pengerusi yang mempunyai cukup pengalaman serta pengaruh yang tinggi. Status dan kedudukan jawatan ini janganlah dipandang rendah oleh Kerajaan. Beberapa Timbalan Pengerusi atau Naib Pengerusi juga hendaklah dilantik yang terdiri daripada berbagai-bagai kaum. Peruntukan yang cukup hendaklah disediakan untuk membolehkan Lembaga ini melaksanakan program-program yang benar-benar akan memberi manfaat terhadap mencapai objektifnya. Lembaga ini hendaklah juga diwujudkan di semua peringkat iaitu daripada peringkat nasional sehingga ke peringkat negeri dan seterusnya ke peringkat daerah dan sekiranya boleh di peringkat mukim-mukim juga. Mesyuarat-mesyuarat hendaklah sentiasa diadakan untuk membolehkan ahli-ahli jawatankuasa membincangkan semua masalah yang dihadapi dengan cara terus-terang dalam bilik mesyuarat sehingga dapat mencapai satu persetujuan yang agak boleh diterima oleh semua kaum berpandukan kepada sikap toleransi dan hormat-menghormati satu sama lain. Lembaga ini hendaklah sentiasa mencari jalan dan beriktiraf supaya pembinaan jambatan-jambatan persaudaraan dan perpaduan antara kaum dapat diperbanyakkan lagi khususnya di peringkat mukim-mukim

dan kampung-kampung. Tujuan utama Lembaga ini hendaklah mencapai unity, dengan izin, dan bukan uniformity di antara semua kaum.

Tuan Yang di-Pertua, kita tidak boleh menafikan iaitu untuk menuju ke matlamat perpaduan, suka atau tidak, terpaksa kita dapat membincang segala perkara atau masalah melalui satu bahasa yang boleh difahami oleh semua kaum. Bahasa itu telah diterima oleh semua kaum iaitu Bahasa Malaysia. Oleh yang demikian, Lembaga Perpaduan hendaklah bertanggungjawab memperhebatkan usaha menanamkan semangat cintakan Bahasa Malaysia di kalangan rakyat bagaimana yang telah dibuat pada masa-masa yang lampau.

Saya tidak tahu apa sebabnya usaha ini telah dihenti atau ditamatkan kerana pada masa itu berbagai-bagai pegawai telah digajikan untuk menggalakkan penduduk-penduduk di luar kawasan bandar mempelajari Bahasa Malaysia.

Tuan Yang di-Pertua, sebenarnya, dasar-dasar yang terkandung dalam Rukunegara dan Dasar Ekonomi Baru adalah dasar yang telah dibincang dan dihalusi oleh semua pemimpin-pemimpin kaum dan juga telah diterima untuk dilaksanakan. Semangat dasar ini hendaklah dipatuhi dengan sebenar-benarnya oleh semua jabatan dan pegawai-pegawai Kerajaan. Sekiranya didapati ada apa-apa penyelewengan, hendaklah dengan serta merta dibetulkan supaya jangan dibenarkan penyelewengan itu berlarutan sehingga ada setengah-tengah kaum yang berasa tidak puas hati dan frustrated.

Tuan Yang di-Pertua, saya menyentuh perkara perpaduan dengan secara panjang lebar oleh kerana saya berpendapat iaitu sekiranya perpaduan di antara kaum tidak

wujud, maka tidak ada guna kita membincangkan perkara-perkara yang lain kerana sudah tidak ada basis. Sepertimana yang telah disebutkan lebih awal, keamanan dan kemakmuran akan musnah jika tidak ada perpaduan antara kaum dan pada waktu itu tidak ada makna lagi kita membincangkan perkara pembangunan dan lain-lain.

Tuan Yang di-Pertua, pada akhirnya saya mempunyai keyakinan dan menaruh harapan yang tinggi bahawa di bawah pimpinan Yang Amat Berhormat Dato' Seri Dr Mahathir bin Mohamad, Perdana Menteri kita dan rakan-rakan Kabinetnya, Kabinet akan memberi timbangan yang istimewa terhadap perkara perpaduan kaum dan akan menghidupkan Lembaga Perpaduan Negara supaya Lembaga ini akan dapat memainkan peranan yang lebih giat dan positif demi kepentingan rakyat dan negara kita.

Tuan Yang di-Pertua, untuk memberi peluang kepada Ahli-ahli Yang Berhormat yang lain mengambil bahagian dalam perbahasan Usul ini maka saya tidak berhajat menyentuh perkara-perkara yang lain, memadai saya tekan kuat mengenai masalah perpaduan negara kerana saya berpendapat bahawa perkara ini adalah amat mustahak dan penting sekali.

Tuan Yang di-Pertua, dengan kata-kata ini sekali lagi ingin saya mengulangi sokongan saya terhadap Usul Menjunjung Kasih atas Titah Ucapan Kebawah Duli Yang Maha Mulia Seri Paduka Baginda Yang di-Pertuan Agong yang telah dicadangkan oleh Yang Berhormat Tuan Haji Abu Bakar bin Lajim sebentar tadi. Sekian, terima kasih.

Timbalan Yang di-Pertua: Ahli-ahli Yang Berhormat, saya kemukakan Usul atas nama Yang Berhormat Tuan

Haji Abu Bakar bin Lajim. Masalah di hadapan Majlis sekarang ialah:

Bahawa suatu Ucapan yang tidak seperti ini dipersembahkan Kebawah Duli Yang Maha Mulia Seri Paduka Baginda Yang di-Pertuan Agong, demikian bunyinya:

"Ampun Tuanku,

Patik, Yang di-Pertua dan Ahli-ahli Dewan Negara Malaysia di dalam Persidangan Parlimen, memohon ampun mempersembahkan suatu ucapan yang zalil daripada Majlis Dewan Negara mengucapkan berbilang-banyak syukur dan menjunjung kasih Kebawah Duli kerana Titah Ucapan Kebawah Duli pada masa membuka Penggal Kedua Parlimen Yang Ketujuh."

dan terbuka untuk dibahas. Ada di antara Ahli-ahli Yang Berhormat yang hendak berucap? Dipersilakan Yang Berhormat Tuan Azman Atar bin Othman.

4.41 ptg.

Tuan Azman Atar bin Othman: Tuan Yang di-Pertua, saya mengucapkan ribuan terima kasih kepada Tuan Yang di-Pertua, kerana memberi peluang kepada saya mengambil bahagian di dalam perbahasan atas Titah Ucapan Duli Yang Maha Mulia Seri Paduka Baginda Yang di-Pertuan Agong yang telah berlangsung pada 7hb Mac ketika pembukaan Penggal Kedua, Parlimen Yang Ketujuh.

Saya menyokong penuh atas Usul yang dibawa oleh Yang Berhormat Senator Tuan Haji Abu Bakar bin Lajim yang mana saya berpendapat Titah Ucapan Duli Yang Maha Mulia Seri Paduka Baginda Yang di-Pertuan Agong itu merangkumi segenap bidang iaitu perpaduan, bahasa, keselamatan dan keamanan negara, ekonomi serta pelancongan dan dasar-dasar luar negeri dan lain-lain lagi. Ia

adalah menunjukkan suatu keikhlasan, niat suci dan doa serta harapan yang mula dari Seri Paduka Tuanku untuk melihat kesejahteraan dan keharmonian kehidupan rakyat dari segenap lapisan masyarakat di negara yang kita cinta ini.

Tuan Yang di-Pertua, saya menyentuh Titah Ucapan Duli Yang Maha Mulia Seri Paduka Baginda Yang di-Pertuan Agong yang ingin melihat rakyat jelatanya memberikan sokongan yang tidak berbelah-bahagi kepada pimpinan Perdana Menteri yang dilantik sendiri oleh Duli Yang Maha Mulia Seri Paduka Baginda Yang di-Pertuan Agong iaitu Dato' Seri Dr Mahathir Mohamad.

Apa yang menyedihkan saya, ada suara-suara sumbang dan ucapan-ucapan sindiran oleh parti pembangkang di dalam Dewan Rakyat seolah-olah Titah Ucapan Duli Yang Maha Mulia itu ditulis oleh Perdana Menteri kita sendiri atau dari pemimpin Barisan Nasional.

Bagi saya, pihak-pihak yang mempersoalkan niat ikhlas dan nasihat secara berterus terang dari Duli Yang Maha Mulia Seri Paduka Baginda Yang di-Pertuan Agong Tuanku, adalah merupakan rakyat yang berfikiran negatif dan cetek pemikiran serta tidak layak memegang taraf warganegara Malaysia yang tercinta ini dan juga ucapan mereka seolah-olah tidak menghormati kedaulatan Duli Yang Maha Mulia Tuanku sebagai Agong juga selaku payung kepada rakyat jelata. Saya percaya jika di zaman silam dulu mereka-mereka ini akan dihukum sebagai penderhaka kepada Raja dan hukumannya adalah buang negeri ataupun lebih teruk lagi daripada itu.

Tuan Yang di-Pertua, mereka-mereka yang menyuarakan suara-suara sumbang ini adalah terdiri daripada golongan-golongan yang

menganggap bahawa negara kita mengamalkan sistem demokrasi ala-British di mana mereka boleh bercakap apa sahaja tanpa memikirkan keselamatan negara, bahawa rakyat Malaysia merangkumi dari berbagai-bagai golongan kaum yang menganuti berbagai-bagai agama dan kebudayaan. Walhal negara British tidak mempunyai masalah perkauman kerana mereka terdiri dari satu kaum majoriti yang sama bahasa, kebudayaan serta anutan agama. Mereka lupa bahawa suara-suara sumbang mereka apabila menyentuh kesetiaan kepada pemimpin agama dan Duli Yang Maha Mulia Raja-raja adalah satu perkara yang paling sensitif bagi orang-orang Melayu khususnya.

Dalam hal ini saya menyeru kepada Kementerian Dalam Negeri supaya mengambil tindakan tegas kepada sesiapa sahaja pemimpin yang cuba untuk memperkecil-kecilkan Duli Yang Maha Mulia Raja-Raja Melayu dan ingin melihat negara kita di dalam kancan huru-hara. Pada saya, saya ingin pasukan keselamatan bertegas di dalam perkara ini. Patut tangkap, tangkap sahajalah mereka-mereka ini dengan peruntukan undang-undang ISA yang telah sedia ada.

Dari segi keselamatan untuk menentukan negara Malaysia aman damai, agar rakyat dapat hidup dengan perasaan harmoni dan hormat-menghormati di antara satu sama lain dari semua kaum dan kebudayaan serta agama kaum masing-masing, maka saya mencadangkan supaya Kerajaan mesti mula membendung dan membanteras pelampau-pelampau dan ekstremis-ekstremis yang boleh membawa pengaruh yang boleh menimbulkan huru-hara dalam negara kerana apabila negara sudah tidak selamat kita jangan mimpi yang negara kita akan mempunyai ekonomi yang baik.

Saya berpendapat perkara ini harus dibendung, Tuan Yang di-Pertua, kerana kalau kita tidak bertindak dari sekarang maka saya percaya negara kita akan merupakan sebuah negara yang sentiasa di dalam keadaan huru-hara. Maka pelabur-pelabur akan mula takut untuk datang melabur dan saya percaya ekonomi negara kita akan bertambah teruk. Oleh itu pasukan keselamatan khasnya pasukan Polis terpaksa bekerja kuat untuk menentukan gejala pelampau-pelampau ini mesti diambil tindakan. Kempen-kempen kotor yang saya difahamkan sekarang, Tuan Yang di-Pertua, melalui majlis-majlis agama, contohnya majlis Israk dan Mikraj pada mulanya mereka bercakap masalah agama, selepas itu mulalah mereka mengumpulkan orang-orang atau penyokong-penyokong mereka semata-mata untuk mendengar ceramah-ceramah menghentam pimpinan Kerajaan yang ada sekarang.

Maka saya berharap sangat-sangat terutamanya kepada pasukan Polis yang menjalankan tugas ini jangan peduli walaupun ianya merupakan satu majlis di dalam masjid tetapi kalau apa yang disampaikan oleh penceramah itu terkeluar daripada ajaran Islam maka sila ambil tindakan, tangkap sahaja mereka-mereka ini. Kalau kita tidak bendung negara kita daripada sekarang saya percaya 10 tahun yang akan datang untung nasib generasi kita akan datang akan lebih teruk menghadapi masalah ini.

Tuan Yang di-Pertua, terutamanya saya amat kecewa di atas sikap Pembangkang DAP dan PAS yang mana DAP telah menuduh Titah Ucapan Duli Yang Maha Mulia adalah merupakan satu Titah Ucapan seolah-olah Duli Yang Maha Mulia sudah campur di dalam gelanggang politik. Begitu juga PAS. PAS seolah-olah mengejek Duli Yang Maha Mulia kononnya kalau boleh Titah Ucapan Duli Yang Maha Mulia itu dibawa ke

pilihanraya kecil Tanjong Puteri. Ini menunjuk kedua-dua parti ini adalah merupakan parti perkauman. Kalau DAP adalah merupakan parti perkauman orang-orang Cina dan PAS pula adalah merupakan parti perkauman orang-orang Melayu. Saya mencadangkan kalau boleh Kerajaan mengharamkan kedua-dua parti ini kerana selagi kedua-dua parti ini diberikan peluang untuk terus menerajui parti masing-masing maka saya percaya kita tidak akan mimpi untuk mendapatkan satu keamanan yang baik, harmoni di antara semua kaum di dalam negara kita.

Tuan Yang di-Pertua, terutamanya kepada parti PAS parti ini bernama Parti Islam Semalaysia. Pada saya Tuan Yang di-Pertua, kita harus bertindak dari sekarang dan saya mencadangkan Kerajaan supaya apa juga bentuk parti yang ada kaitan dengan nama agama itu sendiri mahupun agama Islam, agama Buddhist, agama apa juga maka kita tidak seharusnya Kerajaan membenarkan parti ini ditubuhkan kerana ini akan mengelirukan rakyat jelata terutamanya kepada penganut-penganut masing-masing. Jadi, dengan itu saya mencadangkan sekali lagi dengan adanya kedua parti ini yang memainkan sentimen perkauman masing-masing ini antara DAP dengan PAS maka saya percaya kita tidak dapat menikmati keharmonian yang begitu kita hajat-hajatkan.

Tuan Yang di-Pertua, di samping itu Duli Yang Maha Mulia Seri Paduka Baginda Yang di-Pertuan Agong bertitah supaya semua rakyat Malaysia bersatupadu demi untuk keamanan dan kemakmuran negara yang kita cintai. Seharusnya kita menyokong sepenuhnya terhadap Titah Ucapan Baginda kerana slogan bersatupadu adalah salah satu ciri-ciri nilai Islam.

Tuan Yang di-Pertua, Duli Yang Maha Mulia Seri Paduka Baginda

Yang di-Pertuan Agong juga menyarankan supaya kita bersatupadu dan menggunakan Bahasa Malaysia sebagai alat perpaduan haruslah disanjung tinggi juga. Kita telah pun merdeka selama 30 tahun. Tentu sekali Bahasa Malaysia sebagai Bahasa Kebangsaan kita telah pun dapat dikuasai dengan baik oleh segenap lapisan masyarakat dan tentu sekali saranan Duli Yang Maha Mulia Tuanku bahawa bahasa dapat menyatupadukan bangsa di kalangan rakyat di negara ini akan tercapai tanpa banyak masalah lagi, insya Allah. Sepatutnyalah Bahasa Malaysia yang kita cintai ini tidak lagi dipersoalkan oleh mana-mana pihak kerana niat kita ikhlas iaitu untuk menyatupadukan rakyat Malaysia.

Saya ingin menyeru supaya Kerajaan bertegas di dalam dasar pelaksanaan penggunaan Bahasa Malaysia sebagai alat perpaduan dan keagungan Bahasa Malaysia hendaklah diutamakan dari bahasa penjajah iaitu Bahasa Inggeris.

Saya juga menyeru supaya Kerajaan mempercepatkan penggunaan Bahasa Malaysia di bidang perundangan dari segi pentadbiran dan setiap perbicaraan hendaklah menggunakan Bahasa Malaysia untuk meletakkan Bahasa Malaysia sebagai bahasa rasmi dan jangan lagi terikut-ikut dengan gelagat penjajah British hinggalah susah bagi kita untuk mendaulatkan Bahasa Malaysia di mahkamah-mahkamah.

Tuan Yang di-Pertua, saya amat tertarik hati di dalam Titah Ucapan Duli Yang Maha Mulia yang begitu ikhlas, yang ingin melihat rakyatnya hidup aman damai, yang ingin melihat rakyatnya hidup di dalam ekonomi yang begitu baik di dalam negara daripada berbilang kaum ini. Maka kalau kita ingin melihat apa juga hasrat dan niat suci daripada Duli Yang Maha Mulia di dalam Titah

Ucapan itu maka kita harus sama-sama mengambil berat dan akan sama-sama bertanggungjawab di dalam menentukan semua pelaksanaan dasar-dasar yang telah diluluskan oleh Dewan Rakyat dan juga Dewan Negara di dalam menentukan supaya dasar ini dapat dipergunakan oleh pihak Kerajaan untuk kepentingan rakyat jelata.

Kepada pihak-pihak yang memahami corak pentadbiran dalam negara kita ini, saya ingin menyentuh kepada sesiapa juga bahawa di dalam corak pemerintahan demokrasi yang ada wujud dalam negara kita ini bahawa mereka haruslah faham bahawa di bidang kuasa yang menentukan semua perkara-perkara dan undang-undang untuk pentadbiran negara ini adalah dari kuasa rakyat kerana rakyat telah memilih wakil-wakilnya untuk duduk di dalam Dewan Rakyat dan membuat undang-undang dan dilulus pula oleh Dewan Negara. Maka sesiapa juga yang mewakili rakyat yang dipilih di dalam pilihanraya maka mereka berhak menentukan sebarang Rang Undang-undang untuk dipergunakan kepada pentadbiran negara kita. Maka dengan adanya pindaan ataupun apa juga bentruk undangan yang dipimpin oleh Yang Amat Berhormat Dato' Seri Dr Mahathir Mohamad, maka tidak seharusnya ada pihak-pihak yang masih meragui ataupun masih mempersoalkan kerana Yang Amat Berhormat selaku pemimpin yang diberi mandat oleh rakyat maka beliau berhak untuk menentukan corak pentadbiran di bawah pimpinannya sendiri sebagai satu corak pentadbiran yang boleh menguntungkan rakyat. Jika sekiranya ada perkara-perkara di dalam satu-satu undang-undang yang didapati tidak begitu kuat, tidak begitu dapat digunakan dengan sebaik-baiknya maka Yang Amat Berhormat sebagai Perdana Menteri yang bertanggungjawab di dalam

pentadbiran negara berhak untuk membuat sebarang pindaan. Maka bila ada pindaan-pindaan maka tak sepatutnya lagi pihak-pihak yang ingin mempersoalkan atas bidang kuasa Yang Amat Berhormat sebagai Perdana Menteri yang diberi mandat oleh pilihanraya di dalam negara kita.

Tuan Yang di-Pertua, kalaulah rakyat semua dapat memahami atas tugas dan tanggungjawab masing-masing dan saya percaya negara kita akan merupakan sebuah negara contoh di dalam dunia kerana negara kita adalah merupakan sebuah negara yang diduduki oleh semua kaum dan sesiapa yang menjadi pemimpin di dalam negara yang datangnya dari berbagai kaum maka dia adalah merupakan pemimpin jaguhan dan pemimpin yang menjadi teladan kerana bukan senang hendak menyatupadukan rakyat. Jadi, di dalam usaha Yang Amat Berhormat Perdana Menteri kita untuk menyatupadukan rakyat dan membawa rakyat hidup segala-galanya di dalam keselisaan, maka saya harap pihak-pihak pelampau dan ekstrimis-ekstrimis yang telah diberi peluang mengikut amalan demokrasi bertanding di dalam apa corak pertandingan sekalipun apabila sudah tewas di dalam pertandingan harus menghormati kepada keputusan demokrasi itu sendiri, walaupun seorang itu telah menang dengan satu undi maka itu adalah satu amalan demokrasi dan kalau kita ingin bercakap demokrasi maka kita harus menghormati keputusan demokrasi itu sendiri.

Tuan Yang di-Pertua, saya rasa saya juga ingin memberi peluang kepada kawan-kawan yang lain untuk sama turut membahaskan Ucapan Titah Di-Raja oleh kerana mungkin sahabat-sahabat saya yang lain akan menyentuh di sekitar ekonomi maka pada saya, saya ingin menumpukan kepada keselamatan dan keamanan

begitu juga perpaduan rakyat di kalangan semua kaum di dalam negara kita.

Maka dengan itu, saya menyokong penuh di atas Usul yang dibawa oleh Yang Berhormat Tuan Haji Abu Bakar bin Lajim dalam Ucapan Titah Yang di-Pertuan Agong. Sekian, terima kasih.

Timbalan Yang di-Pertua: Yang Berhormat Tuan Lau Keng Siong.

5.00 ptg.

Tuan Lau Keng Siong: Tuan Yang di-Pertua, saya ucapkan syukur dan menjunjung terima kasih kepada Titah Ucapan Duli Yang Maha Mulia Seri Paduka Baginda Yang di-Pertuan Agong yang sungguhpun pendek, tetapi ikhlas dan semuanya apa yang dikehendakkan oleh rakyat atau Kerajaan semua ada dalam Titah Ucapan.

Tuan Yang di-Pertua, saya fikir Rukunegara kita pada masa sekarang telah dilupai oleh rakyat jelata. Saya suka mengingatkan sekiranya boleh Kabinet memutuskan buat satu keputusan, tiap-tiap Jabatan Kerajaan atau pertubuhan-pertubuhan mesti tunjukkan Rukunegara. Kalau tiap-tiap rakyat boleh patuh kepada Rukunegara kita, saya fikir kita tak payah pemimpin, semua orang boleh faham dalam Rukunegara kita apa isinya. Jadi sekarang saya fikir kebanyakan orang sudah lupa Rukunegara kita. Nampaknya di Jabatan-jabatan Kerajaan langsung tak ada "display", dengan izin, Rukunegara. Saya harap di Dewan kita pun hendaklah display Rukunegara yang semua orang boleh nampak. Jadi, semua orang bila nampak Rukunegara, apa dinyatakan di dalam Rukunegara semua orang bolehlah lebih faham dan boleh tambah muhibah dan perpaduan.

Perpaduan pada hari ini di negara kita, tuan-tuan dan puan-puan sekalian maklum, ada bertambah baik atau bertambah buruk? Saya fikir mengenai perpaduan ini, kita ada pegawai-pegawai perpaduan di tiap-tiap daerah, berapa kali satu tahun dipanggil mesyuarat perpaduan antarabangsa, melainkan ada perkara berlaku sahaja panggil mesyuarat, kita hendak perpaduan. Itu sahaja saya fikir. Itu tak patut. Patut perpaduan tiap-tiap hari diadakan, tiap-tiap bulan, tiap-tiap minggu. Jadi, tiap-tiap bangsa, tiap-tiap rakyat jelata di negara kita boleh faham negara ini bukan untuk satu bangsa, untuk tiap-tiap bangsa, tiap-tiap kaum rakyat jelata.

Tuan-tuan sekalian maklum, Titah Ucapan Duli Yang Maha Mulia tidak lupa rakyat jelata, terutama sekali orang-orang miskin, Kerajaan, Wakil Rakyat, Senator. Saya fikir sekiranya negara kita tidak ada rakyat, tidak ada Kerajaan, tidak ada Menteri-menteri, tidak ada Kabinet, tak ada Senator-senator, tak ada Ahli-ahli Dewan Rakyat. Kuasa penuh ini terpulang kepada rakyat jelata. Jadi, kalau kita pandangkan masa sekarang banyak lagi rakyat yang miskin yang duduk di rumah atap, berdinding dengan papan yang buruk-buruk, tiang bergoyang-goyang, tetapi orang yang duduk di rumah-rumah yang besar telah terlupa. Jadi, saya fikir Kerajaan pun ada ambil langkah-langkah dengan apa cara hendak mengatasi perkara ini, tetapi sampai masa sekarang kalau kita pergi Ulu Kelantan atau tempat hulu-hulu, kita boleh pandang rakyat masih miskin lagi, tak cukup makan. Jadi, kalau rakyat seperti itu kita tak simpati, tak patutlah. Jadi, bermakna perpaduan ini terpulang kepada semua golongan, terutama sekali Jabatan Perpaduan patut ambil lebih langkah, lebih tegas, patut beri penerangan yang lebih tegas kepada orang ramai kedudukan negara kita pada hari ini macam mana. Ekonomi pada hari ini

saya fikir pun sudah bertambah baik. Jadi bertambah baik kalau tak ada kerjasama oleh semua golongan, saya fikir pun hendak tambah berapa baik pun tak boleh capai.

Tuan Yang di-Pertua, berkenaan dengan dadah pada masa sekarang di negara kita sampai hari ini tak boleh hapuskan dadah ini apa sebab? Kalau kita hendak kerjasama rakyat dengan Kerajaan, dengan Polis hendak kerjasama 100% saya fikir tak ada satu benda kita tak boleh capai. Kalau betul-betul hendak kerja, saya fikir pada hari ini macam manapun dadah dalam negeri boleh dihapuskan—boleh dihapuskan. Beberapa tahun yang lalu baca saya ada terbaca di suratkhbar, dalam penjara pun ada orang hisap dadah, apa sebab? Takkan dadah boleh masuk sendiri, ada kaki boleh jalan—tak ada. (*Ketawa*) Jadi, ada agensi juga. Inilah kita patut timbang balik, ambil tindakan yang keras. Kalau pegawai-pegawai itu tidak bertanggungjawab, terus-menerus buangkan kerja, ada banyak orang yang tunggu-tunggu tidak ada kerja. Kalau kita banding ada orang kena tahan di Pulau Jerejak pun ada orang dapat lari juga, apa sebab? Ini kita mesti hendak kais dengan sehalus-halusnya, mesti hendak hukum dengan cara sepenuh-penuhnya kepada pegawai-pegawai yang tidak bertanggungjawab penuh.

Gaji kakitangan Kerajaan dibayar gaji oleh rakyat jelata. Rakyat jelata tidak kira bangsa, mereka bayar cukai kepada Kerajaan dan mereka harap Kerajaan dipilih oleh rakyat boleh bertanggungjawab 100% kepada mereka. Kalau kita bandingkan pada masa sekarang, saya sendiri nampak dengan mata saya kalau pagi-pagi kita pergi ke pejabat hendak bayar cukai pada pukul 8.00 tetap tidak boleh bayar cukai, tetapi kita tunggu sana sampai 8.30 lebih baru mulakan kerja. Apa sebab hendak susahkan rakyat

jelata yang datang dari hulu-hulu, jauh, hendak tunggu di sana? Saya sebagai Senator nampak sendiri pun tunggu begitu dan senyap sahaja, tetapi saya ada peluang, saya mesti bawa dalam Dewan yang mulia ini. Sekiranya saya tak bawa, ada dosa kepada saya.

Tuan Yang di-Pertua, kalau semua rakyat, kakitangan Kerajaan semua ada ingat, Ahli Dewan Rakyat ada ingat "saya dipilih oleh rakyat", patutlah penuh bertanggungjawab. Titah Ucapan Duli Yang Maha Mulia pun ada sebut, Ahli Dewan Rakyat dengan Ahli Dewan Negara mesti memberi contoh yang baik, mesti kerja kuat untuk kepentingan rakyat jelata, tidak kira bangsa.

Tuan Yang di-Pertua, saya fikir di dalam ini Tuanku bertitah dengan terus terang. Duli Yang Maha Mulia Tuanku di dalam Titah Ucapannya pun ada menyebut berkenaan dengan pelancongan. Pelancongan pada masa sekarang saya fikir adalah bertambah baik, tetapi saya harap Kerajaan kita yang dipilih oleh rakyat jelata, kalau orang luar negeri hendak datang ke negara kita, hendak membuka kilang-kilang dan sebagainya, saya harap Kerajaan kita boleh memberi mereka kesenangan sedikit. Jadi ramai pelancong dari luar negeri boleh masuk ke negeri kita untuk berniaga. Apabila ramai pelancong masuk ke negeri ini berniaga, kita boleh mengatasi pengangguran.

Pengangguran pada masa sekarang adalah bertambah atau ada berkurangan. Kalau satu orang muda yang lulus atau keluar dari universiti-universiti, mereka tidak ada kerja, hendak minta wang tunai daripada ibu bapa \$1-\$2 macamana fikiran mereka? Tentu mereka fikir lain, mereka ada pengalaman yang tinggi, ada pelajaran yang tinggi, tetapi tidak ada kerja. Kita selalu cakap, tetapi mereka itu ikut cakap kita atau tidak? Kalau

seorang rakyat mulut dengan hatinya sama, tiap-tiap perkara boleh diselesaikan, kalau mulut dengan hati tidak sama, hendak cari kekayaan, saya fikir minta mereka meletakkan jawatan.

Di negara kita ramai orang miskin tetapi saya tengok ada satu golongan yang mana kaya bertambah kaya lagi, apa sebabnya? Orang miskin yang betul-betul hendak minta tanah selalu kena tolak sampai 2-3 tahun baru jawab. Permohonan "awak" tidak berjaya, mengapa kalau rakyat jelata yang memohon melalui surat kepada Kerajaan tidak boleh dijawab dalam masa 1-2 minggu. Slogan kita "Bersih, Cekap dan Amanah", kalau slogan Yang Amat Perdana Menteri ini betul-betul diikuti, apa perkara pun boleh selesai.

Berkenaan dengan soal rasuah, kalau tidak ada orang memberi rasuah, orang yang memegang jawatan Kerajaan tidak menerima rasuah, mana ada rasuah? Apabila ada orang memberi rasuah, ada orang menerima rasuah sampai bilapun rasuah tidak boleh dihapuskan, jadi hati dan mulut hendaklah sama.

Saya sudah sebut banyak kali, Malaysia ini adalah negara berbilang bangsa, kita boleh duduk dalam negara Malaysia seperti adik-beradik. Ini kerja Tuhan, kita sepatutnya mengucapkan syukur dan terima kasih kepada Tuhan.

Mengenai perpaduan antara kaum juga hendaklah dijaga betul-betul, jangan sampai rakyat jelata tidak suka, tidak puas hati, masa itu kita baru cuba hendak selesai, saya fikir ini tidak patut. Awal-awal lagi kita mestilah sedia, "Sebelum hujan kita mesti sediakan payung", bukan apabila hujan sudah sampai baru hendak mencari payung—itu susah.

Saya berharap di masa akan datang Ahli-ahli Dewan Negara dan Ahli-ahli Dewan Rakyat, anggota Kabinet, rakyat jelata, Pertubuhan-pertubuhan, parti-parti semua boleh berkerjasama seperti satu keluarga yang besar untuk kepentingan negara kita, untuk kepentingan rakyat jelata kita. Apabila tiap-tiap orang berfikir macam itu negara kita boleh kuat, boleh maju dan perpaduan dan muhibah dapat dikekalkan. Jadi, saya mohon mengambil peluang ini untuk bersama-sama menyokong penuh Titah Ucapan Duli Yang Maha Mulia pada 7hb Mac, 1988.

Timbalan Yang di-Pertua: Yang Berhormat Tuan G. Rajoo.

5.16 ptg.

Tuan G Rajoo: Tuan Yang di-Pertua, saya bangun di Dewan yang mulia ini untuk menyokong Usul Merakamkan Sembah Menjunjung Kasih Kebawah Duli Yang Maha Mulia Seri Paduka Baginda Yang di-Pertuan Agong, yang berkenan merasmikan Mesyuarat Pertama Penggal Kedua, Parlimen Ketujuh baru-baru ini.

Titah Ucapan Baginda telah menyentuh segala aspek pembangunan negara dan integrasi nasional bagi mewujudkan sebuah negara yang maju, aman, stabil, makmur bersatu-padu dan bertoleransi.

Titah Ucapan Baginda mengandungi nasihat yang bernas dan harus diberi perhatian yang serius dan mendalam. Baginda telah menyentuh dan menasihati parti-parti politik, Pertubuhan-pertubuhan dan akhbar-akhbar bersikap bertanggungjawab dan sederhana dalam semua tindakan dan kenyataan mereka semoga tidak menjejaskan perpaduan negara.

Dalam aspek ini amatlah wajar bagi Kerajaan mengeluarkan Kertas Putih yang membongkarkan bagaimana ahli-ahli politik, komunis, religious extremist dan lain-lain kumpulan pressure group, ingin mencetuskan huru-hara dan mengeksploitasikan isu-isu sensitif yang bercorak "communal" dengan tujuan menjatuhkan Kerajaan yang dipilih melalui proses demokrasi.

Situasi yang diwujudkan oleh pihak-pihak yang tertentu ini menjadi amat genting dan penangkapan beberapa orang yang terlibat dalam komplot ini telah mententeramkan keadaan keamanan negara ini.

Saya mengambil kesempatan ini mengucapkan tahniah kepada pihak Polis yang bertindak begitu cepat dan tepat untuk mengawal keadaan agar peristiwa Mei 13 tidak berulang lagi.

Kertas Putih yang dibentangkan dalam Parliman baru-baru ini jelas menggambarkan beberapa sophisticated, plan yang strategik pihak-pihak yang tertentu ini untuk mencetuskan huru-hara, menghapuskan perpaduan kaum dan akhirnya menjatuhkan Kerajaan. Mengambil kesempatan ini ada pula sekumpulan ahli-ahli politik menjatuhkan imej dan memperkecilkan usaha Yang Amat Berhormat Perdana Menteri dan kepimpinan beliau di dalam dan di luar negeri, kerana kefahaman politik yang berlainan. Mereka sedia menggadaikan keamanan negara dan perpaduan rakyat bagi tujuan sempit mereka. Walaupun demikian, Yang Amat Berhormat Perdana Menteri berjaya mengawal keadaan, bertindak dengan penuh bertanggungjawab dan berjaya mengawal keselamatan dan keamanan negara. Tindakan-tindakan beliau mendapat sokongan yang begitu baik di kalangan rakyat dan ini jelas membuktikan populariti Yang Amat Berhormat Perdana Menteri di negara ini.

Sebagai rakyat yang bertanggungjawab di negara ini, kita harus memahami tugas dan tanggungjawab utama Kerajaan adalah untuk menjaga keamanan dan keselamatan negara ini. Rakyat hendaklah memainkan peranan dengan bekerjasama dengan Kerajaan bagi mewujudkan sebuah negara Malaysia yang bersatupadu dan progresif.

Tuan Yang di-Pertua, saya bangga dengan kedudukan ekonomi negara dalam tahun 1987 telah beransur pulih. Kedudukan ekonomi yang lebih mantap ini adalah didorong oleh harga komoditi yang kukuh dan prestasi eksport yang menggalakkan. Walaupun demikian, Kerajaan haruslah berwaspada terhadap sabotaj dari negara-negara yang maju, yang ingin menjatuhkan harga pasaran barangan mentah keluaran negara ini, dan menggalakkan negara-negara maju supaya jangan membeli barangan keluaran negara ini. Kononnya barangan pengeluaran negara ini adalah kurang bermutu dan membahayakan kesihatan.

Kempen sabotaj seperti ini dijalankan dengan begitu rapi dan subtle di luar negeri dan kita tidak dapat mengawal dengan sepenuhnya. Walaupun demikian, Kerajaan telah berjaya mematahkan kempen Amerika Syarikat terhadap pasaran minyak kelapa sawit dan meningkatkan lagi penjualan minyak kelapa sawit di pasaran dunia. Akan tetapi, kita belum berjaya mematahkan kempen negara-negara Eropah yang berkempen kononnya bahawa kayu-balak dari negara ini bermutu rendah dan tidak sesuai bagi continent mereka.

Saya merayu kepada Kerajaan supaya berkempen dengan lebih agresif lagi agar menentukan dan membuktikan kepada negara-negara di dunia ini bahawa barangan keluaran

negara ini tidak kurang mutunya dan adalah barang yang berstandard tinggi. Pada masa sama Kerajaan hendaklah memastikan bahawa kawalan yang ketat dikenakan untuk menentukan barangan keluaran negara ini bukanlah barangan yang substandard tetapi kualiti tinggi. Jika terdapat satu atau dua pengeksport yang menipu dengan mengeksport barangan yang tidak bermutu, tindakan yang sekeras-kerasnya hendaklah diambil. Lesen-lesen pengeluaran mereka hendaklah ditarik balik agar ianya menjadi penghalang dan pengajaran kepada pengeksport-pengeksport yang lain yang ingin menipu serta menjatuhkan nama baik Kerajaan Malaysia.

Tuan Yang di-Pertua, saya mengambil kesempatan ini untuk mengesyorkan kepada Kerajaan supaya mengatitkan lebih banyak lawatan trade missions ke luar negeri untuk mendapat pelabur-pelabur yang boleh meningkatkan ekonomi kita dan memasarkan komoditi-komoditi hasil pertanian negara kita yang belum mendapat pasaran antarabangsa yang stabil. Wakil-wakil Perdagangan (Trade Commissioners) kita haruslah lebih aktif dan berhati-hati untuk meyakinkan para pembeli komoditi-komoditi Malaysia.

Tuan Yang di-Pertua, pada masa ini mutu sukan di negara kita adalah amat rendah dan tidak stabil. Pemain-pemain kita mahupun dalam permainan yang kita anggap sebagai jaguh, tidak menunjukkan kemajuan dan tidak consistent dalam permainan mereka. Oleh yang demikian, keperluan sukan yang diberi perhatian selaras dengan Dasar Sukan Negara yang telah digubal untuk memajukan prestasi dan penyertaan sukan ini di peringkat kebangsaan dan antarabangsa adalah amat disanjung tinggi dan dialu-alukan.

Kerajaan sedang meningkatkan mutu permainan dengan memberi berbagai-bagai insentif seperti mengadakan pemilihan olahragawan dan olahragawati negara dengan memberi wang tunai sebagai hadiah. Beribu-ribu ringgit telah dibelanjakan dan dihadiahkan kepada pemain-pemain kita. Walaupun usaha Kerajaan melaburkan beribu-ribu ringgit dengan tujuan meningkatkan lagi organisasi adalah satu usaha yang disanjung tinggi, saya berharap Kerajaan juga akan mengambil langkah yang positif untuk membaiki dan mengadakan kemudahan-kemudahan sukan, mewujudkan gelanggang-gelanggang permainan ini di seluruh negara, di setiap bandar besar dan kecil agar anak-anak muda kita yang dapat menggunakan kemudahan ini boleh menunjukkan bakat sehingga ke peringkat negeri, negara dan antarabangsa. Wang yang dibelanjakan seperti ini akan menjadi suatu pelaburan yang jangka panjang dan akan memberi manfaat yang diharap-harapkan.

Tuan Yang di-Pertua, saya ingin juga menyentuh sedikit tentang bidang pendidikan yang memberi penekanan kepada konsep pendidikan bersepadu untuk menemui keperluan negara sekarang dan masa akan datang. Usaha-usaha yang dibuat untuk mempertingkatkan mutu dan memperluaskan peluang pendidikan dengan melaksanakan Kurikulum Bersepadu Sekolah Menengah mulai tahun ini adalah disanjung tinggi. Dalam aspek ini, saya ingin menyentuh tentang pelaksanaan pengajaran bahasa ibunda di sekolah-sekolah menengah di negara ini. Apabila KBSM dilaksanakan pada tahun hadapan di sekolah menengah, Kementerian Pendidikan akan menghadapi masalah kekurangan guru untuk mengajar bahasa ibunda iaitu Bahasa Tamil. Kekurangan guru ini akan menjejaskan pengajaran dan

pembelajaran bahasa ibunda di sekolah-sekolah menengah di negara ini. Untuk mengatasi masalah ini, saya berharap Kementerian Pendidikan membuat rancangan untuk mengambil lebih banyak guru Bahasa Tamil ke institusi-institusi perguruan dan memberi latihan dalam Bahasa Tamil mulai tahun ini. Lebih banyak lagi kelas option Bahasa Tamil hendaklah dibuka di institusi-institusi perguruan di seluruh negara bagi mengajar Bahasa Tamil di sekolah-sekolah menengah.

Selain daripada ini, untuk menjaminan keberkesanan pelajaran dan pembelajaran bahasa ibunda, Bahasa Tamil, seorang penyelia yang berkelayakan dalam Bahasa Tamil hendaklah dilantik di setiap Jabatan Pendidikan Negeri agar ianya dapat menyusun, mengawal dan membantu pengajaran dan pembelajaran bahasa ibunda di sekolah-sekolah menengah di negara ini. Saya juga ingin mengambil peluang ini untuk mengesyorkan kepada Kerajaan supaya mengurangkan red-tape dalam pelaksanaan pengajaran bahasa ibunda di sekolah-sekolah. Pada masa ini sebuah sekolah yang ingin mengajar bahasa ibunda terpaksa mendapat kebenaran bertulis daripada sekurang-kurangnya 15 orang ibunda dan hanya selepas itu baru kelas bahasa ibunda boleh dimulakan. Proses ini mengambil masa dan kelas hanya bermula selepas beberapa bulan. Prosedur bagi mendapat tandatangan ini diteruskan setiap tahun, walaupun ibubapa telah memberi consent pada tahun lepas. Ini adalah satu tindakan yang sia-sia sahaja. Saya bercadang tandatangan yang diambil sekali itu adalah memadai sehingga murid tamat persekolahan, melainkan ia tidak berniat belajar bahasa ibunda lagi. Saya berharap Kerajaan akan mengkaji kemungkinan menyenangkan prosedur ini agar kelas boleh bermula pada awal-awal tahun.

Tuan Yang di-Pertua, dalam aspek pendidikan juga, saya ingin menyentuh sedikit tentang perkara-perkara yang berlaku di Jabatan Pendidikan Negeri Perak dalam gerakan naik pangkat baru-baru ini. Seorang guru yang tidak berkelayakan perguruan Bahasa Tamil telah dilantik menjadi Penyelia Sekolah Tamil Negeri Perak dalam bulan ini. Beliau tidak pernah mengajar dalam sekolah Tamil dan bagaimanakah boleh beliau menyelia sekolah Tamil Negeri Perak walhal beliau langsung tidak mengajar Bahasa Tamil. Pada tahun 1978 orang ini juga telah dinaikkan pangkat menjadi Guru Besar sebuah sekolah Tamil di negeri Perak, tetapi perlantikan beliau menjadi Guru Besar di sekolah Tamil dibatalkan oleh Yang Berhormat Menteri Pelajaran pada masa itu atas sebab beliau tidak mempunyai kelayakan perguruan Bahasa Tamil dan tidak mengajar di sekolah Tamil. Jika pada tahun 1978 beliau tidak sesuai jadi Guru Besar, bagaimanakah sekarang beliau sesuai dan layak menjadi Penyelia Sekolah Tamil? Oleh yang demikian, saya berharap Kementerian Pendidikan akan mengambil langkah yang segera untuk membatalkan perlantikan beliau dan melantikan seorang guru sekolah Tamil menjadi Penyelia Sekolah Tamil agar memberi motivasi dan peluang kenaikan pangkat kepada guru-guru sekolah Tamil Negeri Perak yang amat berkurangan itu.

Di lain-lain Jabatan Pendidikan Negeri, hanya guru-guru Tamil diberi peluang menjadi penyelia Sekolah Tamil apabila kekosongan berlaku baru-baru ini. Saya berharap Jabatan Pendidikan Negeri Perak pun akan diarah melantik seorang guru sekolah Tamil menjadi Penyelia Sekolah Tamil Negeri Perak.

Saya juga ingin membawa ke perhatian Dewan yang mulia ini satu lagi perkara yang dilakukan oleh

Jabatan Pendidikan negeri Perak berkaitan dengan kenaikan pangkat ke sekolah-sekolah negeri Perak itu. Beberapa orang guru-guru sekolah Inggeris yang tidak mempunyai kelayakan perguruan dalam bahasa Tamil dilantik menjadi Guru Besar dan Penolong Kanan di SRJK (T) negeri Perak. Saya tidak faham kenapa perkara begini boleh berlaku walhal Menteri-menteri Pelajaran yang lampau telah memberi jaminan bahawa perkara begini tidak akan berulang semenjak tahun 1978. Saya percaya pegawai-pegawai di Jabatan Pendidikan negeri sengaja tidak mahu mematuhi arahan Menteri-menteri Pelajaran yang lampau.

Saya berharap Kementerian akan mengambil tindakan segera menukarkan Guru-guru Besar dan Penolong Kanan yang terlibat ini ke sekolah-sekolah lain sebelum perkara ini dijadikan isu perkauman oleh pihak-pihak yang tidak bertanggungjawab. Kita tidak mahu melihat isu ini dieksploitasi bagi kepentingan sempit ahli-ahli politik yang tertentu.

Tuan Yang di-Pertua, Kerajaan terus memberi tumpuan kepada usaha menambah kemudahan-kemudahan asas seperti bekalan air paip, elektrik, jalan raya serta telefon ke arah mempertingkatkan lagi taraf hidup rakyat negara kita. Saya ingin membawa ke perhatian Dewan yang mulia ini nasib golongan rakyat yang tidak menikmati kemudahan-kemudahan ini dengan sepenuhnya.

Semenjak di penubuhan sektor perladangan di negara ini Kerajaan telah menganggap sebagai, dengan izin, private property, dan tidak mencampurtangan dalam pentadbiran ladang-ladang atau kebajikan pekerja. Pihak ladang juga menganggap ladang itu sebagai private property mereka. Masing-masing mengambil tahu hal-hal masing-masing sahaja. Pihak

ladang memperoleh untung berjuta-juta ringgit tetapi mereka tidak membuat sebarang usaha yang konkrit untuk memperbaiki kemudahan asas bagi pekerja-pekerja mereka di ladang seperti bekalan air paip, elektrik, jalan raya, kemudahan kesihatan dan sanitation.

Oleh yang demikian taraf kehidupan pekerja-pekerja ladang adalah sangat, dengan izin, backward. Sebaliknya Kerajaan juga memperoleh hasil berjuta-juta ringgit daripada cukai eksport hasil perladangan ini. Saya mengambil kesempatan ini untuk mencadangkan beberapa langkah bagi mempertingkatkan lagi kehidupan penduduk-penduduk di ladang.

Kerajaan hendaklah membuat peraturan untuk mengiktiraf penduduk ladang sebagai kumpulan kemiskinan, dengan izin, poverty group, dan memaksa pihak ladang-ladang mereservekan atau memperuntukkan sebahagian tanah ladang itu bagi tujuan menubuhkan kampung baru atau kampung baru ladang. Dengan pengiktirafan kampung baru ini Kerajaan juga boleh membawa beberapa perubahan dalam kemudahan infrastruktur di ladang-ladang tersebut. Bagi ladang juga hendaklah dipaksa memberi kemudahan-kemudahan asas yang perlu. Dengan cara ini penduduk-penduduk itu akan dapat menikmati kehidupan yang lebih sempurna dan selesa.

Tuan Yang di-Pertua, akhir sekali saya ingin menyentuh sedikit tentang kempen Setia Bersama Rakyat atau SEMARAK yang dilancarkan secara besar-besaran baru-baru ini. Tujuan dan objektif kempen SEMARAK ini adalah mewujudkan kerjasama dan solidarity di antara rakyat demi kepentingan negara. SEMARAK juga bertujuan mewujudkan kerjasama dua hala di antara pemimpin dan rakyat.

Untuk mewujudkan kerjasama demi begini beberapa kempen sedang diatur di beberapa negeri seluruh Malaysia. Kebanyakan kempen yang diatur ini adalah di kampung-kampung yang kebanyakan penduduknya terdiri daripada kaum bumiputera sahaja.

Saya berharap pihak-pihak yang menganjurkan kempen SEMARAK ini mengambil inisiatif untuk melancarkan kempen SEMARAK begini di kampung-kampung baru dan di ladang-ladang di mana penduduknya majoriti kampung Cina atau kaum India. Dengan adanya kempen begini rakyat dari semua lapisan dapat mencebur diri dalam kempen begini untuk menghapuskan masalah polarisasi kaum dan mewujudkan sebuah negara yang bersatu-padu, aman dan maju.

Dengan harapan yang murni ini sekali lagi saya menyokong Usul merakamkan sembah menjunjung kasih Kebawah Duli Yang Maha Mulia Seri Paduka Baginda Yang di-Pertuan Agong. Sekian, terima kasih.

Timbalan Yang di-Pertua: Sekarang kita memberi peluang kepada Ahli Yang Berhormat kaum wanita. Dipersilakan Yang Berhormat Puan Law Jack Yoon.

5.35 ptg.

Puan Law Jack Yoon: Tuan Yang di-Pertua, terima kasih saya ucapkan kerana diberi peluang untuk mengambil bahagian dalam perbahasan Titah Ucapan Kebawah Duli Yang Maha Mulia Seri Paduka Baginda Yang di-Pertuan Agong pada 7hb Mac yang lalu yang merangkumi semua aspek hidup dalam masyarakat dan negara yang tercinta ini.

Tuan Yang di-Pertua, dalam Titah Ucapan Kebawah Duli Yang Maha Mulia Seri Paduka Baginda Yang di-Pertuan Agong, kita telah tahu

bahawa perpaduan merupakan asas bagi kekuatan negara yang mempunyai penduduk berbilang kaum dan agama. Sekiranya perpaduan tidak wujud, maka keamanan, kestabilan dan kemakmuran yang telah kita bina selama ini akan musnah.

Tuan Yang di-Pertua, sehubungan dengan itu, saya juga ingin menyentuh tentang peri pentingnya muhibah di negara kita. Malaysia adalah sebuah negara muda yang sedang membangun dari semua segi, ekonomi, politik dan sosial di bawah pimpinan pemimpin-pemimpin yang berdedikasi dan berkalibar. Negara kita bertambah makmur dan maju dari satu masa ke satu masa. Rakyat dapat menikmati kebahagiaan hidup akan tetapi beberapa peristiwa yang berlaku baru-baru ini telah menunjukkan keselamatan negara terancam. Adalah menjadi tanggungjawab setiap warganegara untuk mengekalkan keadaan aman damai yang terdapat di negara tercinta ini. Pemimpin yang bijaksana tidak mencukupi bagi menjamin kemakmuran yang berkekalan jika rakyat sekalian tidak bersatu-padu tetapi sering menimbulkan syak wasangka di antara satu sama lain.

Justeru itu muhibah dan perpaduan kaum sangat penting bagi negara Malaysia yang mempunyai rakyat berbilang kaum, berbilang bahasa, kebudayaan dan agama.

Tuan Yang di-Pertua, oleh itu muhibah sangat besar ertinya kepada penduduk-penduduk negara ini. Perkataan muhibah membawa erti terbaik-baik antara satu sama lain, penuh dengan perasaan harmoni dan toleransi, tolong menolong dan hidup dalam semangat perpaduan yang luhur.

Sejak peristiwa yang menyedihkan pada bulan Mei, 1969 kita semua sadar

akan peri mustahaknya muhibah dan perpaduan di kalangan rakyat. Kita juga sadar dalam keadaan kemelesetan ekonomi ini negara kita tidak mampu menghadapi masalah-masalah seumpama ini lagi. Jadi, tanpa muhibah dan perpaduan, pembelaan negara akan kehilangan asas yang kukuh. Tetapi adalah tidak memadai setakat menyebut perkataan muhibah sahaja, sebagai rakyat yang benar-benar jujur dan taat setia kepada negara, segala tindak-tanduk kita seharusnya secukup dengan semangat dan cita-cita yang terkandung dalam perkataan ini. Dalam segi masyarakat berbilang bangsa, semangat dan cita-cita muhibah mesti diamalkan dalam erti kata yang sebenarnya. Ini bermakna rakyat sekalian harus tolong menolong antara satu sama lain dalam semua aspek, sentiasa berbaik-baik antara satu sama lain dan saling memahami kebudayaan masing-masing. Perasaan muhibah dapat dijalinkan andai kata rakyat sentiasa bergaul rapat tanpa sebarang prasangka.

Tuan Yang di-Pertua, bagi melahirkan muhibah dan perpaduan kaum, saya berpendapat langkah-langkah berikut boleh diambil. Langkah melancarkan gerakan "Cintailah Bahasa Kita" adalah wajar dan kena pada tempatnya. Ini adalah kerana Bahasa Malaysia yang merupakan jambatan perhubungan rakyat berbilang bangsa dapat melenyapkan perselisihan faham dan prasangka di kalangan rakyat.

Penubuhan Jabatan Perpaduan Negara adalah satu langkah yang bijak dengan cita-cita yang murni. Akan tetapi Jabatan tersebut haruslah lebih giat dan cergas dalam menjalankan tugasnya. Melalui minggu muhibah khas, perpaduan dan lain-lain kegiatan anjuran Jabatan tersebut rakyat akan sadar tentang kepentingan muhibah dan perpaduan kaum. "Bersatu Teguh, Bercerai Roboh" wajib

dijadikan semboyan dalam amalan pada setiap masa oleh setiap rakyat.

Belia dari latar belakang yang berlainan patut digalakkan untuk menceburkan diri dalam persatuan-persatuan atau kelab-kelab yang bukan bercorak perkauman. Itu memberi peluang keemasan kepada mereka supaya bergaul mesra antara satu sama lain, bertukar buah fikiran, berbincang dan saling memahami.

Permainan yang bercorak sekaum patut ditukar corak dan dijadikan permainan berbagai kaum. Misalnya, kaum bumiputera harus digalakkan bermain bola pingpong, bola keranjang, taichi dan kungfu. Sementara kaum bukan bumiputera pula harus digalakkan bermain sepak takraw dan silat.

Dengan itu generasi muda berbagai kaum akan senang bergaul dan bermuhibah dan berbaik di antara satu sama lain. Masalah kebudayaan adalah ruyung yang sukar dipecahkan kerana masing-masing kebudayaan adalah berbeza dan kadang-kadang pula bercanggah.

Bagi mengatasi masalah demikian, adalah baik jika tiap-tiap kaum cuba memahami unsur-unsur kebudayaan kaum lain sama ada dengan mempelajari unsur-unsur itu dengan bergaul rapat serta memahami unsur yang sedemikian secara langsung dan secara lebih dekat.

Inilah satu-satunya jalan yang boleh menunjukkan muhibah. Saya berharap kita mesti kikiskan amalan yang cuba mengagung-agungkan kebudayaan kaum masing-masing dan mengeneipkan kebudayaan kaum-kaum lain.

Selain daripada itu, setiap rakyat harus menghormati serta memahami segala lambang kebesaran dan kemegahan negara yang berdaulat

seperti Bendera, Lagu Kebangsaan, Raja-raja, Perlembagaan dan Rukunegara. Bila semua penghormatan dan pemahaman ditumpukan ke arah ini, semua rakyat akan mempunyai semangat, cita-cita dan rasa taat setia yang bersama. Dengan itu akan lahir muhibah dan perpaduan.

Tuan Yang di-Pertua, berbanding dengan lain-lain negara di rantau ini, negara kita mempunyai beberapa keistimewaan yang boleh dijadikan kemegahan dan kebanggaan setiap rakyat Malaysia. Antaranya ialah kekayaan alam semula jadi dan kestabilan politik. Kesemua ini menjadikan negara kita aman dan makmur. Sepatutnyalah kita sebagai rakyat yang taat setia harus berusaha dan berikhtiar sedaya upaya bagi mengabadikan apa yang kita miliki serta mempertingkatkan dan mencapai aspirasi negara kita.

Tuan Yang di-Pertua, suka saya sertai dengan serangkap bahasa irama seperti berikut:

Melayu, Cina dan India, wahai semua rakyat Malaysia,

Muhibah dan taat setia, membina negara, makmur bahagia.

Tuan Yang di-Pertua, dalam tempoh Duli Yang Maha Mulia Seri Paduka Baginda Yang di-Pertuan Agong yang kita sayangi dan kasihi memerintah negara kita, negara kita telah bertambah maju, aman dan makmur. Baginda merupakan Yang di-Pertuan Agong yang adil dan telah memerintah negara kita atas dasar dan corak sebuah masyarakat yang berbilang kaum dan agama.

Dalam Titah Ucapan Baginda, Baginda telah menitikberatkan nilai-nilai mulia seperti kejujuran, dedikasi, bertanggungjawab, bertimbang rasa dan amanah.

Kita sebagai pemimpin dan rakyat Malaysia juga berpegang teguh kepada nilai-nilai seperti yang dilafazkan oleh Baginda. Walau bagaimanapun, sebagai seorang wanita, saya juga ingin mengambil kesempatan ini untuk menyatakan pentingnya peranan kaum wanita yang menjadi separuh daripada keseluruhan penduduk negara membantu dan menyumbangkan tenaga ke arah pencapaian perpaduan nasional dan keamanan, kestabilan dan kemakmuran negara yang kita cintai.

Tuan Yang di-Pertua, pada zaman modern ini, kaum wanita tidak lagi menjadi seorang suri rumahtangga sahaja di samping memelihara kebahagiaan rumahtangga serta menjadi seorang ahli pendidik asas untuk mencorakkan generasi negara masa depan.

Kaum wanita telah menunjukkan kebolehan dan kebijaksanaannya, mereka berganding bahu dan bekerjasama dengan kaum lelaki menyumbangkan tenaga untuk kesejahteraan, perpaduan, kemakmuran dan kemajuan masyarakat, bangsa dan negara.

Selain daripada menjadi guru, jururawat dan kerani, kaum wanita telah secara cergasnya memasuki bidang-bidang yang biasa dianggap sebagai bidang khas untuk lelaki seperti menjadi doktor, peguam dan jurutera. Mereka juga menceburkan diri dengan aktifnya dalam bidang politik seperti menjadi Ahli Parlimen, Senator, Timbalan Menteri dan Menteri. Dalam bidang pengurusan dan perniagaan tidak kurang juga bilangan wanita yang menjadi eksekutif dan pengurus syarikat. Wanita telah menerima cabaran zaman dan membuktikan bahawa kebolehan dan kecekapan mereka tidak sekalipun kurang daripada kaum lelaki. Aktiviti-aktiviti ini menimbulkan lagi satu beban dan

tanggungjawab baru kepada kaum wanita memupuk perpaduan.

Tuan Yang di-Pertua, tangan yang menghayun buayan itu boleh menggoncangkan dunia. Sebagai seorang wakil kaum wanita, saya merasa amat bangga dan berani menyatakan bahawa semua anggota masyarakat adalah terlebih dahulu diasuh secara rohani dan jasmani oleh kaum wanita iaitu ibu mereka masing-masing. Oleh itu, peranan yang dimainkan oleh kaum wanita dalam mewujudkan perpaduan adalah sama pentingnya dengan kaum lelaki, tetapi peranan yang penting tidak bermakna kaum wanita dititikberatkan atau dipandang tinggi oleh masyarakat.

Ramai wanita menjadi mangsa rogol dan gadis-gadis hilang. Bukan sahaja kes-kes merogol meningkat setiap tahun, bahkan jumlah mangsa rogol yang kena bunuh turut bertambah. Apatah lagi ramai di antara mangsa-mangsa oleh kerana malu atau tekanan sosial tidak melaporkan kejadiannya kepada pihak Polis.

Tuan Yang di-Pertua, selain daripada itu beberapa undang-undang negara juga memberi layanan yang tidak adil atau kurang lengkap perlindungannya terhadap kaum wanita. Undang-undang ini yang difikirkan perlu diberi perhatian serta tindakan segera diambil. Di sini saya ingin membawa kepada perhatian Tuan Yang di-Pertua dan Ahli-ahli Yang Berhormat tentang ketidaksamaan hak yang ditonjolkan dalam Akta Pembahagian Harta 1958. Akta ini menetapkan supaya:

- (a) sekiranya seorang perempuan meninggal dunia tanpa wasiat tetapi mempunyai seorang suami, maka keseluruhan hartanya diwarisi oleh suami; dan
- (b) manakala sekiranya seorang lelaki meninggal dunia tanpa

wasiat, tetapi mempunyai seorang isteri dan anak, maka isterinya berhak mewarisi 1/3 daripada harta suaminya dan jikalau beliau mempunyai seorang isteri dan tidak mempunyai anak, maka isterinya akan mewarisi setengah daripada hartanya.

Tuan Yang di-Pertua, bukankah ini merupakan satu diskriminasi kepada kaum wanita? Saya berpendapat besar kemungkinannya undang-undang seperti ini dibuat oleh kaum lelaki atau mereka yang tidak sayang kepada isteri mereka. (*Tepuk*)

Tuan Yang di-Pertua, Akta Jagaan Anak-anak 1961. Akta ini setakat hari ini hanya memberi kuasa penjagaan kepada si bapa dan si ibu tidak mempunyai apa-apa kuasa di sisi undang-undang untuk menentukan hak anaknya. Ini jelas menunjukkan diskriminasi terhadap kaum wanita kerana seseorang anak adalah hakmilik atau cahaya mata kepada kedua-dua bapa dan ibu. Oleh itu pihak ibu juga harus diberi hak jagaan anak di sisi undang-undang bagi membolehkannya membuat keputusan bagi si anak, misalnya untuk menandatangani dokumen-dokumen undang-undang seperti mengambil pasport. Dengan pindaan ini, kedua-dua ibu dan bapa bolehlah mempunyai kuasa yang sama bagi menentukan hak-hak anak mereka terutama bagi kes-kes di mana bapa si anak tidak dapat dikesan.

Dalam perkara ini, saya berharap Kerajaan dapat mengambil perhatian yang segera ke atasnya supaya kaum lelaki dan perempuan di negara ini bersama-sama dapat menikmati kesamaan hak, peluang tanpa sebarang diskriminasi jantina.

Tuan Yang di-Pertua, dengan ini saya menyokong sepenuhnya Titah Ucapan Kebawah Duli Yang

Maha Mulia Seri Paduka Baginda Yang di-Pertuan Agong dalam ucapan yang diadakan pada 7hb Mac yang lalu dengan harapan supaya apa yang disarankan oleh Kebawah Duli Yang Maha Mulia Seri Paduka Baginda Yang di-Pertuan Agong ini menjadi satu pegangan dan perjalanan bagi Kerajaan Malaysia kita. Sekian, terima kasih.

Timbalan Yang di-Pertua: Yang Berhormat Senator Tiong Hiew King:

5.53 ptg.

Tuan Tiong Hiew King: Tuan Yang di-Pertua, saya bangun menyokong usul mengucapkan berbanyak-banyak syukur dan menjunjung kasih Kebawah Duli Yang Maha Mulia Seri Paduka Baginda Yang di-Pertuan Agong kerana Titah Ucapan Kebawah Duli pada masa membuka Mesyuarat Pertama, Penggal Kedua, Parlimen Ketujuh pada 7hb Mac, 1988 yang lalu.

Tuan Yang di-Pertua, dalam Titah Ucapan Kebawah Duli Yang Maha Mulia Seri Paduka Baginda Yang di-Pertuan Agong yang ringkas dan padat itu, kita sekali lagi diperingatkan akan tanggungjawab bersama kita untuk terus berusaha ke arah membina, memelihara, mempertahankan dan mengekalkan sebuah negara yang teguh, berharmoni, stabil, maju dan makmur.

Tuan Yang di-Pertua, amat tepatlah Titah Ucapan Kebawah Duli Yang Maha Mulia Seri Paduka Baginda Yang di-Pertuan Agong bahawa ekonomi sesebuah negara tidak akan berkembang jika kestabilan politik tergugat dan mengancam kegiatan harian rakyat. Ketika keadaan ekonomi negara beransur pulih dan Kerajaan kita juga sudah mengambil berbagai langkah untuk memperbaiki iklim pelaburan demi menggalakkan pertumbuhan ekonomi negara yang

lebih cepat, maka bagi semua pihak, iaitu pemimpin-pemimpin politik, pemimpin-pemimpin masyarakat hingga rakyat jelata menjamin dan mempertahankan kestabilan politik adalah suatu tugas, suatu kewajiban, suatu tanggungjawab yang harus dilakukan dan dipenuhi. Sekiranya kestabilan politik negara tergugat, pengusaha-pengusaha dalam negeri mahupun pelabur-pelabur asing tentulah akan ragu dan bimbang akan pelaburan semula atau pelaburan baru di negara kita, bahkan pelabur-pelabur asing akan bertukar haluannya dan pergi melabur di negara-negara membangun lainnya di Asia Tenggara. Jikalau berlaku demikian halnya, segala usaha Kerajaan kita akan menjadi sia-sia belaka.

Perkembangan ekonomi negara akan terjejas, lembab dan lambat, dengan izin, slow down. Akibatnya siapa rugi? Rakyat kita sendiri yang akan menderita.

Tuan Yang di-Pertua, Kebawah Duli Yang Maha Mulia Seri Paduka Baginda Yang di-Pertuan Agong dalam Titah Ucapan Kebawah Duli telah memperingatkan semua rakyat yang cintakan keamanan tentulah termasuk juga pemimpin-pemimpin politik serta sesiapa jua yang berpengaruh di kalangan berbagai komuniti supaya memastikan tidak ada sebarang tindakan dilakukan sama ada secara berkumpulan atau individu yang boleh mengancam kestabilan politik yang berterusan dalam negara.

Tuan Yang di-Pertua, saya telah pun beberapa kali di dalam Dewan yang mulia ini menyatakan rasa kesal melihat tindakan-tindakan setengah pemimpin politik atau masyarakat yang tidak bertanggungjawab itu. Mereka ini sengaja mengambil kesempatan menangkuk di air keruh dengan membangkitkan isu-isu sensitif. Dengan kata lain, mereka

berbuat demikian semata-mata untuk memburu undi-undi atau mendapat sokongan tanpa mengira atau menghiraukan kesan dan akibat daripada perbuatan mereka ini.

Pada hakikatnya perbuatan mereka sedemikian telah menjejaskan perpaduan negara, menggugat serta mengancam kestabilan politik negara kita. Jadi umat wajarlah bagi Kebawah Duli bertitah memperingatkan kita semua supaya bersikap bertanggungjawab dan sederhana dalam semua tindakan dan kenyataan kita. Maka kita semua tidak kira keturunan kita, apa pangkatnya, tinggi atau rendah tidak kira miskin atau kaya harus memahami erti Titah Ucapan Kebawah Duli dan sentiasa menjalankan tanggungjawab kita bersama untuk memupuk semangat perpaduan di kalangan rakyat untuk memastikan terjaminnya dan mempertahankan kestabilan politik negara yang menjadi syarat mutlak bagi pembangunan dan kemajuan negara kita.

Tuan Yang di-Pertua, syukurlah bahawa Kerajaan Barisan Nasional kita di bawah pimpinan Yang Amat Berhormat Dato' Seri Dr Mahathir Mohamad pada saat genting ini, dengan izin, at this critical moment, telah pun mengambil tindakan tegas untuk mencegah keadaan yang tidak diingini itu dari bertambah buruk lagi atau dari merebak. Itu adalah perlu dan sesuai kerana sepertimana yang telah saya sebutkan tadi kestabilan politik dan perpaduan negara adalah asas kepada pembangunan, kemajuan dan kemakmuran negara kita.

Tuan Yang di-Pertua, Titah Ucapan Kebawah Duli pun menyentuh tentang perlunya sumbangan sektor swasta bagi memulihkan pertumbuhan ekonomi negara serta mempertingkatkan prestasi dan produktiviti. Tidak dapat dinafikan iaitu sektor swasta adalah pelopor bagi

perkembangan dan pertumbuhan ekonomi dia dalam masyarakat *laisse faire*, dengan izin. Setakat manakah sektor swasta mengambil bahagian dalam atau digalakkan menyertai usaha memulihkan pertumbuhan ekonomi negara akan menentukan sejauh manakah prestasinya boleh dicapai. Kita pun harus meyakini keikhlasan niat Kerajaan kita dalam usahanya meningkatkan kemakmuran ekonomi dan memelihara kesejahteraan rakyat kita. Kerajaan kita boleh melihat dari langkah-langkah yang telah diambil oleh Kerajaan iaitu mengubahsuaikan dasar pelaburan.

Dengan melonggar syarat pelaburan, menghapuskan cukai keuntungan berlebihan syarikat serta langkah lain yang berkaitan dengan ekonomi, maka sektor swasta kita seharusnya berhasrat untuk membuat kemajuan menyertai atau menceburi ke dalam kegiatan-kegiatan secara lebih positif dan giat di bidang-bidang pembangunan ekonomi.

Namun demikian, kita mesti berharap bahawa Kerajaan akan terus dan sentiasa mengkaji semula perstasi yang kita capai dari masa ke semasa menggubal dasar-dasar atau langkah-langkah yang tidak sesuai dan boleh menghalang pertumbuhan ekonomi kita supaya pertumbuhan dan pemulihan ekonomi dapat diperbesarkan.

Tuan Yang di-Pertua, sehubungan dengan ini saya juga ingin menyentuh tentang soal perdagangan dua hala Malaysia dan China. Sukacitalah kita mendapat tahu bahawa Kerajaan akan menandatangani persetujuan perdagangan dua hala dengan negeri China. Perkara ini telah ditangguhkan buat sekian lama. Walaupun demikian ianya masih tidak terlambat. Dengan penandatanganan persetujuan ini antara kedua-dua buah Kerajaan semoga perdagangan dua hala boleh

dipertingkatkan bagi faedah dan kesejahteraan rakyat kedua-dua pihak di masa hadapan.

Untuk menggalakkan dan mempertingkatkan perdagangan dua hala itu saya berpendapat dan ingin mencadangkan di Dewan yang mulia ini bahawa Kerajaan boleh menimbang semula dan melonggarkan syarat supaya rakyat kedua-dua negeri terutamanya peniaga-peniaga dan pengusaha-pengusaha dapat melawat serta berbalas-balasan perhubungan serta menjalankan kegiatan perdagangan secara bebas. Dengan itu saya hendak mencadangkan sebagai langkah pertama, sesiapa atau manamana syarikat yang ada atau akan mengadakan perhubungan perdagangan di antara satu dengan lain di kedua-dua negara boleh mendaftarkan diri dengan Kementerian Perdagangan dan Perindustrian atau Kementerian berkenaan dan diberi kebebasan keluar masuk kedua-dua negara. Langkah ini juga secukupnya dengan dasar luar negeri kita yang mengutamakan perhubungan dengan negara-negara Asia dalam hubungan kerjasama. Semoga cadangan saya ini dapat diberi pertimbangan yang sewajarnya.

Tuan Yang di-Pertua, saya ingin menyentuh sedikit sebanyak mengenai Bahasa Malaysia. Kita boleh berkata bahawa rakyat berbilang kaum kita semua cintai Bahasa Kebangsaan kita. Semua pemuda-pemuda khususnya murid-murid dari berbagai kaum berusaha mempelajari, menguasai Bahasa Kebangsaan dengan bersungguh-sungguh kecuali orang-orang tua tertentu yang mungkin berasa agak susah untuk menguasainya. Dengan usaha bersama Kerajaan dan rakyat generasi muda kita akan boleh memahami dan menguasai Bahasa Kebangsaan baik membaca, menulis atau bertutur dengan fasih. Dan kerap kali menyeru

warganegara keturunan Tionghua berusaha bersungguh-sungguh mempelajari dan menguasainya kerana Bahasa Kebangsaan adalah satu lambang negara kita, satu ciri dan identiti tersendiri negara dan bangsa kita. Maka sambutan dari masyarakat Tionghua sangat menggalakkan.

Tuan Yang di-Pertua, saya dapat tahu ada setengah-setengah Ahli Yang Berhormat yang mencadangkan bahawa Bahasa Malaysia digunakan di mana-mana mahkamah dalam perbicaraan. Pada hemat saya Bahasa Malaysia sebagai Bahasa Kebangsaan dan bahasa rasmi harus digunakan di dalam segala urusan pemerintahan atau pentadbiran Kerajaan termasuk urusan-urusan perbicaraan dalam mana-mana mahkamah.

Kita semua termasuk pegawai-pegawai Kerajaan, Peguamcara dan Peguambela serta rakyat jelata harus berusaha menggunakan bahasa kebangsaan dalam penulisan, surat menyurat dan pertuturan. Tetapi ada satu masalah kita harus menyelidiki terlebih dahulu iaitu setakat ini apakah peguam-peguam kita sudah dapat menguasai Bahasa Kebangsaan dan bertutur dengan fasih? Apakah sudah boleh menyampaikan dan mempersembahkan hujah-hujah mereka dalam perbicaraan di mahkamah?

Tuan Yang di-Pertua, sehubungan ini saya terasa lebih cenderung untuk mempersetujui dengan pendapat Yang Berbahagia Dato Peter Monny, Naib Presiden Majlis Perkhidmatan Peguam atau dengan izin, The Bar Council. Menurut beliau penggunaan Bahasa Malaysia di dalam mahkamah tidak dapat dilaksanakan over-night, dengan izin. Sebabnya ialah:

- (1) kebanyakan Peguambela adalah terlatih dan terdidik di dalam pelajaran undang-undang melalui perantaraan bahasa

Inggeris. Mereka itu walaupun telah berusaha menguasai penggunaan Bahasa Malaysia tetapi setakat ini masih belum mahir atau cekap dalam bahasa itu.

- (2) kebanyakan laporan undang-undang ditulis atau dibuat dalam bahasa Inggeris selama ini. Dan dengan itu akan memerlukan masa untuk diterjemahkan ke Bahasa Malaysia.

Lagi pun istilah-istilah undang-undang yang sudah ada atau sudah kita ciptakan dalam Bahasa Malaysia belum lagi mencukupi atau memadai untuk menerangkan sesuatu dengan tepatnya. Kebanyakan undang-undang kita masih belum ada persamaannya dalam Bahasa Malaysia. Dengan kesulitan tersebut jika mereka terpaksa mempersembahkan hujah-hujah mereka dalam bahasa yang mereka belum mempunyai pengetahuan yang cukup itu maka tentulah mereka tidak dapat memainkan peranannya dengan baik dalam perbicaraan. Oleh yang demikian, saya berpendapat kurang adil dan kurang tepatlah tuduhan seseorang Ahli Yang Berhormat bahawa Bar Council, dengan izin, tidak berusaha bersungguh-sungguh membuat atau menjadikan Bahasa Malaysia sebagai bahasa penghantar dalam mahkamah.

Tuan Yang di-Pertua, demi untuk menyelesaikan masalah tersebut, saya berharap Kerajaan khususnya Jabatan Kehakiman mengadakan perundingan dan perbincangan dengan Majlis Peguam itu untuk mencari jalan atau ikhtiar terutamanya.

Tuan Yang di-Pertua, akhirnya saya hendak menyentuh sedikit sebanyak tentang soal pendidikan terutama pendidikan universiti di bidang perubatan. Kita tahu di Sarawak masih berkurangan doktor-doktor. Untuk mengatasi kekurangan itu, saya

memohon kepada Kerajaan supaya menambahkan jumlah pengambilan penuntut yang layak dari negeri Sarawak setiap tahun ke universiti-universiti tempatan di Semenanjung untuk mengikuti kursus perubatan.

Tuan Yang di-Pertua, sekali lagi saya merakamkan sembah menjunjung kasih kepada Titah Ucapan Kebawah Duli. Sekian, terima kasih.

Timbalan Yang di-Pertua: Yang Berhormat Puan Valli Muthusamy.

6.13 ptg.

Puan Valli Muthusamy: Tuan Yang di-Pertua dan Ahli-ahli Yang Berhormat, saya ingin mengambil bahagian dalam perbincangan atas Titah Duli Yang Maha Mulia Seri Paduka Baginda Yang di-Pertuan Agong dan dengan ikhlas hati ingin mengucapkan tahniah dan terima kasih kepada Duli Yang Maha Mulia Seri Paduka Baginda atas Titah Baginda yang dinamis dan sangat progresif.

Duli Yang Maha Mulia Seri Paduka Baginda telah menyentuh atas banyak topik dan hal negara dan telah memberi nasihat dan tunjuk ajar yang sangat berharga. Penerimaan nasihat dan tunjuk ajar Duli Yang Maha Mulia Seri Paduka Baginda akan menjadikan negara ini sebuah negara yang kuat dan kukuh. Masyarakat negara harus bersyukur untuk Titah Duli Yang Maha Mulia Seri Paduka Baginda itu.

Di dalam Titah Duli Yang Maha Mulia Seri Paduka Baginda, Baginda telah menyatakan bahawa perpaduan adalah asas untuk mewujudkan sebuah negara yang teguh. Saya dengan segala hormatnya setuju dengan nasihat Duli Yang Maha Mulia Seri Paduka Baginda itu. Di tahap ini saya meminta Kerajaan supaya memupuk perpaduan dan kerjasama antara kaum dengan mengambil

tindakan yang tegas ke arah ini. Kecurigaan dan kebimbangan tidak harus timbul dalam mana-mana perkara mahupun dari segi pekerjaan, pendidikan, pembangunan, kebudayaan atau aktiviti-aktiviti agama.

Tindakan harus diambil untuk menghormati hak-hak bahasa dan adat kebangsaan bagi semua kaum. Kemajuan dan kemakmuran negara ini bergantung kepada perpaduan di kalangan bangsa dan saya meminta agar Kerajaan mengambil tindakan yang tegas terhadap sesiapa yang cuba merosakkan kebudayaan, keamanan dan keseimbangan negara kita.

Tuan Yang di-Pertua dan Ahli-ahli Yang Berhormat, mengenai pendidikan, Duli Yang Maha Mulia Seri Paduka Baginda telah meminta agar mutu ditingkatkan dan meluaskan kesempatan pendidikan. Di tahap ini saya ingin menarik perhatian semua Ahli-ahli Yang Berhormat bahawa lebih kurang 60,000 pelajar-pelajar kita menuntut di luar negeri. Kerajaan harus menimbang semula dan mengkaji mengapa sebilangan besar pelajar-pelajar kita pergi ke luar negeri. Pada pendapat saya kesempatan tidak diberi kepada pelajar-pelajar ini untuk meneruskan kursus ijazah pertama dan pendidikan menengah di luar negeri. Negara kita mengalami kerugian lebih dari \$1 billion dalam bentuk penukaran wang luar negeri secara langsung dan tidak langsung. Hanya siswazah yang telah memperolehi ijazah tinggi dan yang ingin meneruskan pelajaran harus dibenarkan pergi ke luar negeri. Kerajaan harus mendirikan lebih banyak universiti-universiti tempatan untuk membalikkan tabiat ini dan menjimatkan pertukaran wang asing yang berharga. Ini juga akan menghasilkan lebih kesempatan pekerjaan kepada masyarakat kita.

Bahasa Malaysia adalah Bahasa Jiwa Bangsa, maka semua bilangan masyarakat harus berjuang untuk meningkatkan kefasihan dan pembangunan. Di sini saya ingin menunjukkan bahawa pengajaran Bahasa Malaysia di Sekolah-sekolah Tamil adalah seperti berikut:

<i>Tahun</i>	<i>Minit seminggu</i>
I	270
II	270
III	210
IV	150
V	150
VI	150

Butir-butir ini telah diberikan kepada saya oleh Yang Berhormat Menteri Pendidikan kepada salah satu daripada soalan-soalan saya.

Apabila tahun-tahun berlalu, masa pengajaran Bahasa Malaysia pun berkurangan. Semua matapelajaran lain di Sekolah-sekolah Tamil diajar dalam Bahasa Tamil. Dengan demikian adalah jelas bahawa pelajar-pelajar di Sekolah-sekolah Tamil tidak mendapat kesempatan yang sama dengan pelajar-pelajar di Sekolah-sekolah Kebangsaan untuk mempelajari Bahasa Malaysia.

Kerajaan telah mengambil beberapa langkah untuk meningkatkan mutu dan kefasihan Bahasa Malaysia di kalangan masyarakat bukan bumiputera.

Saya mengucapkan tahniah kepada usaha ini tetapi saya tidak puas hati dengan pengajaran Bahasa Malaysia di Sekolah-sekolah Tamil kerana kegagalan pelajar-pelajar adalah tinggi di Sekolah-sekolah Tamil disebabkan ketidakfasihan mereka dalam Bahasa Malaysia.

Saya meminta agar Kerajaan mengandakan masa pengajaran

Bahasa Malaysia di Sekolah-sekolah Tamil atau pengajaran matapelajaran lain dalam Bahasa Malaysia dipertimbangkan.

Sekali lagi saya menyokong Usul merakamkan sembah menjunjung kasih Kebawah Duli Tuanku. Sekian, terima kasih.

Timbalan Yang di-Pertua: Sila Yang Berhormat Tuan Krishnan.

6.20 ptg.

Tuan C. Krishnan: Tuan Yang di-Pertua, saya juga ingin menyokong Usul mengucapkan junjung kasih Kebawah Duli Yang Maha Mulia Seri Paduka Baginda Yang di-Pertuan Agong di atas Titah Di-Raja Baginda.

Tuan Yang di-Pertua, dalam ucapan saya ini, saya ingin menyentuh mengenai Kertas Putih berkaitan dengan keselamatan dalam negeri. Keterangan yang terkandung dalam Kertas Putih itu seharusnya menyedarkan kita bahawa perbezaan kulit dan agama tidak harus dijadikan isu dalam mana-mana debate, sama ada secara jenaka atau sebaliknya. Dalam masyarakat kita kerja mengeksploitasikan isu sensitif sering dijadikan asas menjadi pengaruh, terutamanya dikalangan politik. Ada beberapa soalan yang berkait rapat dengan perkara mengeksploitasikan isu-isu sensitif seperti yang disebut dalam Kertas Putih itu yang memerlukan jawapan. Saya ingin bertanya apakah semua pihak yang terbabit dalam memanaskan suasana dalam negara tahun lalu (1987) sudah sedar betapa buruknya tindakan mereka. Apakah mereka akan berhenti di sini atau mencari helah baru untuk menimbulkan isu-isu berkenaan sekali lagi?

Tuan Yang di-Pertua, dalam Dewan yang mulia ini saya ingin menegaskan bahawa pihak yang berkenaan

hendaklah berhati-hati bahawa menaikkan perasaan marah, cemburu dan dengki ini boleh mematikan unsur-unsur keyakinan berbagai kaum. Saya menyeru kepada anasir-anasir yang kurang bertanggungjawab janganlah memperjudikan keselamatan negara dan kedamaian hari ini mencari huru-hara dan pertumpahan darah. Tenaga dan kepintaran membelit yang mengeruhkan suasana dalam masyarakat tahun lalu perlu digunakan sekarang terhadap pimpinan masyarakat yang kukuh, setia dan sepakat. Kita mahu melihat anak Melayu, Cina, India dan bangsa-bangsa lain hidup dalam aman, tenteram tanpa prasangka. Sehubungan itu, kita mahu melihat masyarakat majmuk dibimbing ke arah persefahaman dan keharmonian yang berkekalan. Tidak ada gunanya pemimpin kita melaung-laungkan pembangunan negara dan mengajar meningkatkan produktiviti jika rakyat tidak sepakat membantu.

Tuan Yang di-Pertua, baru-baru ini Yang Amat Berhormat Perdana Menteri kita, Dato Seri Dr Mahathir Mohamed di berbagai mesyuarat dan perjumpaan telah menyeru betapa pentingnya sikap toleransi antara kaum. Beliau telah pun menjelaskan bahawa hak-hak berbilang kaum hendaklah dihormati. Sikap tolak-ansur dan memahami adat resam kaum lain hendaklah diambil perhatian. Kita mesti mengamalkan sifat-sifat toleransi bagi mengelakkan ketegangan kaum. Menurut Perdana Menteri, para pelabur asing akan lari, manakala pengangguran pula akan meningkat jika rakyat berbilang kaum memilih untuk bersengketa antara satu sama lain.

Sepertimana yang ditegaskan oleh Perdana Menteri untuk mengelakkan ketegangan kaum, kita mesti memahami adat resam kaum lain dan mengamalkan sifat-sifat toleransi.

Ulasan Perdana Menteri ini disambut baik dan gembira oleh rakyat, khususnya golongan bukan Melayu. Janganlah menyakitkan perasaan kaum, ini adalah azam baru dan resolusi tahun baru para ahli politik di dalam dan di luar Parlimen hendaklah mengambil perhatian.

Tuan Yang di-Pertua, Parti MIC adalah suara politik kaum India di negara ini. Parti kita menganjurkan perjuangan yang mengambil jalan sederhana. Kami tidak bersetuju dengan perjuangan yang keterlaluan atau melampau. Parti MIC 'committed', dengan izin, kelandasan sederhana yang berpegang kepada persetujuan merdeka tahun 1957. Seperti parti komponen lain, MIC secara terbuka mempertahankan hak-hak istimewa orang Melayu apabila ada pemimpin bukan Melayu mencabar hak itu dan juga kami tidak bersikap membisu apabila hak-hak bukan Melayu dicabar oleh para politik lain. Kami menghargai keutuhan Barisan Nasional kerana ia memperjuangkan konsep Parlimen yang berbilang kaum. Baru-baru ini apabila kestabilan Barisan Nasional diuji berikutan dengan perisytiharan UMNO tidak sah, seperti parti komponen lain, kami wakil MIC seramai 12 orang berdiri teguh di belakang Barisan Nasional dan Ketua Kerajaan kita, Dato Seri Dr Mahathir Mohamad atas arahan pemimpin kami, Yang Berhormat Dato Samy Vellu. Segala tindakan yang diambil oleh parti komponen seperti MIC dan MCA disanjung tinggi oleh para pemimpin UMNO di beberapa peringkat. Saya suka menegaskan aspek ini di sini, kedua-dua parti masih menghargai semangat Perikatan yang menjadi asas untuk memperjuangkan kemerdekaan kita. Hasil kerjasama politik di antara Melayu dan bukan Melayu telah membolehkan Malaysia menikmati kestabilan dalam serba-serbi. Tuan Yang di-Pertua, inilah falsafah politik

MIC yang mewakili kaum majoriti kita dalam negara ini.

Tuan Yang di-Pertua, negara kita hanya pernah menganggotai Majlis Keselamatan Bangsa-bangsa Bersatu untuk satu tempoh sahaja, itupun secara berkongsi dengan negara Czechoslovakia pada tahun 1965. Kami mempunyai alasan yang baik untuk bersaing dengan negara Bangladesh bagi menggantikan Jepun yang akan kita tempohnya akhir tahun ini. Diharap negara kita memenangi kerusi ini sebagai satu status dunia bagi negara kita.

Tuan Yang di-Pertua, saya menyokong Dasar Luar Negara kita bahawa kawasan Antartika kekal menjadi warisan manusia sejagat. Punca-punca kekayaan ini hendaklah dibenarkan dinikmati oleh masyarakat dunia. Sehubungan itu, saya bersetuju dengan cadangan Malaysia supaya Setiausaha Agung Pertubuhan Bangsa-bangsa Bersatu dijemput sama menghadiri mesyuarat parti perunding perjanjian ATCA Antartika.

Tuan Yang di-Pertua, peristiwa di Sri Lanka dari segi keperimanasian rakyat Malaysia berbahasa Tamil berasa kecil hati dengan apa yang berlaku di Sri Lanka. Diharap Kerajaan India dan Sri Lanka akan memberhentikan pengorbanan jiwa secepat mungkin.

Tuan Yang di-Pertua, dari lebih kurang 440 sekolah-sekolah aliran Tamil di Malaysia kebanyakannya adalah digelar sebagai sekolah-sekolah bantuan modal. Dengan itu, Kementerian Pendidikan hanya

memberi sebahagian daripada wang modal yang perlu untuk membina darjah-darjah yang perlu untuk menambah ruang bilik darjah atau mengganti bangunan yang buruk. Juga, Kementerian Pendidikan tidak memberi bantuan yang bermakna untuk membeli kelengkapan-kelengkapan seperti kerusi-meja dan sebagainya ataupun mengganti kerusi-meja yang telah pun rosak. Tambah lagi, penyelenggaraan sekolah-sekolah itu tidak juga dibiayai dengan secukupnya oleh Kementerian Pendidikan. Pada amnya, masyarakat keturunan India dan Persatuan-persatuan Ibubapa dan Guru-guru diminta untuk menanggung semua perbelanjaan seperti ini, tetapi malangnya masyarakat di estet-estet ataupun di kawasan-kawasan mundur di mana terletaknya sekolah-sekolah Tamil tidak mampu mengutip atau mengadakan tabung wang yang besar untuk hal-hal ini. Dengan itu

Timbalan Yang di-Pertua: Ahli Yang Berhormat, saya mohon maaf, kerana masa sudah cukup. Ahli Yang Berhormat boleh menyambung ucapan pada hari esok.

Tuan C. Krishnan: Terima kasih, Tuan Yang di-Pertua.

Timbalan Yang di-Pertua: Ahli-ahli Yang Berhormat, sekarang saya tangguhkan Dewan yang mulia ini hingga jam 2.30 petang hari esok, Selasa, 29hb Mac, 1988.

Dewan ditangguhkan pada pukul 6.30 petang.